

eNgulu Mbuya ya Yesu Kirisito
nga ko yashakawa na
Luka



**eNgulu Mbuya ya Yesu Kirisito
nga ko yashakawa na
Luka**

L'Evangile de Jésus-Christ selon Luc en Kikobo

ISO 639-3: okc

© Comité de Traduction de la Bible en Langue Kikobo

prokobotraduct@gmail.com

Edition d'essai, 2022

En ce qui concerne les illustrations:

Illustration au couverture par David C. Cook © 1996 David C. Cook

Illustration à la page 73 par Louise Bass © The British & Foreign Bible Society, 1994.

Illustration à la page 4 par Darwin Dunham © United Bible Societies, 1989.

Illustration à la page 83 par Gordon Thompson © 2012 Wycliffe Bible Translators Inc.

Illustrations aux pages 8, 20, 28, 41, 64, 66, 73 et 77 par
Graham Wade © United Bible Societies, 1989.

Imprimé à Goma, République Démocratique du Congo

Mulayi ko basomi

Ni kwenene ko bandu ionvwa ekinwa kya Gongo mo minegene minamina y'ekigeni ng'aBakobo hewethuwe ni yine muhimbabo. Aho bikwirire kutsibu na bitholere n'ihimba, mo ndambi obuli mundu angaminye ekinwa ekyo mo thusimo thw'omunegene gawe.

Kuli bigenyero bingi aBakobo bathahera bathabona akanya k'erisoma ekinwa kya Gongo mo munegene wabo. Ni bathyo ko obuguma bw'abakulu b'ebisomo n'abakulu b'ikobo mo buguma haguma n'ekithunga ky'e SIL-ECG na Seed Company ni bathyo kw'eribindula ly'eBibiriya mo kikobo ko lyathangaga.

Aho akagala kambere mokathanga ihirwa mw'ibindula endagane nyihya, ithanga ko Ngulu Mbuya nga ko yashakawa na Luka. Thwikiritsye ko erisomwa ly'eNgulu Mbuya eno lyandaletsa lumogo mo Bakobo bobakanganaya mo biro bingi ko batsigire erisoma ekinwa kya Gongo mo munegene wabo.

Bushana n'ekyo othushababo bawathikye omulimo ono ko ebyo muthima n'ebye bindu n'ebyo esofaranga na babye n'irindirira kushangwa ebyo thuyithayire bithahwerere kw'ibindula oLuka lusha kutse endagane nyihya kuroshi hewethuwe eBibiriya yoshi mo kikobo.

Mo mashako esongununu (*) esiri ko binwa birebe esithuma abasomi basome mo ngolosere «Binwa Bihya mo Kikobo» yo yiri ko nduli y'ekitabo ky'eNgulu eno. Esokoroshyo [...] eyikangania obuli mashako wathali mo wandi mashako wa kera (Luka 22:43-44; 23:17,34). Amashako ethu wo thwimanireko w'eNgulu ya Luka mo kikobo abyaga w'ekikiriki ky'eNdagane Nyihya (Nouveau Testament Interlinéaire Grec/Français, Alliance Biblique Universelle, 1993). Mothwakolesa kuthyo na Bibiriya s'eyindi minegene n'ebitabo by'emisonzomolo y'eBibiriya. Omulimo ono athali w'ababinduli na bahani b'ekithunga ky'eSIL basha, hewethuwe n'aBakobo nabo bobalebayabyo ithanga ko ndangiro ihika ko nduli.

Ko kwenene mwandeya mo kitabo kino mo binwa bya kikobo bithashakire nga ko mubegere inegenabyo, kwa mufano nga: «Tawiti» mo mwanya wa «Daudi». Muyonvwe kubuya inegenabyo nga ko mubegere, hewethuwe bitholere omunegene w'ekikobo niashakwa mu muhanda mugumerera.

Kikobo anali munegene ng'eyindi minegene y'abaBantu, ni munegene awithe mulenge. Mo munegene ono, muli mirenge minene ibiri. Hali mulenge wali elugulu (á) n'omulenge wa hishi (à). Kuthyo esoherufi soshi s'omulenge (voyelle) siriko mulenge. Aho, bushana kuthabyaga ma akisa mangi mo mashako, thwandagenda othushaka emirenge ko herufi nyimbere y'ekinwa nyisha. Mo kitabo kimbere kino thuthahiriremo ma akisa kushangwa thukine mwigawo.

Konduli, othusima kutsibu aboshi, ba hofi na ba hale, bo bawathikya ko mihanda yoshi omulimo w'eribindula eBibiriya mo kikobo. Nethwe thuyithegekenie ikokya ebyoshi mwangathulethera mo biro byethu byo biri mo Himbi/Goma bashana n'ilotnya omulimo ono w'embere.

Ababinduli

eNgulu Mbuya ya Yesu Kirisito nga ko yashakawa na Luka

Ekyingiro

Ni Luka yo washakaga ekitabo kino. Abyaga mushake, kandi athabyaga Muyuta. Mwashaka ekitabo kino mo maha w'ifulira abathali Bayuta bw'eNgulu Mbuya y'obushabuli itsukira ku Yesu Kirisito. Nina Luka oyo yo washakaga ekitabo kya eMikolano y'aBathumwa. Luka mwathashunga ku Yesu, hewethuwe mwabuliritsya omwatsi w'obuyingo bwa Yesu ko bandu bo babyaga haguma naye (soma Luka 1:1-3).

Mo kitabo kino Luka akangania ko Yesu Kirisito yo Mugala w'oMundu yo wahikaga ishondya n'ishabula abandu bo babyaga ni baherire (soma Luka 19:10). Kandi Luka akangania ko Yesu agenda akangania eshashi ko bandu basunzuyirwe nga: abatsene n'abakatsi n'abana. Kandi Luka anegenya bushana n'omulimo w'oMuthima Mweru mo byo Yesu agenda akola.

Ni ekitabo kya Luka kyo kire kulenga ebitabo byoshi by'omo Ndagane Nyihya. Mw'ithanga ekitabo kino, Luka asonzomola binwa bingi byo bisimolera eributhwa lya Yesu (soma Luka 1-2), ashuba negena bushana n'ekithunga kya Yesu (soma Luka 3:23-38). Kandi anegenya k'olubatiso lwa Yesu (soma Luka 3:21), n'erilengwako liwe n'eSitani (soma Luka 4:1-13). Ashuba negena bushana n'omulimo wa Yesu (soma Luka 4-21), n'eribambwa liwe ko musalaba (soma Luka 22-23), n'erilubuka liwe (soma Luka 24).

Honyuma kwaho Luka anegenya nga ko Yesu ayikangaya ngendo kangu kangu ko biga buwe amala ilubuka. Mwathegekaniabo ko mulimo w'erifulira abandu bw'eNgulu Mbuya. Ko nduli anegenya kw'iruka lya Yesu mo lubula (soma Luka 24:50-51).

Ebyo birimo

- a) Ebinwa by'endangiro (1:1-4)
- b) Eributhwa lya Yesu n'obwana buwe (1:5-2:52)
- c) Omulimo wa Yoani Mubatisya n'irengwako lya Yesu (3:1-4:13)

- d) Yesu akangiritsya bushana n'oBwami bwa Gongo n'ikola ebithikothiko mo kihugo ky'iNgalilaya (4:14–9:50)
- e) Yesu akangiritsya bingi bushana n'abo bagenda abashondya imukwama, abere ali mo nzira y'erirukira iYerusalemu (9:51–19:27)
- f) Yesu ingira mo muyi w'iYerusalemu n'ikangiritsya bushana n'ebiro by'enduli (19:28–21:38)
- g) Luholo lwa Yesu (22:1–23:56)
- h) Ilubuka lya Yesu (24:1-53)

Endangiro y'ebinwa bya Yesu Kirisito

1 ¹Mukengwa Teofili, hali bandu bangi mobayirenga ishaka ikwamana n'ebinwa byatsukaga mo kathi kethu. ²Abobashakaga abo mobaganulira kundu ng'oko abakoli ba Yesu Kirisito* bathubwiraga. Abakoli abo ni bobayiloleraga ko byoshi byo Yesu akolaga mo mesho wabo hobikathangira. Ni ibo bobafulaga eNgulu Mbuya ya Gongo. ³Na ngye monyayithegeretsye kutsibu ebinwa byoshi bya Yesu ithoka ko byathangaga. Bushana n'ebyo nyamashunga mukengwa Teofili, nyikushakire ebinwa byoshi ebyo mw'ithondeka. ⁴Enyikushakira kushangwa uminye ekwenene y'amakangiritsya wakangiritsibawa.

Mwatsi w'eributhwa lya Yoani Mubatisya

⁵Mo mugulu Herote abyaga mwami w'omo kihugo ky'iYuteya, habyaga mundu muguma eritsina liwe ni yo Sakariya. Sakariya oyo abyaga muguma w'oko baheri* w'omo kikembe kya Abiya. Mukatsiwe Lisabeti abyaga w'oko luganda lwa Haruni.^a ⁶Sakariya na Lisabeti babyaga bathunganene embere sa Gongo. Nibakwamire kundu amathegeko* wa Nyinya-kowethu n'ikola nga kw'anegenire. ⁷Hewethuwe babyaga nibathawithe ku mwana kushangwa Lisabeti abyaga mugumba. Kandi ababiri boshi nibahera bakulukulu kutsibu.

⁸Kiro kiguma Sakariya agenda akola omulimo gawe w'obuheri mo Nyumba ya Gongo*, kushangwa lwabyaga luhitsyo lw'omo kikembe kyabo ky'ikola mulimo. ⁹Omw'ikwamana n'emitsyo y'abaheri, Sakariya yo washombolawa mu bwiki kushangwa ingire mo Nyumba ya Nyinya-kowethu oketsyemo obubani.^b ¹⁰Mo ndambi Sakariya agenda okya obubani*, abandu boshi babyaga embuga niabashaba Gongo.

^a 1:5 Haruni abyaga muheri mumbere w'aBaisiraeli.

^b 1:9 Soma ithoka 30:7-8.

11 Honyuma kw'aho malaika* muguma wa Nyinya-kowethu mwabuthukira Sakariya, amimana ko malyo w'obutara*^c bw'hererako obubani*. 12 Sakariya abere amulolako mwashalima, m'ubaha kutsibu. 13 Hewethuwe malaika* oyo mwamubwira athi: «Uthubahaga mbe Sakariya kushangwa Gongo amonvwa emishabe awe. Mukatsi awe Lisabeti andakubuthira mwana wa butšana wandamulukamo Yoani. 14 Omwana oyo andaleka niwabya na lumogo lunene, na bandu bangi bandamogera eributhwa liwe. 15 Kushangwa andabya mukulu embere sa Nyinya-kowethu, athindashome tifayi* kutse wandi mafu w'ikundya.^d Andabya akinali mo nda ya nyinya guwe, andashondolwa n'omuthima Mweru*. 16 Andaleka aBaisiraeli bangi bashubire Nyinya-kowethu Gongo wabo.^e 17 Andahika nga muthumwa wa Gongo, andabya n'omuthima na maka nga Eliya muminyeretsi*. Bushana n'iletha abana bahulikirirane n'obwishe. Kandi ahindule abandu bobanathinda ebinwa bya Gongo nimo babya n'obwenge ng'abandu bathunganene embere sa Gongo.^f Mw'ebyo andathegekanitsya Nyinya-kowethu yo bandu abayithegekenie imukokya.»

18 Hewethuwe Sakariya mwabutsya omumalaika* oyo athi: «Nyamina nyithi kw'ebyo ni bya kwenene? Kushangwa ingye nyahera mushyakulu na mukatsi aye naye ahera mukekulu.» 19 Malaika* mwamushubitsya athi: «Ingye ngyo Ngabulieri,^g n'ingye ngyo nyinimana embere sa Gongo. Iye yo wamanyithuma kw'iwe nyikubwire n'ikufulira engulu mbuya eyi. 20 Onvwa! Ebinwa ebyo byandabererera ko ndambi yilayirwe. Kushangwa mo uthikiritsye ebinwa ebyo, wabya kitsiru. Uthikotsye ishuba negena ihika ekiro ebinwa ebi byandabererera.»

21 Omo ndambi eyo abandu babyaga balindirire Sakariya mobashweka kw'amaherera mo Nyumba ya Gongo* ndambi nyire. 22 Sakariya abere athokamo mwathakotsya inegeni. Mwangenda anegeni nabo mo minwe, kushangwa niamabya kitsiru. Aho abandu mobamina ko mwakahumanana mo Nyumba ya Gongo*.

23 Sakariya abere amamala ebiro biwe by'ikola mo Nyumba ya Gongo*, mwashuba ewe.

24 Honyuma ko biro ebyo, mukatsiwe Lisabeti mwaheka bukule. Mwamala myetsi ithano buthahuluka. Naye agenda anegeni athi: 25 «Shunga ebibuya Nyinya-kowethu amanyikolera! Mwanyithokya shoni s'obugumba embere s'abandu.»

^c 1:11 Obutara bw'hererako bw'aBayuta bwabyaga bwa mabwe.

^d 1:15 Soma Miganzo 6:3.

^e 1:16 Soma Malaki 2:6.

^f 1:17 Soma Malaki 3:23-24 kutse Malaki 4:5-6.

^g 1:19 Soma Ndaniere 8:16; 9:21; Luka 1:26.

Mwatsi w'eributhwa lya Yesu

26 Ko mugulu obukule bwa Lisabeti bwabere bwahika ko mwetsi w'endathu, Gongo mwathuma malaika* Ngabulieri mo muyi w'iNasareti, mo kihugo ky'iNgalilaya, **27** ko munyere muguma agenda ahulwamo Mariya. Mariya oyo agenda ahikibwa na muyira muguma ni yo Yosefu, w'omo luganda lw'oMwami Tawiti. **28** Malaika oyo mwahika ho Mariya abyaga n'imuketsya athi: «Bwakyere he Mariya! Moga! Nyinya-kowethu mwakuha lukogo kandi ali haguma nawe.» **29** Mariya abere onvwa ekinwa eki mwahononokala. Mwachanga iyibutsya athi: «Engetsyo eyi inegenire ithi ki?»

30 He malaika* mwamubwira athi: «Mariya uthubahaga kushangwa Gongo amakuha lukogo. **31** Waheka bukule, wandabutha mwana wa butsana, wandamulukamo Yesu. **32** Andabya mukulu na andahulwamo Mugala wa Gongo* oyo uli elugulu w'ebiyoshi. Na Nyinya-kowethu Gongo andamuha obwami bwa Tawiti ishe-kulu guwe. **33** Andathegeka aBaisraeli bo kera na kera, n'obuthegeki buwe buthindahwe.»

34 Mariya mwabutsya malaika* athi: «Ebi bya kotsikana bithi ingye ndetsi nyamina bayira?» **35** Malaika* mwamushubitsya athi: «oMuthima Mweru* andakukimirako, n'akagala ka Gongo w'elugulu w'ebiyoshi kandakushwika ng'ekithuthu. Bushana n'eki omwana wandabutha andabya mubuyirire* kandi andahulwamo Mugala wa Gongo*. **36** Hene, Lisabeti w'omo luganda lwawe, na mwanahera mukekulu kandi yo wabyaga mugumba naye ni



mukule wa myetsi ndathu alindire ibutha mwana wa butswana. ³⁷Kushangwa hathali kyo kinalemana embere sa Gongo.»

³⁸Aho, Mariya mwanegena athi: «Ingye nyiri mugombe wa Nyinya-kowethu, binyibyeko nga ko uthanegena.» Honyuma kw'aho malaika* mwayigendera.

Mariya aya lungula Lisabeti

³⁹Mo biro ebyo Mariya mwahuthuka n'iya mo kihugo ky'ebithwa mwahika mu muyi muguma w'iYuteya. ⁴⁰Abere ahikayo mw'ingira mo nyumba ya Sakariya n'iketsya Lisabeti. ⁴¹Lisabeti abere onvwa engetsyo ya Mariya, obukule buwe mobwashatha mo nda yiwe. Mwashondolwa n'oMuthima Mweru*. ⁴²Mwahambala n'ibwira Mariya athi: «Gongo amakuha lukogo kulenga abakatsi boshi. N'omwana wandabutha naye amahabwa lukogo! ⁴³Nyiri ndi w'ilungulwa na nyinya wa Nyinya-kowethu? ⁴⁴Kushangwa mo ndambi nyithonvwa engetsyo awe obukule mobushatha n'olomogo mo nda aye. ⁴⁵Wamagashanirwa kushangwa mowikiritsya ebyo wabwirawa ithoka ku Nyinya-kowethu ko byandabererera.»

Olwimbo lwa Mariya

⁴⁶Aho Mariya mwanegena athi:

«Omuthima aye asingya Nyinya-kowethu yo kutsibu,
⁴⁷kandi omuthima aye amogera Gongo yo kutsibu, yo Mushabuli aye;
⁴⁸kushangwa mwashunga obulonvu bwaye ingye mugombe guwe.
 Ega! Ithanga linolino abandu boshi bandagenda abanyahulamo
 mugashanirwa,
⁴⁹kushangwa Gongo w'amaka woshi mwanyikolera kindu kinene.
 Eritsina liwe lisha lyo libuyirire*.
⁵⁰Ko biro byoshi andagenda afwira shashi bobamukengire.
⁵¹Mwakola kindu kinene mo maka w'okuboko kuwe.
 Mwapanzire abandu bo babyaga n'emithima y'emifuma.
⁵²Mwathoyitsye abami b'oko ndebe sabo,
 n'abalonvu mwirukitsebo.^h
⁵³Ababyaga nibawirire mwayirirebo mo bashoki,
 hewethuwe abashoki mwafulukitsyebo minwe misha.
⁵⁴Mwangirire Isiraeli mugombe guwe,
 mwathibirirwe imukangya obubuya buwe,
⁵⁵ng'oko alagaga bo thatha-kulu,
 Aburahamu n'olubutho luwe kera na kera.»

^h 1:52 Soma Yobu 5:11; 12:19.

56 Mariya mwikala haguma na Lisabeti hofi myetsi ishathu. Honyuma kw'aho mwashaba ewe.

Eributhwa Iya Yoani Mubatisya

57 Ebiro by'eributha bya Lisabeti byabere byahika, mwabutha mwana wa butšana. **58** Abahawene n'abahimbani buwe babere bonvwa ko Nyinya-kowethu mwamufwira shashi nene mobamoga haguma naye. **59** Ekiro ky'omunani enyuma y'eributhwa liwe mobagenda n'omwana ayatsibwekoⁱ, i mobashondya imuha eritsina Iya Sakariya ishe guwe. **60** Hewethuwe nyinya guwe mwathinda athi: «Ihi, alukwamo Yoani.» **61** Mobamubwira bathi: «Mbeno! Hathali mundu n'omuguma w'omo luganda lwawe yo unahulwa mw'itsina eryo!»

62 Aho mobabutsya ishe w'omwana y'omo minwe bathi: «Omwana wamulukamo ndi?» **63** Sakariya mwashababo kishayi naye mwashakako athi: «Eritsina liwe yo Yoani.» Aboshi mobashweka kutsibu. **64** Mo kathambi ako obunu bwa Sakariya, n'olulimi lwe byamagobokala amathanga ishaba negena n'ihalamba Gongo kutsibu. **65** Aho abahimbani buwe boshi mobubaha kutsibu. Omwatsi oyo mwathimba mo bithwa byoshi by'ekihugo ky'iYuteya.

66 Abandũ boshi bonvwaga omwatsi oyo bamathanga iyibutsya mo mithima yabo bathi: «Omwana wamabuthwa oyu andabya athi?» Ega! Kwenene amaka wa Nyinya-kowethu abyaga haguma naye.

Olwimbo Iwa Sakariya

67 Sakariya, ishe w'omwana mw'otsutsibwa n'oMũthima Mweru^{*}; mwathanga ilagula athi:

68 «Nyinya-kowethu Gongo w'ekihanda ky'aBaisiraeli asingibwe, kushangwa mwawathikya abandũ buwe n'ishabulabo.

69 Mwathuthumira Mushabuli wa maka, w'omo luganda lwa Tawiti mugombe guwe.

70 Ebinwa ebi biringene n'ebyanegenaga kera itsukira ko baminyeretsi^{*} buwe babuyirire^{*} bathi:

71 andathuthumira yo wandathushabula mo minwe y'esonzigu, na bobathufwire bushu.

72 Mwakangania eshashi yiwe yo bo thatha-kulu, na kandi mwathibirirwa endagane^{*} yiwe nyibuyirire^{*} kutsibu.

73 Akolaga athyo ikwamana nga kw'alahitsiraga Aburhamu thatha-kulu wethu,^j

ⁱ 1:59 Soma Balawi 12:3.

^j 1:73 Soma Ndangiro 22:16-17.

74 athi andathushabula n'ithuthokya mo minwe y'esonzigu
kushangwa thumukolere butsira buba,

75 mo bubya n'obuthunganene embere siwe,
biro byoshi mw'ibyahoye lyethu.

76 Nawe, mwana aye, bandagenda abakwahulwamo Muminyeretsi
wa Gongo* yo uli elugulu w'ebyoshi,
kushangwa niwe wandahika embere Nyinya-kowethu ahike,
bushana n'ithunganania enzira yiwe.

77 Ni iwe wowandabwira abandu bawe nga kw'ahika bushana n'ishabulabo,
mw'iganyirabo ebitsibu byabo.

78 Ikwamana n'eshashi nene ya Gongo wethu,
andathuthumira ekyakakala ky'elugulu ekyandathukoletsya.

79 Andakoletsya abali mo mwitsimya n'abali mo nzira y'oluholo,
bushana n'ithwangirira thukwame enzira y'obuholo.»

80 Omwana oyo agenda ishuka n'omuthima guwe mwabya n'akagala.
Mwayikala mo mbwarara* ihika ko kiro ashungikaga embere s'abandu
b'iIsiraeli.

Ibuthwa lya Yesu

(Mat 1:18-25)

2 ¹Ko biro ebyo, Ngosito Kaisari* mwahamula abandu boshi babyaga mo
bihugo byoshi agenda athegeka baye ko fishi.^a ²Efishi nyimbere eyo
yakolekaga mo biro Kurenio abyaga mukulu w'ekihugo ky'eSuriya. ³Abandu
boshi mobayakolera efishi eyo, obuli mandu ko muyi w'amabuthwa guwe.

⁴Yosefu naye mwathoka mo kihugo ky'iNgalilaya, ko muyi w'iNasareti.
Mwirukira mo kihugo ky'iYuteya mo muyi w'iBetelehemu w'oMwami
Tawiti abuthirawamo; kushangwa naye abyaga w'omo luganda lwa
Tawiti. ⁵Mw'iya ko fishi mwagenda na Mariya oyo agenda ahikya; naye
abyaga mukule. ⁶Mo mugulu babyaga iBetelehemu, Mariya ebiro biwe
by'eributha mobyahika. ⁷Naye mwabutha mwana guwe mumbere wa
butsana. Amamuhira mo biraliyo, amamulambika mo kiringa kushangwa
mobathabona bugonzero mo nyumba y'abageni.

Malaika afulira abalishya b'omwatsi w'ibuthwa lya Yesu

⁸Mo kithambi ekyo mwabyaga balishya. Abalishya abo babyaga mo
lulishitsyo niabatheya ebihyo byabo mo kiro. ⁹Malaika* muguma wa
Nyinya-kowethu mwahulukirabo, mo lukengerwa lw'ekyakakala kya

^a 2:1 Efishi eyo yakolekaga bushana abandu boshi balihe ekoli y'omwami mukulu
w'iRoma.



Abalishya bamonvwa omwatsi w'ibũthwa lya Yesu (2:9)

Nyinya-kowethu mokyathimba kũbo, nabo mobũbaha kũtsibũ. ¹⁰Hewethuwe malaika* mwabwirabo athi: «Mũthũbahaga! Kũshangwa nyabalethera mwatsi mũbũya w'andalettha lumogo lunene ko bandũ boshi. ¹¹Munobwire Mushabuli enyu amabũthwa mo muyi w'oMwami Tawiti, naye ni Kirisito* yo Nyinya-kowethu. ¹²Na kino kyo kiminyĩkalo kyo kyabakangania: mweya lumekere luli mũ biraliyo lulambikire mo kiringa.»

¹³Aho n'aho omũmalaika* oyo mwashungika niali na kikembe kinene ky'abandi bamalaika* ithoka elũbũla niabasingya Gongo niabanegena bathi:

¹⁴«Gongo asingibwe mo lũbũla,
n'abandũ abo atsigire mo kihũgo babye n'obũholo!»

Abalishya bamaya lola ko mwana iBetelehemu

¹⁵Honyuma kw'aho abamalaika* abo mobamika abalishya, mobashũba mo lũbũla. Aho abalishya bamabwirana bathi: «Thũye iBetelehemu thulole nga yabere ki kyo Nyinya-kowethu amathũbwira.» ¹⁶Bamahuthukirayo, bameya Yosefu na Mariya n'olumekere nilunalambikire mo kiringa. ¹⁷Abalishya babere bashunga omwana, mobayafũla omwatsi malaika athabwirabo bushana n'omwana oyo. ¹⁸Abandũ boshi bonvwaga omwatsi abalishya bafũlaga mobashweka kũtsibũ. ¹⁹Hewethuwe Mariya mwabika ebyoshi ebyo mo muthima gũwe na agenda aganikirabyo kũtsibũ. ²⁰Honyuma kw'aho abalishya abo mobashũbũla. Mobagenda niabasima n'isingya Gongo bushana n'ebĩnwa byoshi bathonvwa n'ishunga. Kũshangwa mobeya ebinwa byoshi nga ko malaika abwiragabo.

Yesu amahabwa itsina

21 Omwana abere ahika ko kiro ky'omunani amala ibuthwa mobamutsako*. Mobamulukamo Yesu. Eritsina eryo lyo malaika* ahulaga embere Mariya aheke obukule.

Yesu akanganibwa mo Nyumba ya Gongo

22 Honyuma kw'aho, ebiro mobyahika byo Yosefu na Mariya bangayeritsye ikwamana n'oMugomba* wa Musa nga kw'anegenire. Mobathwala omwana y'iYerusalemu bushana bamukanganie embere sa Nyinya-kowethu.^b 23 Kushangwa bishakire mo Mugomba* wa Nyinya-kowethu bithi: «Obuli mwana mumbere w'obutsana andabya wa Nyinya-kowethu.»^c 24 Kandi bahikaga bushana n'ihera obuhere buthegekire mo Mugomba* wa Nyinya-kowethu athi: «Hiparara hibiri kutse makuku abiri owakiri malere.»^d

25 Mo mugulu oyo mo muyi w'iYerusalemu mwabyaga munda muguma eritsina liwe ni yo Simioni. Simioni oyo abyaga munda athunganene niubahire Gongo. Agenda alindirira Mushabuli w'ekihanda ky'aBaisraeli. oMuthima Mweru* abyaga haguma naye. 26 Kandi mwamukumbulira kw'athindafwe athetsi alola ku Kirisito* yo wandathumwa na Nyinya-kowethu. 27 Simioni mwashondolwa n'oMuthima Mweru, mwingira mo Nyumba ya Gongo*. Ababuthi ba Yesu mobamulethamo akolerwe ng'oMugomba* wa Musa kw'anegenire. 28 Simioni mwangirira omwana mo minwe yiwe, amasingya Gongo n'inegena athi:

29 «Nyinya-kowethu, wamabereretsya endagane awe.

Hano wahera wanganyirika ingye mugombe awe nyifwe mo buholo.

30 Kushangwa ingye owenewene nyamayishungira mo mesho aye oMushabuli wamathuma.

31 Wamamuthegekania abye Mushabuli embere s'abandu boshi.

32 oMushabuli ono yo kyakakala kyandakoletsya ko bandu boshi abathali Bayuta,

kandi n'ye yo wandaleta olukengerwa ko bandu buwe Israeli.»

Bulagu bwa Simioni

33 Ebinwa Simioni anegenaga ku Yesu mobyashwekya ababuthi buwe.

34 Honyuma kw'aho Simioni mwagashanirabo. He mwabwira Mariya

^b 2:22 Soma Balawi 12:1-8.

^c 2:23 Soma Ithoka 13:2,12.

^d 2:24 Soma Balawi 12:8.

nyinya w'omwana athi: «Shunga! Omwana ono athabuthwa bushana athoye bandu bangi mo Isiraeli n'iania bangi mubo. Kandi andabya kiminyikalo kyo kithoka ku Gongo kyo bangi bandathinda. ³⁵Kushangwa emiganitsye ya bandu bangi eyibishire yandaminyikala. Nawe wowene Mariya wandagalwa nga mundu bathathobola omuthima mo muyali.»

Muminyeretsi Ana asima Gongo

³⁶Kandi habiyaga mukelulu muminyeretsi wa Gongo eritsina liwe ni yo Ana. Abyaga mwali wa Fanuele w'omo luganda lwa Aseri. Ye Ana oyo mwamala omwe mo miaka irinda busha, iba guwe mwafwa. ³⁷Enyuma kw'aho mwabya mushumbakatsi ihika ku miaka makumi munani n'ine. Athagenda athoka mo Nyumba ya Gongo* yo agendaga akolera kiro na mwishi n'iyima akalyo n'ishaba. ³⁸Ana oyo mwahika mo kathambi ako, mwathanga isima Gongo. Agenda asimola emyatsi ya Yesu ko bandu boshi bagenda abalindirira ko Gongo andashabula abandu b'iYerusalemu mo maligo wabo.

Ababuthi ba Yesu bamashuba iNasareti

³⁹Ababuthi ba Yesu mobamala ikola ebyoshi ikwamana n'ebithegekirwe mo Mugomba* wa Nyinya-kowethu. Honyuma kw'aho mobashuba n'omwana mo kihugo ky'iNgalilaya, mo muyi wabo w'iNasareti.

⁴⁰Yesu nianemwishuka nianemuyira kagala, niotswiremo bwenge n'olukogo lwa Gongo ni luli haguma naye.

Yesu ali mo Nyumba ya Gongo

⁴¹Ko buli mwaka ababuthi ba Yesu niabanaya iYerusalemu ko kiro kikulu ky'ePasaka*. ⁴²Yesu abere amayira miaka ikumi n'ibiri mwirukira iYerusalemu haguma n'ababuthi buwe ko linye ikwamana n'emibere y'aBayuta.^e ⁴³Ebiro by'elinye y'ePasaka byabere byahwa ababuthi ba Yesu mobashuba ewabo. He omwana Yesu mwashiba iYerusalemu ababuthi buwe mobathaminya. ⁴⁴Bagendaga abaganitsya bathi ane mo kathi k'abandi bagendania. Babere bamala igenda lugendo lwa muthobero muguma, bamamushondya mo luganda lwabo na mo balikyabo. ⁴⁵Hewethuwe mobathamubona. Bushana n'ekyo, mobashuba iYerusalemu nibanemumushondya.

⁴⁶Honyuma w'ebiro bishathu, mobamweya mo Nyumba ya Gongo*, n'ikere mo kathi k'abakangiritsya b'oMugomba* niahulikiritsyabo

^e 2:42 Ko Bayuta, omwana amahika ko miaka ikumi n'ibiri niahera ashondya ibya mundu mukulu mo binwa bya Gongo.

n'ibutsyabo. ⁴⁷Aboshi bagenda abamuhulikiritsya niabashweka bushana n'obwenge buwe n'emishubitsye yiwe. ⁴⁸Ababuthi buwe babere bamushunga mobashweka kutsibu. Nimo nyinya amubwira athi: «Mbe mwanaye! Bushana na ki wamathukolera ebi? Lola ingye na sho thwamakushondya emithima niyithali mo nda!» ⁴⁹Naye mwashubitsyabo athi: «Muthanyishondetsya ki? Muthetsi ko litholere ninyabya mo Nyumba ya Thatha?» ⁵⁰Hewethuwe eby'agenda abwirabo mobathonvwabyo.

⁵¹Ko nduli y'ebyoshi ebyo, Yesu mwandagala haguma n'ababuthi buwe mw'ishuba iNasareti, abyaga niashikitsyebo. Ebinwa byoshi ebyo nyinya nianabikabyo mo muthima gawe. ⁵²Yesu nianemwishuka mo bwenge, mo lugero n'omo lwanzo embere sa Gongo n'embere s'abandu.

Amakangiritsya wa Yoani Mubatisya

(Mat 3:1-12; Mar 1:1-8; Yoa 1:19-28)

3 ¹Ko mugulu Tiberiya Kaisari* abya mo mwaka w'ikumi n'ithano ali athegeka, bano bo bagenda abakola haguma naye: Ponso Pilato abyaga mukulu w'ekihugo ky'iYuteya, na Herote agendaga athegeka ekihugo ky'iNgalilaya, na mugala wabo Filipino naye agenda athegeka ekihugo ky'Itureya n'ekya Tarakoniti. Na Lisania niathegeka ekihugo kya Abilene. ²Na Ana na Kayafa babyaga baheri bakulu*.

N'oko biro ebyo e Kinwa kya Gongo* mokyahikira Yoani mugala wa Sakariya mo mugulu abyaga mo mbwarara*. ³Na Yoani oyo mwatsuka mo bihugo byoshi ebyabyaga bithimbire ko lwitsi lw'eYorotani, niakangiritsya abandu athi: «Mubinduke muthoke mo bitsibu byenyu na mubatiswe nimo Gongo aganyira ebitsibu byenyu.» ⁴Naho ebinwa mobyabererera, ebyo byashakawa n'oMuminyeretsi* Isaya omo kitabo kiwe athi:

«Mundu muguma ahambala mo mbwarara* athi:

“Muthungananie enzira ya Nyinya-kowethu,
Mumukometsye nzira sithunganene!

⁵Emithiri yoshi yandotsula.

Buli kithwa n'obuli kathwa byandakimibwa.

Esongonde sandalambulwa.

N'eso nzira sirimo thukubo thukubo sandalambathikanibwa.

⁶N'abandu boshi bandashunga ko Gongo andathushabula.”»

⁷Bandu bangi bagenda bahikira Yoani bushana abatisyebo. Hewethuwe mwagenda abwirabo athi: «Muli nga lubutho lwa nzoka! Ni ndi yo wabakangiritsya ishaga esohi ya Gongo yo yihika? ⁸Aho mugende omukangya mo mibere enyu ko mwabindikire ithoka mo bitsibu byenyu. Kandi muthayihalaga muthi: “Ithwe Aburamu yo thatha-kulu wethu.” Enyibabwira kwenene ko Gongo awithe amaka w'ibindula amabwe aya

abye bana ba Aburhamu! ⁹Lino embasha yamalire ihirwa mobisina by'emithi. Obuli muthi w'athahekire biguma bikwirire andatsibwa n'igushwa mo mutsanwa.»

¹⁰Honyuma kw'aho omuhindano oyo mwabutsya Yoani athi: «Thuyire thuthi?» ¹¹Yoani mwashubitsyabo athi: «Omundu oyo uwithe ku ngimba ibiri ahe yo uthawithe yo luguma. Na yo uwithe ku kalyo naye akole athyo.»

¹²Abakarani baguma b'ekoli nabo mobahikira Yoani abatisyabo, mobamubutsya bathi: «Mukangiritsya, nethwe thukole ki?» ¹³Mwashubitsyabo athi: «Muthagenda omulihisya faranga nyingi kulenga s'abakulu bahamwire.»

¹⁴Abashirikani nabo mobamubutsya bathi: «Nethwe thukole ki?» Mwashubitsyabo athi: «Muthashamulaga kindu kya bene, kandi muthabihiraga mundu. Hewethuwe mugende omumogera oluhembo lwenyu.»

¹⁵Abandu babyaga balindirire ihika lya Kirisito*. Aho aboshi bagenda abayibutsya mo mithima yabo nga kuno Yoani yo uthali Kirisito*. ¹⁶Yoani mwashubitsyabo athi: «Ingye enyibabatisya mu metsi. Hewethuwe ahika enyuma kw'ingye yo uwithe maka mangi kw'inyirengya. Nyithatholere iminula emiriki y'oko birato biwe. Iye andababatisya mo Muthima Mweru* na mo mutsanwa. ¹⁷Aho awithe ko luhungulo ko mo minwe, bushana n'longya engano. Engano eyo andahiraro mo mbupu yiwe. Hewethuwe omusisi andagushawo mo mutsanwa owathindatsime.»

¹⁸Yoani agenda afulira abandu bw'eNgulu Mbuya, n'ihabo wandi mahano mangi.

Herote ahira Yoani mo muliki

¹⁹Mukulu Herote mwahikya Herotia muka mugalabo nga ko bithatholere. Kandi agendaga akola n'ebindi bibi. Bushana n'ebyoshi ebyo Yoani mwamukemera. ²⁰He mwashuba ongerera ko bibi ebyo mw'imina Yoani n'imugusha mo muliki.

Yoani abatisya Yesu

(Mat 3:13-17; Mar 1:9-11)

²¹Abandu boshi babere bamala ibatisibwa, Yesu naye mwabatisibwa. Abere anemushaba Gongo olubula lwamakingukala, ²²n'oMuthima Mweru* mwamukimirako nga kalikuku. N'omulenge mw'onvwika ithoka mo lubula athi: «Uli Mugala aye mutsigirwa iwe unanyimoya kutsibu.»

Kithunga kya Yesu

(Mat 1:1-17)

23 Yesu abyaga niawithe miaka hofi makumi ashathu abere athangira omulimo guwe. Abandu bagenda baganitsya bathi ni mugala wa Yosefu.

Yosefu oyo abyaga mugala wa Heli.

24 Na Heli abyaga mugala wa Matati,
na Matati abyaga mugala wa Lawi,
na Lawi abyaga mugala wa Meleki,
na Meleki abyaga mugala wa Yana,
na Yana abyaga mugala wa Yosefu.

25 Na Yosefu abyaga mugala wa Matatiya,
na Matatiya abyaga mugala wa Amosi,
na Amosi abyaga mugala wa Nahumu,
na Nahumu abyaga mugala wa Esili,
na Esili abyaga mugala wa Nagayi.

26 Na Nagayi abyaga mugala wa Magati,
na Magati abyaga mugala wa Matatiya,
na Matatiya abyaga mugala wa Semeyi,
na Semeyi abyaga mugala wa Yoseki,
na Yoseki abyaga mugala wa Yota.

27 Na Yota abyaga mugala wa Yohanani,
na Yohanani abyaga mugala wa Resa,
na Resa abyaga mugala wa Yorobabeli,
na Yorobabeli abyaga mugala wa Salatiere,
na Salatiere abyaga mugala wa Neri.

28 Na Neri abyaga mugala wa Meleki,
na Meleki abyaga mugala wa Ati,
na Ati abyaga mugala wa Kosamu,
na Kosamu abyaga mugala wa Elimatamu,
na Elimatamu abyaga mugala wa Eri.

29 Na Eri abyaga mugala wa Yoshua,
na Yoshua abyaga mugala wa Elieseri,
na Elieseri abyaga mugala wa Yorimu,
na Yorimu abyaga mugala wa Matati,
na Matati abyaga mugala wa Lawi.

30 Na Lawi abyaga mugala wa Simioni,
na Simioni abyaga mugala wa Yuta,
na Yuta abyaga mugala wa Yosefu,
na Yosefu abyaga mugala wa Yonamu,

- na Yonamu abyaga mugala wa Eliyakimu.
- 31 Na Eliyakimu abyaga mugala wa Meleya,
na Meleya abyaga mugala wa Mena,
na Mena abyaga mugala wa Matata,
na Matata abyaga mugala wa Natani,
na Natani abyaga mugala wa Tawiti.
- 32 Na Tawiti abyaga mugala wa Yese,
na Yese abyaga mugala wa Obeti,
na Obeti abyaga mugala wa Boasi,
na Boasi abyaga mugala wa Salimoni,
na Salimoni abyaga mugala wa Nasoni.
- 33 Na Nasoni abyaga mugala wa Aminatabu,
na Aminatabu abyaga mugala wa Atimini,
na Atimini abyaga mugala wa Aramu,
na Aramu abyaga mugala wa Isironi,
na Isironi mugala wa Peresi,
na Peresi abyaga mugala wa Yuta.
- 34 Na Yuta abyaga mugala wa Yakobo,
na Yakobo abyaga mugala wa Isaka,
na Isaka abyaga mugala wa Aburahamu,
na Aburahamu abyaga mugala wa Tera,
na Tera abyaga mugala wa Nahori.
- 35 Na Nahori abyaga mugala wa Serugi,
na Serugi abyaga mugala wa Reu,
na Reu abyaga mugala wa Pelegi,
na Pelegi abyaga mugala wa Eberi,
na Eberi abyaga mugala wa Sela.
- 36 Na Sela abyaga mugala wa Kenani,
na Kenani abyaga mugala wa Arifakasati,
na Arifakasati abyaga mugala wa Semu,
na Semu abyaga mugala wa Noa,
na Noa abyaga mugala wa Lameke.
- 37 Na Lameke abyaga mugala wa Metusela,
na Metusela abyaga mugala wa Enoke,
na Enoke abyaga mugala wa Yareti,
na Yareti abyaga mugala wa Mahalaleli,
na Mahalaleli abyaga mugala wa Kenani.
- 38 Na Kenani abyaga mugala wa Enosi,
na Enosi abyaga mugala wa Seti,
na Seti abyaga mugala wa Atamu,

na Atamu abumbawa na Gongo.

Irengwako Iya Yesu
(*Mat 4:1-11; Mar 1:12-13*)

4 ¹Yesu mwathoka ko lwitsi lw'eYorotani niali na maka w'oMuthima Mweru*. N'oMuthima Mweru* oyo mwamuthwala mo mbwarara*. ²Mwabya eyo yo biro makumi ane, Sitani agenda amulengako. Ebiro byoshi ebyo mw'athalya kindu. Ebiro ebyo byabere byahwa, mwafwa nzala.

³Aho Sitani mwamubwira athi: «fwe, kwenene wamabya uli Mugala wa Gongo*, bwira eribwe eri lihinduke mukati.» ⁴Yesu mwamushubitsya athi: «Kushakirwe mo Mashako Abuyirire kuthi: “Omundu athindabyeho bushana n'akalyo kuroshi.”»

⁵Honyuma kw'aho Sitani mwirukitsya Yesu y'elugulu kutsibu. Aho n'aho mwamukangya amami woshi w'omo kihugo kino, ⁶n'imubwira athi: «Nyakuha obuthegeki boshi n'obushoki bw'amami aya. Kushangwa ebyoshi ebyo nyahabawabyo, nangye nyangahabyo munda woshi yo nyishashire. ⁷Aho, wamanyifukamira mw'inyirama ebyoshi ebyo ni byabya biwawe.»

⁸Yesu mwamushubitsya athi: «Kushakirwe mo Mashako Abuyirire kuthi: “Ugende uramya Nyinya-kowethu Gongo wawe, n'imukolera iye masha.”»

⁹N'oko nduli y'ebyoshi, Sitani mwathwala Yesu mo muyi w'iYerusalemu, mwamuhira ko mukuthu w'eNyumba ya Gongo* n'imubwira athi: «fwe kwenene wamabya uli Mugala wa Gongo* yigushe ahishi, ¹⁰kushangwa kushakirwe mo Mashako Abuyirire kuthi:

“Gongo andahamula abamalaika* buwe bakutheye.”

¹¹Kandi kushakirwe mo Mashako Abuyirire kuthi:

“Bakuhaka mo minwe yabo, kushangwa ekishando kyawe kithatsikalaga kw'ibwe.”»

¹²Yesu mwamushubitsya athi: «Kushakirwe mo Mashako Abuyirire kuthi: “Uthagenda ulenga ku Nyinya-kowethu Gongo wawe.”»

¹³Sitani abere amala irenga ku Yesu mo nzira soshi, mwathamuleka, ihika ku gundi mugulu.

Yesu athangira omulimo guwe mo kihugo ky'iNgalilaya

(*Mat 4:12-17; Mar 1:14-15*)

¹⁴Yesu mwashuba mo kihugo ky'iNgalilaya niali n'akagala k'oMuthima Mweru. Engulu yiwe moyahika mo kihugo kyoshi ekyo.

^a 4:4 Soma Ibuta 8:3.

^b 4:8 Soma Ibuta 6:13.

^c 4:11 Soma Saburi 91:11-12.

^d 4:12 Soma Ibuta 6:16.

15 Agenda akangiritsya abandũ b'omo sinakoki* yabo. N'abandũ boshi niabamusingya.

Abandũ b'iNasreti bamathinda Yesu

(Mat 13:53-58; Mar 6:1-6)

16 Yesu mwaya mo muyi w'iNasreti owishukiragamo. Ekiro ky'eSabato* kyabere kyahika, mwingira mo sinakoki* ng'oko abyaga abegere. Mwimana bushana asomere abandũ bw'eKinwa kya Gongo*. **17** Mwahabwa mubungo w'ekitabo kya muminyeretsi* Isaya, naye mwabungulawo. Mwahikira ahashakirwe hathi:

18 «oMũthima wa Nyinya-kowethũ ali kw'ingye.

Kushangwa amanyishombola nyigende nyikangiritsye eNgũlu

Mbũya ko batsene.

Amanyithũma nyifulire bo bali mo muliki omwatsi ko baminũlwa.

N'esombumi natho ko sa lola.

Na bobanubibwa babye n'iyibwara.

19 N'ifulira abandũ b'omwatsi k'omwaka amahika wo Nyinya-kowethũ w'akanganiamo obũbũya bũwe ko bandũ.^e»

20 Enyuma kw'aho Yesu mwabungabunga ekitabo mwahakyo omukoli w'omo sinakoki* mwayikala. N'abandũ boshi babya bikere mo sinakoki* eyo mobamũhandako amesho.

21 Aho Yesu mwathanga ibwirabo athi: «aMashako Abuyirire* mwamonvwa wo nyithoka ibasomera amabererera munobwire.»

22 Abandũ boshi bagenda abamogera Yesu n'ishweka bushana n'ebinwa bibũya ebyo agenda anegen. Mobathanga inegen bathi: «Oyu ndi ni mugala wa Yosefa!»

23 Yesu mwabwirabo athi: «Nyetsi kundu mwandanyithega mo mugani ono, owanegenire athi: “Mũshake, yilamyeye wowene!” Kandi mwanyibwira mũthi: “Mothwonvwa ebyoshi wakolaga iKaperenaũmu, kolabyo n'omo muyi enyu ono.”» **24** Mwashũba bwirabo kandi athi: «Kwenene hathali muminyeretsi* yo unakokibwa kubũya ko wabo. **25** Kwenene enyibabwira nyithi mo kihũgo ky'iIsiraeli mwabyaga bashũmbakatsi bangi mo mugũlu w'oMuminyeretsi Eliya. Mo mugũlu oyo envũla moyamala miaka ishathu na myetsi ndathũ bũthawa. Mokwabya nzala nzibũ mo kihũgo kyoshi.^f **26** Mo bashũmbakatsi boshi abo Gongo mwathathũma Eliya awathikye mugũma wa kũbo. Hewethuwe mwamũthũma kũ mugũma w'oko muyi w'iSarepata mo kihũgo ky'eSitona.^g

^e 4:19 Soma Isaya 61:1-2.

^f 4:25 Soma 1Bami 17:1-7.

^g 4:26 Soma 1Bami 17:8-16.

27 «Kandi mo kihugo ky'iIsiraeli mwabyaga babenzi bangi mo mugulu w'omuminyeretsi* Elisha. Hewethuwe mohathabya n'omuguma wa kubo walamibawa, he Namani musha w'omo kihugo ky'eSuriya.^h»

28 Abandũ boshi bo babyaga mo sinakoki* eyo babere bonvwa ebyo mobakapikira. 29 Mobimana bamaligitha Yesu mo muyi, bamamukurira ko kathwa k'omuyi oyo abyaga ahimbireko. Niabashondya bamukunire mo muthiri. 30 He Yesu mwasheshera mo kathi kathi kabo amayigendera.

Yesu abinga mutsimu ku mundu

(Mar 1:21-28)

31 Honyuma kw'aho Yesu mwandagalira mo muyi w'iKaperenaumu mo kihugo ky'iNgalilaya. Ekiro ky'eSabato* kyabere kyahika mwakangiritsya abandũ. 32 Abandũ mobashweka kutsibu bashunga emikangiritsye yiwe, kushangwa ebinwa biwe byabyaga nibishikire.

33 Mo sinakoki* eyo mwabyaga mundu nialiko mutsimu. Omundu oyo mwahambala kutsibu athi: 34 «Ahaaa! Yesu w'iNasareti mbe uthushondyako ki? Wahikaga bushana n'ithubihya? Nyikwetsi kubuya. Iwe ũli Mubuyirire* wathumawa na Gongo!» 35 Yesu mwakemera kutsibu omutsimu oyo athi: «Tsira! Na ũthoke ko mundu oyu!» Aho n'aho omutsimu mwahuma omundu oyo yo ahishi mo kathi k'abandũ, mwamuthokako buthamwagatsya.

36 Abandũ boshi mobashweka kutsibu niababwirana bathi: «Kinwa mũhanda ki eki? Kuthyo omundu oyu, abinga emitsimu ko bandu mo maka n'akagala athi ithoke kũbo aho n'aho naro niyathoka!» 37 Bushana n'ebyo engulu ya Yesu moyagenda mo kihugo kyoshi ekyo.

Yesu alamyamba bakoni bangi

(Mat 8:14-17; Mar 1:29-34)

38 Yesu mwathoka mo sinakoki* eyo mwaya omwa Simoni. Abere ahikamo mweya nyatsala wa Simoni niathithimana bushana n'akapururu. Mobashaba Yesu amulamye. 39 Yesu mwunama niabindukire eyiri omukatsi oyo, mwakemera akapururu ako, nako kamamulika. Aho n'aho omukatsi oyo mwimana n'ithekerabo kalyo.

40 Eritsuba lyabere lyalenga mobaletthera Yesu yo abandũ boshi bobagalwa n'amagali minamina. Yesu mwagenda ahira ko buli mukoni wa kubo kw'eminwe n'imulamya. 41 N'emitsimu moyathoka ko bandu bangi nieyihambala yithi: «Iwe ũli Mugala wa Gongo*!» Hewethuwe Yesu mwakemeraro n'ikagaro ithanegenaga, kushangwa yabyaga niyetsi ko ni Kirisito*.

^h 4:27 Soma 2Bami 5:1-14.

Yesu afula eNgulu Mbuya mo so sinakoki

(Mar 1:35-39)

42 Bwabere bwakya, Yesu mwathoka mo muyi mwaya ahathali bandu. Omuhindano mwathanga imushondya. Babere bamushungako mobashondya imukikira bushana athashuba shigabo. **43** Hewethuwe Yesu mwabwirabo athi: «Litholere nyifule eNgulu Mbuya y'oBwami bwa Gongo* y'omo yindi miyi naro. Kushangwa Gongo anyithamaga bushana n'ekyo.»

44 Aho Yesu agenda afulira abandu b'eNgulu Mbuya y'omo so sinakoki* s'omo kihugo ky'iYuteya.

Yesu ashombola abiga buwe bambere

(Mat 4:18-22; Mar 1:16-20)

5 ¹Kiro kiguma, Yesu abyaga n'imene emusike w'engetsi y'iNgenesareti.^a Omuhindano wa bandu bangi babyaga niabamugindiritsya bali abashondya ionvwa eKinwa kya Gongo*. ²Mwashunga matho abiri emusike w'engetsi, abarobi nibamathoka mwo, niabashuga ehikira hyabo. ³Yesu mwashambira mu bwatho buguma bw'oko matho w'abyagaho. N'obwatho obo bwabyaga bwa Simoni, Yesu mwamubwira athi: «Funda obwatho b'omo ngetsi hale hake n'emusike.» Mwikala mo bwatho obo n'ithanga ikangiritsya omuhindano wa bandu.

⁴Abere amamala ikangiritsya mwabwira Simoni athi: «Funda obwatho bo ahali metsi male, mugushe ehikira hyenyu murobe ko mahere.» ⁵Simoni mwamushubitsya athi: «Mukangiritsya, mothuroba mo kiro kyoshi he mothuhina. He kushangwa wowamanegenana nyagusha ehikira.»

⁶Mobagusha ehikira mo ngetsi. Mobitha mahere mangi kutsibu ihika ko kika ehikira hyabo niehishondya ibereka. ⁷Mobakohetsya balikyabo bo babyaga mo bundi bwatho bahike bangirirebo. Balikyabo babere bahika mobotsutsya amatho abiri woshi hofi bashende. ⁸Simoni Petero abere ashunga ebyo, mwafukama embere sa Yesu. Mwanegenana athi: «Nyinya-kowethu, yifunde hale nangye, kushangwa nyiri mukoli w'ebitsibu!» ⁹Simoni haguma na balikyabo boshi mobashweka kutsibu bushana n'obungi bw'amahere bithaga.

¹⁰Yakobo na Yoani bagala ba Sebetayo barobi balikyabo Simoni, nabo mobashweka kutsibu. Hewethuwe Yesu mwabwira Simoni athi: «Uthubahaga! Ithoka munobwire wabya murobi wa bandu.»

¹¹Aho, mobashubitsya amatho wabo emusike w'engetsi. Mobashiga ebyoshi n'ikwama Yesu.

^a 5:1 Engetsi y'iNgenesareti yona ngetsi y'iNgalilaya.

Yesu alamyā mubenzi

(Mat 8:1-4; Mar 1:40-45)

¹² Yesu abere ane mo muguma w'emiyi y'ekihugo ekyo, mohahika munda aliko bibenzi ko mubiri woshi. Omunda oyo abere ashunga Yesu mwafukama embere siwe n'obusu mobwahika ahishi n'imushaba kutsibu athi: «Eh Nyinya-kowethu, wamashasha wanganyilamyā.» ¹³ Yesu mwalambula eminwe mwamukolako n'inegena athi: «Nyishashire; ulame.» Aho n'aho ebibenzi ebyo mobyamuthokako. ¹⁴ Yesu mwamuhamura athi: «Uthabwiraga munda bushana n'ebi. Hewethuwe ugende uyayikangye ko muheri*. Honyuma kw'aho uhulukye ebihembo ng'oko omugomba wa Musa ahamulire, kw'ikangania ko wamalama.^b»

¹⁵ Mokithaleka engulu ya Yesu ithagenda mo bandu. Bandu bangi mobagenda abahindana bushana bonvwe ebyo Yesu agenda anegenā na kandi balamibwe amakoni wabo. ¹⁶ Hewethuwe Yesu agenda ayihigula kubo, n'iya handu hathali bandu bushana n'iyashaba Gongo.

Yesu alamyā omukoni w'amakonongola

(Mat 9:1-8; Mar 2:1-12)

¹⁷ Kiro kiguma Yesu niakangiritsya* bandu. aBafarisayo* n'abakangiritsya b'omugomba* baguma bathokaga mo miyi yoshi y'ekihugo ky'iNgalilaya, ky'iYuteya, n'omo muyi w'iYerusalemu nabo babyaga bikereho. Yesu agenda alamyā abakoni mo maka wa Nyinya-kowethu Gongo.


¹⁸ Bandu baguma mobahika ni bahekire kipoyi kiriko mukoni w'amakonongola. Niabashondya imwingitsya mo nyumba bamuhire embere sa Yesu. ¹⁹ He mobabusha nzira y'imutsukyamo bushana n'abandu bangi. Bushana n'ebyo mobashamba ko luthwe lw'enyumba eyo.^c Mobathokya ko bikayi, bamamukimya mo bandu embere sa Yesu nianali ko kipoyi kiwe. ²⁰ Yesu abere ashunga olwikiritsyo lw'abandu abo, mwabwira omukoni oyo athi: «Mwiraye ebitsibu byawe byamaganyirwa!»

²¹ Abakangiritsya* b'omugomba n'aBafarisayo* abo mobathanga iganitsya n'iyibutsya bathi: «Oyu ni ndi yo uhatsya ku Gongo? Ni ndi yo wangaganyira ebitsibu athali Gongo yowene?»

²² Yesu mwaminya emiganitsye yabo mwabutsyabo athi: «Bushana na ki omuganitsya muthyo mo mithima enyu? ²³ Ingo munyibwire! Ni ki

^b 5:14 Omunda amalambwa ebibenzi anaya yikangania ko baheri kw'alamire. Agenda akola ebyo kushangwa bashube mutsige mo kathi k'abandu. Soma Balawi 13:45-46; 14:1-32.

^c 5:19 aBayuta baguma abanabya bahimba abanalambika amakombamoya w'oko nyumba na ko makombamoya ayo wo bagenda bahirako ebikayi ebyo.



Abandũ abakimya mukoni ko luthwe lw'enyumba (5:19)

kyo kyolo inegenamũ: “Wamaganyirwa ebitsibũ byawe,” kutse inegenamũ: “Hangana ugende”? ²⁴Enyishondya mũminye kw'ingye Mũgala w'oMũndũ* nyiwithe amaka w'iganyira ebitsibũ hano ishi.» Honyuma kw'aho Yesũ mwabwira owamakonongola athi: «Ingye ngyo nyikubwira nyithi: Wimana! Tsimba ekipoyi kyawe uhuba eka.» ²⁵Konakathambi ako omũndũ oyo mwahangana embere s'abandũ mwatsimba ekipoyi ekyabyaga agonzereko mwashuba ewe nianemusingya Gongo. ²⁶Abandũ boshi bamashukumana, bamatsimbwa n'obuba, bamasingya Gongo, niabanegenamũ bathi: «Munobwire thwamashunga ebithikothiko!»

Yesũ abwira Lawi amukwame

(Mat 9:9-13; Mar 2:13-17)

²⁷Enyuma kw'aho, Yesũ mwathoka mo nyumba omo. Mwashunga ku mukarani mũguma w'ekoli eritsina liwe ni yo Lawi.^d Lawi oyo abyaga n'ikere ahagenda alihisira ekoli. Yesũ mwamubwira athi: «Nyikwame.» ²⁸Lawi mwahangana, mwashiga ebyoshi n'ikwama Yesũ.

^d 5:27 Lawi oyo yo na Matayo.

29 Honyuma kw'aho Lawi mwakolera Yesu yo linye linene mo nyumba yiwe. Mo nyumba eyo mwabyaga bakarani bangi b'ekoli na bandi bandu bagenda abalya haguma nabo. **30** aBafarisayo* n'abakangiritsya* b'oMugomba b'omo kikembe ky'aBafarisayo abo babere bashunga ebyo mobayifweba, n'ibwira abiga* ba Yesu bathi: «Ni ki kyo kireka omulya n'ishoma haguma n'abakarani b'ekoli n'abakoli b'ebitsibu?» **31** Yesu mwashubitsyabo athi: «Abatsibuhire bathashondya mushake hewethuwe ni abakoni bobanamushondya. **32** Ingye nyithahikaga ibirikira abathunganene embere sa Gongo, hewethuwe nyahikaga ibirikira abakoli b'ebitsibu bushana babinduke bathoke mo bitsibu byabo.»

aBafarisayo ababutsya Yesu bushana n'iyima akalyo

(Mat 9:14-17; Mar 2:18-22)

33 aBafarisayo* mobabwira Yesu bathi: «Abiga* ba Yoani n'abuwethu kuthyo abanagenda abayima* akalyo n'ishaba. Hewethuwe abuwawe ibo abanagenda abalya n'ishoma.» **34** Yesu mwashubitsyabo athi: «Mwangabwira abo bathabirikirwa ko buheruki muthi bathalyaga n'oyo uthaherukya niakinali nabo? Kiro! **35** Ebiro byandahika oyuthaherukya andathokibwa mubo. Ni mo biro ebyo mobandagenda abayima* akalyo.»

36 Yesu mwashuba tsirabo omugani ono athi: «Hathali muntu yo wangatsa kibandiko ko lukimba luhyaluhya n'ilandirakyo ko lukimba lukulire. Kushangwa omuntu amayira athyo niamaberenga olukimba luhyaluhya, n'ekibandiko kyo kithathokako kithangatsimbana n'olukimba lukulire. **37** Kandi hathali muntu oyo unahira etifayi* nyihanyihya mo mahwehwe wa kera.^e Oyo wangakola athyo angaleka etifayi* nyihya niyaberenga amahwehwe, etifayi* niyashesheka n'amahwehwe niabiha. **38** Hewethuwe, litholere etifayi nyihanyihya nyahirwa mo mahwehwe mahyamahya. **39** Kandi hathali muntu wamashoma ko tifayi yihire yowangashuba shondya tifayi ya kera. Kushangwa nianegeni athi: “Eyihire yo yikwirire kutsibu!”»

Yesu yo Mukulu w'eSabato

(Mat 12:1-8; Mar 2:23-28)

6 **1** Kiro kiguma ky'eSabato*, Yesu agenda atsuka mo mashwa w'engano. Abiga* buwe bagenda abatsa ebikumba by'engano, mobahonolabyo mo minwe na mobalyaro.^a

^e **5:37** Amahwehwe aBayuta bagenda bahangikamo etifayi abyaga mahya-mahya kushangwa amahwehwe ayo athangabereka mo ndambi etifayi yamahya. Kushangwa amahwehwe wa kera abyaga niahera olohire niangaberekera busha.

^a **6:1** Ko Bayuta omuntu ali atsuka mw'ishwa lirimo kalyo kerire ali awirire niatsa ebyangalya. Ikola bathyo buthabyaga bwitsi kubo. Soma Ibuka 23:25-26.

²Bafarisayo* baguma mobabwirabo bathi: «Imwe! Bushana na ki omukola ebyo oMugomba ethu ahangire ikola ekiro ky'eSabato*?»

³Yesu mwashubitsyabo athi: «Muthahera mwathasoma ebyo oMwami Tawiti akolaga mo ndambi iye n'abandu abyaga nabo babere bawira?

⁴Mwathingira mo Nyumba ya Gongo, n'ithola emikati yo bandu bahembaga Gongo? Ndi mwalyaro n'iha abandu abyaga nabo, naho, abaheri* basha n'ibo bahamulirwe irya emikati yiri ng'eyo!^b»

⁵Honyuma kw'aho Yesu mwabwirabo athi: «Ingye Mugala w'oMundu* ingy'e Mukulu w'eSabato*.»

Yesu alamy'a omundu w'amakonongola ekiro ky'eSabato

(Mat 12:9-14; Mar 3:1-6)

⁶Kindi kiro ky'eSabato* Yesu mw'ingira mo sinakoki mwakangiritysa abandu. N'omo sinakoki eyo mwabyaga mundu muguma ekiganza kiwe ky'amalyo ni kikonongokire. ⁷Abakangiritysa* b'oMugomba n'aBafarisayo* bagenda abayithegeretsya nga Yesu alamy'a omundu oyo mo kiro ky'eSabato*. Bakolaga bathyo kushangwa babone kinwa bangamusitakira. ⁸Hewethuwe Yesu mwaminya emiganitsye yabo. Mwabwira omundu w'ekiganza kikonongokire athi: «Hangana wimane mo kathi kathi k'abandu.» Mwahangana amayimana mo kathi kabo.

⁹Honyuma kw'aho Yesu mwabwirabo athi: «Enyibabutsya nyithi: oMugomba ethu ahamulire ikola ki ekiro ky'eSabato*? Ikola bibuya kutse ikola bibi? Ilamy'a mundu kutse imwitha?»

¹⁰Yesu mwathimbya ko boshi kw'amesho, mwabwira omundu oyo athi: «Lambula ekiganza kyawe.» Naye mwalambulakyo, n'ekiganza kiwe mokyalama. ¹¹He abakangiritysa b'oMugomba abo n'aBafarisayo mobakapikira. Bamathanga ibutsania nga kuno bayire Yesu yo bathi.

Yesu ashombola abathumwa buwe ikumi na babiri

(Mat 10:1-4; Mar 3:13-19)

¹²Mo biro ebyo Yesu mwirukira ko kithwa bushana n'iyashaba Gongo. Mobwamamukerayo nianemushaba. ¹³Bwabere bwakya Yesu mwabirikira abiga* buwe, mwashombola mubo mo ikumi na babiri mwalukabo mo bathumwa*. ¹⁴N'abathumwa abo babano: Simoni, yo Yesu ahaga eritsina lya Petero, na Ndereya mugala wabo, na Yakobo na Yoani, na Filipino na Baritolomayo, ¹⁵na Matayo na Tomasi, Yakobo mugala wa Alufayo na Simoni w'omo kikembe ky'aBaselote, ¹⁶na Yuta mugala wa Yakobo na Yuta Isikariote, yo wahotheraga Yesu.

^b 6:4 Soma 1Samwera 21:1-7.

Yesu akangiritsya n'ilamyabakoni

(Mat 4:23-25)

17 Yesu mwandagala ithoka ko kithwa haguma n'abathumwa buwe abo. Abere ahika habothebothe mwimana. Mweya ho kikembe ky'abiga* buwe na bandi bandu bangi niabahuluka mo kihugo kyoshi ky'iYuteya niYerusalemu, n'omo bihande by'emiyi y'eTiro n'eSitona emusike w'engetsi. 18 Abandũ abo bahikaga bushana ni hulikiritsya Yesu, n'ilamibwa amakoni wabo. N'abo bagenda abanubibwa n'emitsimu nabo kuthyo mobalamibwa. 19 Abandũ boshi bagenda abashondya imukolako, kushangwa akagala kagenda akamuthokamo n'ilamyabo.

Igashanirwa n'ithakirwa

(Mat 5:1-12)

20 Yesu mwathimbya ko biga* buwe kw'amesho n'ibwirabo athi:

«Mwamagashanirwa imwe batsene,
kushangwa oBwami bwa Gongo* ni buwenyu.

21 Mwamagashanirwa imwe muwirire lino,

kushangwa mwandugutha.
Mwamagashanirwa imwe omulira munobwire,
kushangwa mwasheka.

22 «Mwamagashanirwa imwe, omugulu abandũ bababayire, babathindire, ababahangya, ababathonga, bushana na ngye Mũgala w'oMũndũ*.

23 Omugulu ebyo byandagenda ebibahikira, mugende omuyishalaganda mo lumogo, kushangwa luhembo lunene lubalindire mo lubula. Ni kuthyo obwishe-kulu wabo bagenda abanubya abaminyeretsi* n'abandũ.

24 «He imwe bashoki muli bahanya,
kushangwa mwamalire ibona obutseme bwenyu.

25 Nemwe momuguthire lino, muli bahanya,

kushangwa mwandafwa nzala.
Nemwe momusheka lino, muli bahanya,
kushangwa mwandabya mo kiriro na mwandalira.

26 «Muli bahanya mo ndambi abandũ boshi ababahalamba, kushangwa ni bathyo ko bw'ishe-kulu wabo bagenda abahalamba abaminyeretsi b'amabesi.»

Mugende omutsigira esonzigu senyu

(Mat 5:38-48; 7:12a)

27 Yesu mwashuba negena athi: «Hewethuwe imwe momunyahulikiritse, bino byo nyibabwira: so nzigu senyu mugende omutsigiratho. N'abo bobanababaga mugende omukolerabo bibuya, 28 abo banabathakira

mugende omushabirabo Gongo agashanirebo. N'abo babanubya, mugende omushabirabo Gongo. ²⁹ Omundu amakubanda ikofi kw'ithema iguma, umuthege n'erindi. N'omundu amakunyaga ekoti umushigire n'esimisi awe. ³⁰ Omundu amakushaba kindu uthamwimagakyo, kutse amakunyaga kindu kyawe uthashuba mushabakyo. ³¹ Ebyo omushondya abandu babakolere, nemwe kuthyo mukolerebyo bo.

³² «Mwamagenda omutsigira bobanabatsigira kuroshi, mwangabona isimwa lihi? Hathali! Ndi n'abakoli b'ebitsibu nabo abanatsigira bobatsigirebo! ³³ Kandi mwamagenda omukolera ebibuya bo banagenda ababakolerabyo kuroshi, isimwa lihi lyo mwangabona? Ndi n'abakoli b'ebitsibu nabo abanakolerana bathyo! ³⁴ Kandi mwamagenda omubweka bo mwetsi ko babafuha isimwa lihi mwangahabwa? Ndi n'abakoli b'ebitsibu nabo abanabweka bobangafuhabo!

³⁵ «Hewethuwe imwe mugende omutsigira esonzigu senyu. Mugende omukoleratho bibuya. Kandi mugende omubweka buthahirayo maha w'ishubulitsibwa. Aho nimwabona luhembo lunene, kandi mwabya kundu kundu bana ba Gongo ow'elugulu w'ebiyoshi. Kushangwa iye anakolera ebibuya ko bobathasima n'abakoli b'ebitsibu. ³⁶ Mugende omushashirana nga Thatha wenyu kw'anabashashira.»

Muthagenda omulola ko bibi by'abandi kuroshi

(Mat 7:1-5)

³⁷ Yesu mwashuba negena athi: «Muthagenda omulola ko bibi by'abandi bandu, nemwe kuthyo bathindagende abalola ko bibi byenyu. Muthagenda omuha abandi bandu bo malipisi, nemwe kuthyo muthindahabwe malipisi. Hewethuwe mugende omuganyirana nemwe kuthyo mwandaganyirwa. ³⁸ Mugende omuhana nemwe kuthyo bandabaha. N'ebyo mwandahabwa byandabya nibilengire kubuya, nibishokire, nibithenganibwe, kandi nibyotswire kubuya mo bithonga byenyu. Ng'oko munalengera abandi, nemwe kuthyo ko Gongo andabalengera.»

³⁹ Kandi Yesu mwatsirabo omugani ono athi: «Embuni yanganashondolera eyindi mbumi? Ihi! Amayira athyo ababiri boshi kundu kundu nibathogera mo kyuna! ⁴⁰ Omwiga* athalengitsye omukangiritsya guwe. Hewethuwe omwiga* yo wamamala ikangiritsibwa kubuya niye yo wangabya ng'omukangiritsya guwe.

⁴¹ «Bushana na ki ushanga ko kathi kali mo lisho lya mugala enyu, he uthali ogutsomana omuthi owali mo lisho lyawe? ⁴² Bushana na ki ubwira mugala enyu uthi: “Leka nyithokye akathi ko kali mo lisho lyawe,” hewethuwe mo liwawe nimukinali muthi? Iwe muyimbya! Thanga

wathokya omuthi owali mo lisho lyawe, nimo walola kubuya ng'oko wathokya akathi akali mo lisho lya mugala enyu!»

Omundu anaminyikala ko minegenere yiwe

(Mat 7:16-20; 12:33-35)

⁴³Kandi Yesu mwanegeni athi: «Hathali muthi akwirire w'angaheka biguma bibi, kutse hathali muthi mubi w'angaheka biguma bikwirire. ⁴⁴Obuli muthi anagenda aminyikala ko biguma byawo. Abandu bathoha biguma bya muthi w'omutini ko migando. Kutse by'emisabibu* ko mishakishaki. ⁴⁵Na kuthyo mundu mubuya anagenda anegeni binwa bibi byo bithoka mo muthima gawe. Hewethuwe omundu mubi iye, ebibi anagenda anegeni ebinathoka mo bibi byo byotswire mo muthima gawe. Kushangwa obun bw'omundu obunanegeni byo byotswire mo muthima gawe.»

Mugani wa bahimbi babiri

(Mat 7:24-27)

⁴⁶Yesu mwashaba negeni athi: «Bushana na ki omunyahula muthi: “Nyinya-kowethu, Nyinya-kowethu,” kandi nimuthali omunakola ebyo nyibabwira? ⁴⁷Nyabakangya nga kw'ashoshire omundu yo unyikwamire na yo uhulikiritsya ebinwa byaye n'ikola nga ko binegenire. ⁴⁸Ashoshire nga mundu ahimbaga nyumba. Mwathanga ithima kutsibu mo kithaka ihika okw'ibwe. N'okwibwe eryo kwahiraga omusingi ahimbagako enyumba. Envula y'ekithi yabere yawa olwitsi molwotsula n'ametsi walo mwayihuma ko nyumba eyo hewethuwe enyumba eyo mo ithathengana kushangwa niyitsibuhire. ⁴⁹Hewethuwe omundu yo wonvwa ebinwa byaye buthakola ng'oko binegenire, ashoshire mundu yo wahimbaga enyumba yiwe ko kithaka buthathima aho ahira omusingi. Olwitsi lwabere lwotsula ametsi walo mwayihuma ko nyumba eyo aho n'aho moyathera nishambukala loshi.»

Yesu alamyamba mugombe w'omukulu w'abashirikani b'abaroma

(Mat 8:5-13)

7 ¹Yesu abere amamala inegeni ebinwa byoshi eby'abwiraga abandu bagenda abamuhulikiritsya, mwaya mo muyi w'ikaperenamu. ²Ko muyi oyo kwabyaga mukulu muguma w'abashirikani b'abaroma. Omukulu oyo abyaga awithe mugombe yo atsigire kutsibu. Omugombe oyo abyaga niathohire. ³Omukulu oyo mwonvwa ebyo bandu bagenda abanegeni ku Yesu. Aho mwathumira Yesu yo bangumwa baguma ba Bayuta bamushabe ahike alamyamba mugombe gawe. ⁴Abangumwa abo babere bahika ho Yesu abyaga, mobamushaba kutsibu n'ingeni bathi: «Omundu oyu atholere

umukolere ebyo akushaba, ⁵kushangwa iye anatsigira oluganda lwethu, kandi iye yo wathuhimbiraga esinakoki*.»

⁶Aho Yesu mwagenda n'abangumwa abo. Abere ahika hofi n'enyumba y'omukulu, omukulu oyo mwathuma bira buwe bamubwirire Yesu bathi: «Nyinya-kowethu, uthayiluhaya ihika, kushangwa ingye nyithatholere iwe wingire omwaye. ⁷Kyo kithaleka nyithayakushondya ngyowene; hewethuwe, iwe negena kinwa kiguma kuroshi omugombe aye alama. ⁸Kushangwa na ngye nyiwithe bakulu bobananyithegeka. Na ngye kuthyo, nyiwithe bashirikani bo nyinathegeka. Nyamabwira muguma nyithi: "Genda!" Niagenda. Na nyamabwira gundi nyithi: "Hika!" Naye niahika. Kandi, nyamabwira omugombe aye nyithi: "Kola kino!" Naye niakolakyo.»

⁹Yesu abere onvwa ebyo mwashweka bushana n'omukulu w'abashirikani oyo. Mwabindikira omuhindano w'abandu babyaga bamukwamire mwanegena athi: «Enyibabwira, n'omo kihugo kino ky'iIsiraeli ndetsi nyashunga muntu wa lwikiritsyo lunene ng'olu.»

¹⁰Abo bathumawa n'omukulu w'abashirikani mobashuba eka. Mobeya omugombe nialamire.

Yesu amalubukya omwana w'omushumbakatsi

¹¹Enyuma kw'aho Yesu mwaya mu muyi muguma owagenda ahulwamo Naina. Abiga* buwe n'omuhindano manene mobagendania naye. ¹²Abere ahika hofi n'olukyo lw'oruba lwabyaga luthimbire ko muyi, mwahindana n'abandu bo bagenda abayatha ekinda kya mutsana. Omutsana oyo abyaga kyusha kya mushumbakatsi. Bandu bangi b'omo muyi oyo nibaherekeretsye omushumbakatsi oyo. ¹³Nyinya-kowethu abere ashunga omushumbakatsi oyo mwamufwira shashi kutsibu, mwamubwira athi: «Uthaliraga!»

¹⁴Yesu mwayifunda hofi n'esanduku eyo, mwakola kuro. Abandu babyaga bahekirero mobimana. Yesu mwanegena athi: «Mutsana, enyikuhamura, buka!» ¹⁵Omutsana yo wabyaga afwire mwabuka. Mwikala mwathanga inegena. Yesu mwamuhereetsya nyinya gwe.

¹⁶Abandu boshi mobafwa buba, mobasingya Gongo niabanegena bathi: «Muminyeretsi* mukulu amahuluka mo kathi kethu!» Mobashuba negena bathi: «Gongo mwahika ishabela abandu buwe!» ¹⁷Omwatsi w'ebyo Yesu akolaga mwagenda mo kihugo kyoshi ky'iYuteya n'omo bindi bihugo byoshi byabyaga bithimbire kuko.

Yoani Mubatisya athumira abiga buwe bo Yesu

(Mat 11:2-19)

¹⁸Ebinwa byoshi ebyo abiga* ba Yoani mobamufurirabyo. Bushana n'ebyo Yoani mwabirikira muho mo babiri. ¹⁹Mwathumabo eyiri Nyinya-kowethu

bamubutsye bathi: «Iwe, we Masiya* wahikire? Kutse thulinde undi?»
 20 Abiga abo mobahika ho Yesu abyaga. Mobamubwira bathi: «Yoani Mubatisya amathuthuma yo guli thukubutsye thuthi: “Iwe, we Masiya* wahikire? Kutse thulinde undi?”»

21 Mo ndambi eyo Yesu mwalamya bandu bangi bo bagenda abagalwa n'amakoni, n'abo babyaga birema, n'abo babyagako emitsimu. Na mwaha kuthyo esombumi s'olukogo lw'ishuba lola. 22 Honyuma kw'aho Yesu mwashubitsya abiga ba Yoani athi: «Mugende muyabwire Yoani ebinwa mwamashunga n'ebyo mwamwonvwa. Esombumi sahera esilola, n'ebirema byahera ebigenda, n'ababenzi abalamibwa, n'abathwithwi bahera abonvwa, n'abaholi abalubukibwa, n'abatsene abafurirwa eNgulu Mbuya.^a 23 Amagashanirwa omundu yo uthindahetsye olwikiritsyo lawe mw'ingye!»

24 Abiga ba Yoani abo mobashubula. Yesu mwathanga ibwira muhindano w'abandu omwatsi wa Yoani athi: «Mwayaga mo mbwarara* niomuyashungayo ku ki? Ni lusheke lo lunathenganibwa n'omuyaga? Kiro! 25 Ewo mwayaga lola ku ki? Mundu wambithe ngimba s'ekitsiro kinene? Kiro! Abo banagenda abambala esongimba s'ekitsiro kinene n'ibya mo bushoki, mo manyumba w'obwami mo bikere! 26 Mwayaga lola ku ki? Muminyeretsi*? Ega, enyibabwira iye alengitsye muminyeretsi*. 27 Na bushana n'oyo bishakirwe mo Mashako Abuyirire athi:

“Mwonvwe! Nyathamaga omugendi aye anyishondolere,
 bushana akukometsye enzira.^b”

28 «Enyibabwira, mo bandu boshi b'omo kihugo kino, muthali yogulengitsye Yoani. Hewethuwe namo bine bithyo omuke kutsibu mo Bwami bwa Gongo*, oyo ni mukulu kw'imulenga.» 29 Abandu boshi n'abakarani b'ekoli bobahulikiritsaya amakangiritsya wa Yoani, mobaminyako ko Gongo anagenda akola ebithunganene ihika ko ndambi mobabatisibwa na Yoani. 30 Hewethuwe aBafarisayo* n'abakangiritsya b'omugomba* ibo mobathinda ebyoshi Gongo ashondaga ikolerabo. Bushana n'ekyo mobayithindira ibatisibwa na Yoani.

31 Yesu mwashuba negena athi: «Abandu ba munobwire nyangalinganiabo na ndi? Na bashoshekanibwe na ndi? 32 Bashoshire ng'abana bikere mo mbuga niabathelemeranako bathi:

“Mothubabuhira akapuli momuthali omushatha!
 Mothubwimbira nyimbo sa kiriro momuthali omulira!”

33 «Kushangwa Yoani Mubatisya mwahika nianayima akalyo, niayima n'ishoma tifayi* ngendo nyingi. He momwagenda omunegena muthi:

^a 7:22 Soma Isaya 35:5-6; 61:1.

^b 7:27 Soma Malaki 3:1.

“Aliko mütsimu.” ³⁴ Ingye Muga w'oMundu* nyabere nyahika, enyirya n'ishoma, nemwe omunegena muthi: “Shunga omundu oyu! Ni wa kahehu kandi mukundirya, kandi ni mwira w'abakarani b'ekoli n'abandi bakoli b'ebitsibu.” ³⁵ He abandũ boshi abikiritsye mo bwenge bwa Gongo, betsi ko obwenge buwe buthunganene.»

Yesu aganyira ebitsibu bya mukatsi muguma

³⁶ Kiro kiguma Mufarisayo* muguma mwabirikira Yesu ahike alye ko kalyo mo nyumba yiwe. Yesu mwingira mo nyumba y'oMufarisayo* oyo mwikala.^c Na mwathanga irya. ³⁷ Mo muyi oyo mwabyaga mukatsi muguma mukoli w'ebitsibu. Omukatsi oyo abere onvwa ko Yesu alya ko kalyo mo nyumba y'oMufarisayo* oyo, mwahikamo niahekire murangi wa marasi wa kitsiro kinene. ³⁸ Mwimana enyuma ya Yesu hofi n'ebishando



*Mukatsi muguma mukoli w'ebitsibu anabya ebisando
bya Yesu mo mishonia yiwe (7:38)*

^c 7:36 aBayuta abanabya bali abalya abanayilambika nibagemere ko ngokola y'amalembe, n'omuthwe nialolitsye ko lugali n'ebishando nibilolire embuga. Soma mulondo wa 38.

biwe niane mulira. Emishonia yiwe moyathanga igeretsya ebishando bya Yesu. Honyuma kw'aho mwashangulabyo mo nzwiri siwe. Mwafumbatha ebishando bya Yesu n'ihakabyabyo amarasi ayo.^d

³⁹ oMufarisayo* oyo yo wabirikiraga Yesu abere ashunga ebyo, mwathanga inegeni mo muthima guwe athi: «Omundu oyu angabere maminyeretsi* kundu, angaminyire omukatsi yo umukolokolako nga ali athi. Kandi angaminyire k'omukatsi oyu ni mukoli w'ebitsibu.»

⁴⁰ Yesu mwabwira oMufarisayo oyo athi: «Simoni, nyiwithe kinwa ky'ikubwira.» Simoni naye mwashubya athi: «Mukangiritsya, negeni.»

⁴¹ Yesu mwanegeni athi: «Kwabyaga bandu babiri bo babyaga n'omwinda wa mundu muguma. Muguma wa kubo abyagako mwinda wa tinari^e magana athano, n'ogundi abyagako mwinda wa tinari makumi athano.

⁴² Abandu babiri abo, ng'oko bathabyaga n'obuthoki bw'erifuha eminda eyo, oyo wabwekagabo aho mwashashira ababiri abo. Ewo mo bandu babiri abo, ni ndi yowatsigiraga kutsibu omwindiki?» ⁴³ Simoni mwashubya athi: «Enyiganitsya nyithi ni yo washashirawa omwinda munene.» Yesu mwamubwira athi: «Wamashubya kubuya.»

⁴⁴ Honyuma kw'aho Yesu mwabindukira eyo omukatsi abyaga, mwabwira Simoni athi: «Wamashunga omukatsi oyu? Monyingira omwawe moguthali umbamba metsi w'inaba ko bishando. He omukatsi oyu, iye amanabya ebishando byaye mo mishonia yiwe, na amashangulabyo mo nzwiri siwe. ⁴⁵ Moguthali unyifumbatha mw'inyiketsya. He omukatsi oyu ho nyithahikira mo nyumba eno, athathangire alika ifumbatha ebishando byaye. ⁴⁶ Moguthali unyihakabya mafutha ko muthwe aye, he iye mwanyihakabya marasi ko bishando byaye.^f ⁴⁷ Bushana n'ekyo, enyikubwira nyithi: namo ebitsibu by'omukatsi oyu ni bingi, hewethuwe nyamaganyira ebyoshi. Ni bushana n'ekyo akangya kw'anyanzire kutsibu. Hewethuwe omundu yo wamalire iganyirwa kuke, ananza kuke.»

⁴⁸ Aho Yesu mwabwira omukatsi oyo athi: «Ebitsibu byawe byamaganyirwa.»

⁴⁹ Abandi bandu bo bagenda abalya haguma na Yesu mobathanga ibutsania ibo kw'ibo bathi: «Oyu ni ndi yo wangaganyira ebitsibu?»

⁵⁰ Hewethuwe Yesu mwabwira omukatsi oyo athi: «Olwikiritsyo lwawe lwamakushabula. Genda mo buholo.»

^d 7:38 Mo mibere y'aBayuta, omundu ali ashondya ikangya ogundi kw'amushikitsye kutsibu agenda amukokya kubuya n'ifumbatha ebishando biwe.

^e 7:41 Tinari: Etinari yabyaga faranga. N'etinari nguma yabyaga niyiringene n'oluhembo lw'omuthobero muguma.

^f 7:46 Ko Bayuta omugeni amahika abanagenda abamukokya mw'imuha metsi w'inaba ko bishando, mu mw'ifumbatha, na omw'imuhaka marasi.

Abakatsi bo bagenda abawathikya Yesu ko mulimo guwe

8 ¹Honyuma kw'aho Yesu mwathimba mo miyi n'omomirongo bushana n'ikangiritsya, n'ifulira abandũ b'eNgũlũ Mbũya y'oBwami bwa Gongo*. Abyaga hagũma n'abathũmwa bũwe ikumi na babiri. ²Kandi abyaga hagũma na bakatsi bagũma, abo athokayako emitsimũ n'ilamyabo makoni. Mo bakatsi abo mwabyaga: Mariya w'omo muyi w'iMangandala, Mariya oyo Yesu mwamuthokyaako mitsimũ irinda, ³na Yane mũka Kusa. Ye Kusa oyo yo wabyaga imanire obushoki bwa Herote. Na mo bakatsi abo mwabyaga Susana, na bandi bakatsi bangi. Ni abakatsi abo bobagenda abahana ko bushoki bwabo mw'iwathikya Yesu n'abathũmwa bũwe.

Mugani w'omuheri w'embutho

(Mat 13:1-17; Mar 4:1-9)

⁴Bandũ bangi bagenda abathoka mo buli miyi, bushana bayahindane na Yesu. Yesu mwatsirabo mugani athi: ⁵«Muheri mugũma mwayabiba mbutho mw'ishwa liwe. Mo ndambi agenda abiba esombutho siwe, mbutho sigũma mosathogera emũsike w'enzira. Abandũ mobalyathangatho, n'emironge moyalyatho. ⁶Esindi mosathogera ko mabwe. Sabere salasha, samũma bushana n'ibũsha metsi mo kithaka. ⁷Esindi mosathogera mo mishaki. Emishaki eyo moyalasha hagũma n'esombutho, moyayindiritsyatho. ⁸Esindi itho mosathogera ko kithaka kikwirire. Sabere sakũla mosaheka bikũmba. Buli kikũmba mokyahaka mbulu igana igana.» Yesu abere amala ibwirabo ebyo, mwanegenana athi: «Yo uwithe mathwi w'ionvwa, onvwe!»

Bushana na ki Yesu asimola mo migani

(Mat 13:10-17; Mar 4:10-12)

⁹Abiga* ba Yesu mobamũbutस्या ng'omugani oyu ashondya inegenana athi ki. ¹⁰Yesu mwashũbitsyabo athi: «Imwe momwahabwa iminya binwa bibishire by'omo Bwami bwa Gongo*. He abandi ibo litholere ninyabwirabo mo migani, bushana

“bagenda abalola, he nibathishunge.

Bagende abahulikya, he nibathigonvwe.”^a»

Yesu akumbulira omugani w'omuheri w'embutho

(Mat 13:18-23; Mar 4:13-20)

¹¹Kandi Yesu mwanegenana athi: «Athya k'omugani ono anegenire: Embutho ni eKinwa kya Gongo*. ¹²Esombutho sathogeraga emũsike

^a 8:10 Soma Isaya 6:9.

w'enzira, sishoshekanibwe n'abandũ bobanonvwa eKinwa kya Gongo*. Honyuma kw'aho eSitani niyahika niyathokyakyo mo mithima yabo, bushana bathikiritsyaya n'ishabũlwa. ¹³N'esombũtho sathogeraga ko mabwe, sishoshekanibwe n'abandũ bobanahũlikiritsya eKinwa kya Gongo* n'ikokyakyo mo lumogo. Hewethuwe eKinwa ekyo kithashika kubũya mo mithima yabo. Abanikiritsyakyo mo kathambi kake kuroshi, erilengwako elinabya lyahikirabo nibamikakyo. ¹⁴N'esindi mbũtho sosathogeraga mo mishaki, sishoshekanibwe n'abandũ bobanonvwa eKinwa kya Gongo*. Hewethuwe eminũbo n'obushoki n'eritsigira ebindũ by'omo kihũgo kino, ebinayindigiritsya eKinwa ekyo mo mithima yabo. Bushana n'ekyo, bathaheka biguma byerire. ¹⁵N'esombũtho sathogeraga mo kithaka kikwirire, itho sishoshekanibwe n'abandũ bobanonvwa eKinwa kya Gongo* n'omũthima akwirire, n'owathunganene. Abo bobanabũka eKinwa ekyo mw'itsitsinia ihika ko kika ky'ihaka biguma.»

Mugani w'etara

(Mar 4:21-25)

¹⁶Yesũ mwashũba negena kandi athi: «Hathali mũndũ yo wanganokya etara n'ishwikaro kithonga kutse ihiraro omwishangingo. Hewethuwe anagenda ahiraro kw'ihango bushana abo bingira mo nyũmba bashunge ekyakakala. ¹⁷Obũli kindũ kibishire kyandabishulwa kubũya kubũya. N'obũli kindũ kyokikoleka mobubishobisho kyandaminyĩkala kubũya kubũya. ¹⁸Bushana n'ekyo muyitheye ko binwa byo mwonvwa! Kushangwa ni omũndũ yo uwithe kindũ yo unahabwa kindi. He oyo uthawithe kindũ andanyagũlwa n'ekyo aganitsya ko awitheko.»

Abagala babo Yesũ na nyinya gũwe

(Mat 12:46-50; Mar 3:31-35)

¹⁹Kiro kigũma bagala babo Yesũ na nyinya gũwe mobayamushondya. Hewethuwe mobathakotsya imuhikako bushana n'omuhindano w'abandũ. ²⁰Abandũ mobabwira Yesũ bathi: «Bagala b'enyu na nyoko bimene embũga banzire nibakushunga.» ²¹He Yesũ mwabwirabo athi: «Bagala bethũ na mali ni bobanonvwa eKinwa kya Gongo* n'ĩkola nga ko kinegenire.»

Yesũ abombetsya embeho n'emibimbi

(Mat 8:23-27; Mar 4:35-41)

²²Kiro kigũma Yesũ mwashambũra mũ bwatho bũguma haguma n'abiga* bũwe. Mwabwirabo athi: «Thũshabũkire ko undi mwishirya w'engetsi.» Nabo mobagenda.

²³Babere banali abatsa engetsi, Yesu mwayatho. Aho n'aho mbeho nzibu moyayihuma ko ngetsi. Ametsi mwathanga ingira mo bwatho, nabo mobabya hofi n'ishenda. ²⁴Mobayifunda ahali Yesu bamamubukya bamanegeni bathi: «Mukangiritsya, Mukangiritsya, thwaha!»

Yesu mwabuka mwakemera kutsibu embeho n'emibimbi, nabyo mobyabombera, mohabya shereri. ²⁵Aho, Yesu mwabutsyabo athi: «Olwikiritsyo lwenyu luli hayi?» Nabo mobubaha n'ishweka kutsibu niababwirana bathi: «Oyu ni munda munda ki? Yo uthegeka n'embeho n'emibimbi nabyo n'ibyamushikya!»

Yesu abinga abatsimu ku munda

(Mat 8:28-34; Mar 5:1-20)

²⁶Enyuma kw'aho, Yesu n'abiga buwe mobashabuka engetsi n'igobeka obwatho mo kihugo ky'aBangerasi mwishirya w'ekihugo ky'iNgalilaya. ²⁷Yesu abere akinali akima mo bwatho, munda muguma w'omo muyi mwayifunda ahali Yesu. Omunda oyo abyagako batsimu. Mu biro bingi niathashubire iambala lukimba, niathashubire ikala mu nyumba, he ko n'oko masinda. ²⁸Abere ashunga Yesu mwahambala, mwawa embere s'ebishando bya Yesu. Mwahambala kutsibu athi: «Yesu, Mugala wa Gongo* yo uli elugulu w'ebyoshi, unyishondya ko ki? Enyikushaba uthanyinubuya!» ²⁹Mwanegeni athyo, kushangwa Yesu abyaga niamathegeka omutsimu oyo athoke ko munda oyo. Omutsimu oyo agenda amunubya ngendo nyingi. Bushana n'ekyo bagenda abamumina mu buhulula n'omo byuma ni mw'atharomboka, he agenda atsabyo. Omutsimu oyo agenda amuhikya ko kika k'imuthwala ahathali bandu.

³⁰Yesu mwamubutsya athi: «Eritsina lyawe iwe ndi?» Naye mwashubya athi: «Eritsina lyaye ingye kikembe.» Anegeni ebyo kushangwa abyagako batsimu bangi. ³¹Emitsimu eyo moyashaba Yesu yithi: athagushagaro mo kyuna kire ky'okwirunga.

³²N'aho habyaga luhyo lwa ngulube, sagenda esishondya kalyo ko kathwa. Abatsimu abo mobashaba Yesu bathi: «Kishi kishi! Thuhamule thwingire mo so ngulube esi. Naye mwahamulabo.» ³³Aho n'aho abatsimu abo mobathoka ko munda oyo, mobayingira mo so ngulube etho. Oluhyo loshi lw'esongulube etho mosahurumuka ko kathwa niesithibitha eyiri engetsi, aho n'aho mosathogongera mo ngetsi n'esoshi mosashenda.

³⁴Abalishya b'esongulube etho babere bashunga kw'ebyo, mobagenda tsaba mo muyi n'omo thanzali n'iyafulira abandu b'omwatsi oyo. ³⁵Abandu mobayalola ko byobithabya. Babere bahika ho Yesu abyaga, mobeya omunda yo wathokagako abatsimu n'ikere hofi n'ebishando bya Yesu.

Abyaga niahera ambithe kandi niahera awithe bwenge bukwirire. Abandũ mobũbaha. ³⁶Abandũ bobashungaga kw'ebyo byatsukaga, mobagambũlira abandi ng'oko omundũ yo wabyagako abatsimũ athalamibwa.

³⁷Aho abandũ boshi b'omo kihũgo ky'aBangerasi mobabya n'obũba kũtsibũ. Bushana n'ekyo mobabwira Yesũ bathi athokerebo mo kihũgo kyabo. Aho Yesũ mwashambira mo bwatho mwashũba ey'athokaga. ³⁸Omundũ yo wathokagako abatsimũ, mwalembalemba Yesũ athi: «Nyangagendire nawe!» He Yesũ mwamũshũbũtsya n'imũbwira athi: ³⁹«Ushũbe ewawe, ũyafũlire abandũ b'ebyoshi Gongo amakũkolera.»

Omundũ oyo mwathimba mo muyi woshi niane mũfulira abandũ b'ebyoshi Yesũ athamũkolera.

Yesũ alubukya mwali wa Yairo n'ilamya mũkatsi mũgũma

(Mat 9:18-26; Mar 5:21-43)

⁴⁰Yesũ abere ashũbũla bandũ bangi mobayamukokya, kũshangwa aboshi babyaga nibamulindirire. ⁴¹Mo ndambi eyo mũkũlũ mũgũma w'esinakoki* eritsina liwe ni yo Yayiro, mwahika amafũkama embere sa Yesũ. Mwalembalemba Yesũ ingire omwe, ⁴²kũshangwa omũthasha gũwe abyaga niathohire. Abyaga mũthasha kyũsha, niawithe miaka hofi ikumi n'ibiri.

Yesũ abere anemũya ewa Yayiro, muhindano mũnene wa bandũ agenda amũgindiritsya. ⁴³Mo muhindano oyo mwabyaga mũkatsi mũgũma oyo wabyaga niamamala miaka ikumi n'ibiri nianemũnũba mo bukoni bw'ithokwamo mũsasi. Abyaga niamamala obushoki bũwe boshi ko bashake hewethuwe mohathabya n'omũgũma wa kũbo yo wamulamaya. ⁴⁴Omũkatsi oyo mwahũlukira Yesũ y'enyuma na mwakola ko pindo y'olũkimba lũwe. Konakathambi ako obukoni bw'erithokamo mũsasi mobwalama.

⁴⁵Yesũ mwabũtsya athi: «Ni ndi yo wamanyĩkolako?» Abandũ boshi mobayigana ko hathali yo wamamũkolako. Aho Petero mwamũbwira athi: «Mũkangĩritsya, uthashungire ko muhindano woshi oyu owakuthimbireko n'ikuhathathania?» ⁴⁶Hewethuwe Yesũ mwanegenana athi: «Mũndũ mũgũma mwanyĩkolako, kũshangwa nyamwonvwa kuli kagala kamanyĩthokamo.»

⁴⁷Omũkatsi oyo abere amashungu ko bamamũminya, mwayifũnda ho Yesũ abyaga niathithimana bũshana n'obũba. Mwafũkama embere siwe. Mwaganũlira mo kathi k'abandũ boshi kyo kithaleka niamũkolako na ko mwakalama aho n'aho. ⁴⁸Aho Yesũ mwamũbwira athi: «Mwali waye, olwikĩritsyo lwawe lwamakulamya. Yigendere n'obũholo.»

⁴⁹Yesũ abere akinali anegenana mokwahika mũndũ mũgũma niathoka ewa Yayiro, mũkũlũ w'esinakoki. Mwamũbwira athi: «Oh mũkengwa!

Mwali wawe athakiriho. Uthashuba luhya oMukangiritsya!» ⁵⁰ Yesu abere onvwa ebyo, mwabwira Yayiro athi: «Uthubahaga, wikiritsye kuroshi naye alama.»

⁵¹ Yesu mwahika ewa Yayiro. Mwathatsiga ingira mo nyumba na bandi bandu athali Petero, Yoani, na Yakobo n'ababuthi b'omwana. ⁵² Abandũ boshi bagenda abalira n'ihononokala bushana n'oluholo lw'omuthasha oyo. Hewethuwe Yesu mwabwirabo athi: «Muthaliraga, kushangwa omuthasha oyu athafwire, he alithulo!» ⁵³ Babere bonvwa ebyo, mobamushaka, kushangwa ibo babyaga nibetsi ko omuthasha oyo amalire ifwa. ⁵⁴ Hewethuwe Yesu mwatsimba omuthasha y'oko kuboko, mwahambala kutsibu n'inegena athi: «We muthasha, buka!» ⁵⁵ Omuthasha oyo mwashuba, aho n'aho mwimana. Yesu mwabwira abandũ athi bahe omuthasha oyo yo kalyo. ⁵⁶ Ababuthi b'omuthasha oyo mobashweka kutsibu. Yesu mwahangirabo athi bathanalinda babwira munda byo bithakoleka.

Yesu athuma abatumwa bawe mo mulimo

(Mat 10:5-15; Mar 6:7-13)

9 ¹ Kiro kiguma Yesu mwahindania abatumwa bawe ikumi na babiri. Mwahabo kagala na maka w'eribinga abatsimu boshi n'ilamya abakoni. ² Mwathumabo bayafule engulu y'oBwami bwa Gongo* n'ilamya bakoni. ³ Mwabwirabo athi: «Mo lugendo lwenyu muthahekaga kiro na kindu. Muthahekaga, mutso, kutse shaho kutse kalyo kutse faranga. Obuli munda aheke lukimba luguma kuroshi. ⁴ Obuli nyumba mwandahumbiriramo, mubyemo kw'ihika ekiro mwandathoka mo muyi oyo. ⁵ N'obuli muyi abandu bandathinda ibakokya, muyithokere mawo. He kw'ithokamo, mukunguthirebo oluthuthu lw'oko bishando byenyu. Ekyo kyandabya kiminyikalo ko bandu abo.» ⁶ Aho abatumwa mobagenda, niabathoka mu murongo n'ya mu undi. Bagenda abafula eNgulu Mbuya n'ilamya abakoni ahoshi.

Herote amathabagana bushana n'ebinwa bya Yesu

(Mat 14:1-12; Mar 6:14-29)

⁷ Herote mukulu w'ekihugo ky'iNgalilaya mwonvwa ebinwa byoshi ebyo. Mwathabagana, kushangwa bandu baguma bagenda banegenya bathi: «Ni

^a **9:5** Ikungutha oluthuthu lw'oko bishando ebyo binegenire bithi omunda yo uthathumwa niamayishangulako omusasi w'omunda oyo amathinda omwatsi athaetherwa.

Yoani Mubatisya yo walubukire.» ⁸ N'abandi bathi ni Eliya mūmīnyeretsi* yo wamahūluka kandi. N'abandi bathi ni mūgūma w'oko bamīnyeretsi* ba kera yo wamalubuka.

⁹ He Herote mwanegena athi: «N'ingye owenewene ngyo nyahamūlaga nyithi batse omuthwe wa Yoani. Ewo ni mūndu ndi oyo yo nyonvwa emyatsi yiwe?» Bushana n'ekyo Herote mwashondya ishūnga ku Yesu.

Yesu uguthya bandu bihumbi bithano

(Mat 14:13-21; Mar 6:30-44; Yoa 6:1-14)

¹⁰ Abathumwa* mobashubula, bamathanga ifulira Yesu y'ebinwa byoshi bakolaga. Honyuma kw'aho Yesu mwathwalabo hale hake n'abandu. Mobaya ko lūhande lw'omuyi w'iBetesaita.

¹¹ He omuhindano wa bandu mwaminya ko Yesu mwaya eyo, mobamukwamirayo. Mwakokyabo kubuya, mwathanga ifulirabo omwatsi w'anegenire ko byo Bwami bwa Gongo*. Nabo babyaga bakoni mo kathi kabo, mwalamyabo.

¹² Bwabere bwagoroba, abathumwa ikumi na babiri ba Yesu mobahika aho ali n'imubwira bathi: «Mukengwa! Hano thuli hale n'omuyi. Bushana n'ekyo nga uthabwira abandu bagende mo mirongo eyiri hofihofi n'omo thanzali, bushana babone bugonzero n'ebyerirya.» ¹³ Yesu mwabwirabo athi: «Mūhebo kalyo imwe bene.» Nabo mobashuba mūshubitsya bathi: «Thuthawithe kalyo, he emikati ithano eyi n'amahere abiri. Wanzire nithwayagulira abandu boshi aba bo kalyo?»

¹⁴ Abandu babyaga aho babyaga hofi bayira bangana bihumbi bithano. Yesu mwabwira abiga* buwe athi: «Mwikatsye abandu mo bithutho bithutho bya bandu makumi athano athano.» ¹⁵ Abiga mobakola ng'oko Yesu abwiragabo, mobikatsya abandu boshi. ¹⁶ Yesu mwatsimba emikati ithano n'amahere abiri ayo, mwashumba amesho mo lubula n'isima Gongo. Honyuma kw'aho mwatsitsangatsingarō. Mwaro abiga* buwe bushana bagabirero abandu. ¹⁷ Abandu boshi abo mobalya n'ugutha. Abiga mobashongya ebyashakaga, mobotsutsya bithonga ikumi na bibiri.

Petero anegena athi Yesu yo Kirisito

(Mat 16:13-19; Mar 8:27-29)

¹⁸ Kiro kiguma Yesu mwabya ahathali bandu n'ishaba Gongo, n'abiga* buwe nibali emusike kw'ie. Amabutsyabo athi: «Abandu abanegena bathi nyiri ndi?» ¹⁹ Abiga mobamūshubitya bathi: «Baguma abanegena bathi iwe we Yoani Mubatisya, n'abandi bathi iwe we Eliya, n'abandi nabo bathi iwe uli mūgūma w'oko bamīnyeretsi* ba kera yo walubukaga.» ²⁰ Aho Yesu

mwabwitsyabo athi: «Nemwe omunegenena muthi nyiri ndi kwenzi?» Petero mwamushubitsya athi: «N'iwe Kirisito yo Gongo athumaga.»

**Yesu anegenena kw'ifwa
n'ilubuka liwe**

(Mat 16:20-28; Mar 8:30-9:1)

²¹ Yesu mwahamula abiga buwe bathanalinda babwira n'omundu n'omuguma omwatsi oyo. ²² Kandi mwashuba bwirabo athi: «Ingye Muga w'omundu* bitholere ninyagalwa kutsibu n'ithindwa n'abakulu b'abandu, n'abakulu b'abaheri* n'abakangiritsya* b'omugomba. Nyandithwa, n'ekiro ky'akashathu nyandalubuka.»

²³ Honyuma kw'aho mwabwira aboshi athi: «Omundu ali atsigire inyikwama agende ayithinde yowene. Atsigire iheka omusalaba* uwe buli kiro, n'inyikwama. ²⁴ Kushangwa omundu yo ushondya ilamy obuyingo buwe andahetsyabo. Hewethuwe yo wandahetsyabo bushana na ngye, andalamyabo. ²⁵ N'omundu mwangabona obushoki bwoshi bw'ekihugo, hewethuwe amayihetsya n'iyibihya, andabona ndundi ki? Hathali! ²⁶ Bushana n'ekyo mundu woshi yo wandagenda anyifwira shoni, n'ifwira ebinwa byaye byo shoni, nangye Muga w'omundu* kuthyo nyandamufwira shoni. Ko byandabya bithyo ko mugulu nyandahika mo lukengerwa lwaye, nalo lo na lukengerwa lwa Thatha, na olw'abamalaika* babuyirire*. ²⁷ Kwenene enyibawira, mo kathi k'abali hano baguma bathindafwe bathetsi balola ko Bwami bwa Gongo*.»

Obusu bwa Yesu bwamabinduka

(Mat 17:1-8; Mar 9:2-8)

²⁸ Habere hahwa biro munani Yesu anegenire ebinwa ebyo, mwatsimba Petero, Yoani na Yakobo, mwirukira nabo ko kithwa bushana niaya shaba Gongo. ²⁹ Abere anemushaba, obusu buwe mobwahinduka n'esongimba siwe mosasana n'ingenga kutsibu. ³⁰⁻³¹ Omo lukengerwa olo mokwahuluka bayira babiri, Musa na Eliya. Abayira babiri abo niabasimola haguma na Yesu ng'oko andamala omulimo uwe n'ifwira iYerusalemu.

³² Mo mugulu oyo Petero n'abalikyabo babyaga nibayiretho burangwe. He mobabuka bamashunga olukengerwa lwa Yesu, n'abayira babiri abo nibimene haguma naye. ³³ Mo ndambi abayira babiri abo bamikanaga na Yesu, Petero mwamubwira athi: «Mukangiritsya, bikwirire thwikale hano. Na thuhimbe ho hema ishathu: nguma yabya yiwawe, eyindi yabya ya Musa, n'eyindi yabya ya Eliya.» Petero abyaga niathetsi ebyagenda anegenena. ³⁴ Mo ndambi Petero abere anemunegenena athyo, mokwahuluka kifu kinene n'ishwikabo. Abiga abo mobubaha balola ekifu ko kyamashwikabo. ³⁵ Mo

kifu ekyo momwathoka mulenge nianegeni athi: «Oyu ni Mugala aye yo nyashombolaga. Mugende omumuthega mathwi!»

³⁶Mo ndambi omulenge onvwikaga oyo, abiga abo mobashunga ko Yesu niahera yowene. Ebinwa bashungaga aho, mobayibera bukuthu, mobathabwirabyo munda n'omuguma mo biro ebyo.

Yesu abinga mutsimu ko mwana

(Mat 17:14-18; Mar 9:14-27)

³⁷Bwabere bwakya, Yesu n'abiga bawe bashathu abo mobandagala ko kithwa. Muhindano munene wa bandu mwamugendera. ³⁸Mo muhindano oyo, munda muguma mwahambala mulenge munene athi: «Mukangiritsya, enyikushaba thagusha elisho ly'oko mwana aye. Kushangwa yo nyinawitheko yowene! ³⁹Omutsimu anagenda ayihuma kw'eye, aho n'aho nialeka niahambala n'imuthithimania, n'erifulo niryothsula ko banyu. Omutsimu athali anamuthokako tsuba, na kandi anamunubya kutsibu. ⁴⁰Monyashabire abiga* bawe babinge omutsimu oyu, he mobalemirwe!»

⁴¹Aho, Yesu mwashubya athi: «Imwe bandu ba munobwire muthawithe lwikiritsyo, kandi muli babi kutsibu. Nyandagenda enyibya nemwe nihulikiritsya ebinwa byenyu ihika kiro ki? Nyilethere omwana awe oyo yo hano!»

⁴²Mo ndambi omwana abyaga niaya ahali Yesu, aho n'aho omutsimu oyo mwahuma omwana yo ahishi n'imuthithimania kutsibu. Hewethuwe Yesu mwakemera omutsimu. Mwalamy omwana oyo n'imushubulitsya ishe. ⁴³Abandu boshi mobashweka kutsibu kw'ishunga amaka manene wa Gongo.

Yesu ashuba negeni ko luholo lawe

(Mat 17:22-23; Mar 9:30-32)

Mo ndambi abandu boshi abo babyaga ni banemushweka bushana n'ebiyoshi Yesu agenda akola. Yesu mwabwira abiga* bawe athi: ⁴⁴«Muthege amathwi bushana mwonvwe ebinwa enyishondya ibawira: Ingye Mugala w'oMunda* nyandahirwa mo minwe y'abandu.» ⁴⁵Hewethuwe ebinwa ebyo Yesu abwiragabo, mobathaminyabyo nga binegenire bithi ki. Byabyaga nibibishire kubo bushana bathaminyagabyo. Na mobubaha imubutsya nga binegenire bithi ki.

Ni ndi yo mukulu?

(Mat 18:1-5; Mar 9:33-37)

⁴⁶Kiro kiguma abiga ba Yesu mobakubisania baminye indi nga yo mukulu mo kathi kabo. ⁴⁷Yesu abyaga niamamala iminya emiganitsye

yabo. Bushana n'ekyo mwatsimba omwana mulere amamuhira hofi naye. ⁴⁸Mwabwirabo athi: «Oyo ukokya omwana mulere yo ũli ng'oyu mw'itsina lyaye, n'ingye amakokya. N'oyo unyikokya, kuthyo akokya oyo wanyithumaga. Ni kwenene, omulere mo kathi k'imwe boshi oyo yo mukũũ.»

**Oyũthe nzigu kw'imwe niali
ko lũhande lwenyu**

(Mar 9:38-40)

⁴⁹Aho Yoani mwanegena athi: «Mũkangiritsya, mothushũnga ku mũndũ yo ũbinga emitsimũ mw'itsina ly'awe. Hewethuwe mothũmũhangira kũshangwa athali w'omo kikembe kyethũ.» ⁵⁰Yesũ mwamũbwira athi: «Mũthamũhangiraga, kũshangwa oyo ũthali nzigu kw'imwe ni w'oko lũnda lwenyu.»

Basamariya bamathinda ikokya Yesũ

⁵¹Ebiro Yesũ angirukibwe mo lũbũla byabyaga hofi n'ihika. Bushana n'ekyo, mwashũnga ko bitholere irũkire iYerusalemũ. ⁵²Mwathũma bandũ balebe bamũthange. Abandũ abo mobagenda n'ingira mũ mũrongo mũgũma w'aBasamariya*, kũshangwa bashondetsye Yesũ yo bũgonzero. ⁵³Hewethuwe abandũ b'omo mũrongo oyo mobathinda imukokya, kũshangwa agenda aya iYerusalemũ.^b ⁵⁴Abĩga* bũwe Yakobo na Yoani babere bashũnga ebyo, mobanegena bathi: «Nyinya-kowethũ, wanzire thũshabe mũtsanwa athoke mo lũbũla bũshana atsikyebõ?» ⁵⁵Yesũ mwabĩndũka n'ikemerabo.^c ⁵⁶Aho, Yesũ n'abiga bũwe mobagenda kũ ũndi mũrongo.

Mahano bũshana n'ikwama Yesũ

(Mat 8:19-22)

⁵⁷Mo ndambi Yesũ n'abiga bũwe babyaga bakinali mo nzira, mũndũ mũgũma mwabwira Yesũ athi: «Nyandagenda enyikũkwama ahoshi wandaya.» ⁵⁸Yesũ mwamũbwira athi: «Emĩtherere inayira mashamba,

^b **9:53** Ithanga kera aBayuta n'aBasamariya bathagenda bahũlikirirana. Bushana n'ekyo, aBasamariya babyaga ni bathanzire aBayuta batsũke mo kihũgo kyabo bali abayaherera Gongo y'iYerusalemũ. aBasamariya ibo babyaga niabanegena bathi litholere iherera Gongo y'oko kithwa ky'eNgerasi.

^c **9:55** Kũli wandi mashako wa kera wana ongerera bĩndi bĩnwa ko mũlondo oyo athi: *Ewo Yesũ kandi athi: «Mũthetsi k'omunabya bandũ b'omũthĩma wa Gongo? Mũminye kũbũya ingye Mũgala wa w'oMũndũ, nyithahikaga bũshana n'itsikya abandũ, hewethuwe nyahikaga bũshana n'ishabũlabo.»*

n'ebironge ebinayira nyũthũ. Hewethuwe ingye Mũgala w'oMũndũ* ndayira naho nyangagonzera.»

59 Yesũ mwabwira Ƴndi mũndũ athi: «Nyikwame.» He omũndũ oyo mwanegeni athi: «Nyinya-kowethũ, thaleka nyathathanga iyatha thatha.»

60 Yesũ mwamũshũbitsya athi: «Lika abaholi bagende bayathe abaholi babo. He iwe Ƴgende Ƴyafũlire abandũ b'emiyatsi y'oBwami bwa Gongo* .»

61 Ƴndi mũndũ mwabwira Yesũ athi: «Nyinya-kowethũ, nyagenda enyikũkwama, hewethuwe thaleka nyathayalagana n'ekihanda kyaye.»

62 Yesũ mwamũbwira athi: «Omũndũ yo Ƴthathanga irima niathashũba lola enyuma. Oyo Ƴkola athyo athatholere ikolera oBwami bwa Gongo* .»

Yesũ athũma bandi biga makumi alinda na babiri mo mũlimo

10 ¹Honyuma kw'aho Nyinya-kowethũ mwashombola bandi biga makumi alinda na babiri.^a Mwathũmabo mo babiri babiri bamũthange embere mo bũli muyi na bũli handũ angayire yowene. ²Mwabwirabo athi: «Emyaka yerire mingi he abakoli ni bake. Bũshana n'ekyo mũshabe mwenye emyaka athũme bandi bakoli mw'ishwa liwe. ³Ewo mũgende! Hewethuwe mũmĩnye ko nyamabathũma ng'ebyana by'esombuli mo kathi k'esonyambwe. ⁴Mũthahekaga faranga kũtse shaho, kũtse birato. Na mũthaketsya mũndũ mo nzira.

⁵«Mo bũli nyũmba mwandagenda omwĩngira, mũketsye benyemo mũthi: «Bũholo bubyemo mo nyũmba eno.» ⁶Omo nyũmba eyo mwamabya mũli mũndũ ashondya bũholo; obũholo bwenyu obo bwandamũshigalira. Bithali bityo, obũholo bwenyu obo bwandabashũbulira. ⁷Mwikale mo nyũmba eyo, mulye n'ishoma ebyo abenyenyũmba bandabaha. Kũshangwa omukoli atholere ihabwa lũhembo lũwe. Mũthathokaga mo nyũmba n'ĩngira mũ yĩndi. ⁸N'omo bũli muyi mwandĩngiramo, abandũ bamabakokya, mulye byo abandũ abo bandabaha. ⁹N'abakoni bo bali mo muyi oyo, mulamyemo n'ibwira abandũ b'omo muyi oyo mũthi: «oBwami bwa Gongo* bwamahika hofi nemwe.» ¹⁰He mo bũli muyi abikalani bamo bamathinda ibakokya, mũgende mo mũbuga yawo n'inegeni mũthi: ¹¹«Thwamabakũngũthira n'oluthuthu lw'omuyi enyu olũli ko bishando byethũ. ^bHe mũmĩnye kũbũya ko oBwami bwa Gongo* bũli hofi.» ¹²Kwenene enyibabwira nyithi, ekiro ky'esohi kyandabya kyahika abandũ b'omo muyi oyo bandasohwa kũtsibũ kũlenga abandũ b'omuyi w'eSotomo.^c»

^a **10:1** Kuli bindi bitabo binegenire bithi mwashombola bandi biga makumi alinda.

^b **10:11** Soma Luka 9:5.

^c **10:12** Soma Ndangiro 19:24-28.

Yesu athakira abandũ bo bamũthindaga

(Mat 11:20-24)

¹³ Yesu mwashũba negena athi: «Bũhanya kw'imwe Banyakorasini! Na bũhanya kw'imwe Banyabetsaita! Kushangwa monyakolire ebithikothiko mo kathi kenyu. Ebithikothiko ebyo kubwira mbũ nyakoleragabyo aBanyatiro n'aBanyasitona, ibo bangambere mibũta n'ikala omw'ifu bushana n'ikangania ko bamabindũka ithoka mo bitsibũ byabo. ¹⁴ Bushana n'ekyo, ekiro ky'erisoha, Banyatiro n'aBanyasitona bandasohwa kũke kulenga aBanyakorasini n'aBanyabetsaita. ¹⁵ Nemwe Banyakaperenaũmũ, omũganitsya mũthi mwanwirukibwa ihika mo lũbũla? Ihi! Mwandakimibwa ihika okw'irũnga!»

¹⁶ Yesu mwabwira abiga bũwe kandi athi: «Oyũbahũlikiritsya n'ingye ahũlikiritsya. Hewethuwe yo wamabathinda n'ingye amathinda. N'oyo wamanyithinda, niamathinda yo wanyithũmaga.»

Abiga makumi alinda na babiri bamafũlũka

¹⁷ Honyuma kw'aho, abiga makumi alinda na babiri abo, mobashũbũla nibali n'olũmogo lũnene. Mobanegenena bathi: «Nyinya-kowethũ, emitsimũ naro thwabere thũli othũbingaro mw'itsina lyawe moyagendire eyithũkengala!» ¹⁸ Aho Yesu mwabwirabo athi: «Monyashungire Sitani niathoga mo lũbũla ng'omulabyo. ¹⁹ Monvwel! Monyabahere maka w'ikinda Sitani. Ni omo maka ayo momwagenda omũlyathira so nzoka n'esonge, hathakiri ekyangabayira kũbi. ²⁰ He, mũthamogaga bushana n'emitsimũ ko yibakenga. Hewethuwe mũmoge kushangwa amatsina enyu ashakirwe mo lũbũla.»

Yesu amoga

(Mat 11:25-27; 13:16-17)

²¹ Omo ndambi eyo, Yesu mwamoga kũtsibũ mo maka w'oMũthima Mwerũ*. Mwanegenena athi: «Thatha, iwe Muthegeki w'olũbũla n'ekihũgo! Enyikũsima kushangwa ebinwa bino mowabishabyo abathegekania n'abawithe obwenge. He mowabishulirabyo abana balere. Ega, mbe Thatha! Ebyoshi ebi bithokene kw'ishasha lyawe!»

²² «Thatha mwanĩhere ebyoshi. Hathali mũndũ yo unyetsi ingye Mũgala athali Thatha mũsha. Na kandi hathali mũndũ yo wetsi Thatha athali ingye Mũgala, n'obũli mũndũ yo nyishashire amũminye.»

²³ Aho Yesu mwabindũkũra ahabyaga abiga* bũwe. Mwabwirabo ibo bene athi: «Amesho w'alola ko byo mũlolako bino amagashanirwa. ²⁴ Kwenene enyibabwira, baminyeretsi* bangi na bami bangi mobashondya ilola ko byo mũlolako, he mobathalola kũbyo. Kandi mobashondya ionvwa ebyo mwonvwa ebi, he mobathonvwabyo.»

Mugani w'oMūsamariya mubuya

25 Honyuma kw'aho mukangiritsya muguma w'oMugomba* mwimana niashondya ilenga ku Yesu. Mwabutsya Yesu athi: «Mukangiritsya, nyangakola ki bushana nyibone buyingo bw'ekera n'ekera?»

26 Yesu mwamushubitsya athi: «Mo Mugomba* mushakirwe ki? Uli usomawo unonvwawo uthi?» 27 Omukangiritsya w'oMugomba oyo mwamushubitsya athi: «Tsigira Nyinya-kowethu Gongo wawe n'omuthima awe woshi, n'obuyingo bwawe boshi, n'akagala kawe koshi, n'emiganitsye awe yoshi. Na utsigire mulikyenyu ng'oko uyitsiyire wowene.^d» 28 Aho Yesu mwamubwira athi: «Wamashubya kubuya! Ugende ukole uthyo nawe wandabyaho.»

29 He omukangiritsya w'oMugomba oyo mwashondya ikangya kw'asingene. Aho mwabutsya Yesu athi: «Na ndi yo mulikyethu?»

30 Yesu mwamushubitsya athi: «Mundu muguma agenda athoka iYerusalemu ni akimira iYeriko. Abere akinali mo nzira abashamuli bamamwako. Abashamuli abo mobamunyaga ebyoshi abyaga awitheko, mobamunoya, mobayigendera nibamamushiga hofi n'ifwa.

31 «Mokwahuluka muheri* muguma wa Gongo agenda akima mo nzira eyo. Abere ashunga yo uthahumbwa mwatsuka emusike n'iyigendera.



*Mūsamariya mubuya ashomola ebihulu
bya mundu athahumbwa (10:34)*

^d 10:27 Soma Ibuta 6:5; Balawi 19:18.

32 Mulawi*^e muguma naye mwahikaho. Abere ashunga ko mundu oyo, naye mwatsuka emusike n'iyigendera.

33 «Honyuma kw'aho mokwahuluka Musamariya* muguma abyaga mo lugendo. oMusamariya* oyo mwahika ahabyaga omundu wahumbawa. Iye abere amushungako mwamufwira shashi. **34** Mwayifunda hofi naye, mwashomola ebihulu biwe mw'ihira mubyo mo mafutha n'etifayi* n'iminabyo. Mwamushumbira ko punda yiwe mwamuthwala eyiri enyumba y'abageni bushana bamulweko. **35** Bwabere bwakya, mwahulukya tinari^f ibiri, mwahatho omwenye nyumba y'abageni n'imubwira athi: «Omundu oyu umulweko kubya. Nyandakufuha esindi tinari soshi ko byoshi wamukolera nyandabya nyashubula.»»

36 Ko nduli Yesu mwabutsya omukangiritsya w'oMugomba oyo athi: «Mo miganitsye awe ko bandu bashathu abo, ni ndi yo wabyaga mulikyabo yo wahumbawa n'abashamuli?» **37** Omukangiritsya w'oMugomba oyo mwashubya athi: «Oyo wamufwiraga shashi.»

Yesu mwamubwira athi: «Enda! Nawe ugende ukola uthyo.»

Yesu aya lungula Maratha na Mariya

38 Yesu n'abiga buwe babere banali mo lugendo, mwingira mu murongo muguma. Mukatsi muguma nianahulwamo Maratha mwamukokya mo nyumba yiwe. **39** Maratha oyo abyaga awithe mulumuna guwe, agenda ahulwamo Mariya. Mariya oyo mwikala ho musike w'ebishando bya Nyinya-kowethu, niahulikiritsya ebinwa biwe. **40** He Maratha iye abyaga niathubathuba mo mulimo w'itheka kalyo. Mwahika ahali Yesu mwamubwira athi: «Nyinya-kowethu, mulumuna aye mwanyimikira omulimo w'ingye ngyowene bithakubwire kindu? Mubwire anyiwathikye.»

41 Nyinya-kowethu mwamushubitsya athi: «Maratha, Maratha! Iwe uyagatsa n'ithubathuba mo bindu bingi. **42** He ni kindu kiguma busha kyo kitholere. Mariya iye amashombola kindu kibuya kutsibu. N'ekyo athindanyagulwekyo.»

Yesu akangiritsya abiga buwe ishaha Gongo

(Mat 6:9-13; 7:7-11)

11 ¹Kiro kiguma Yesu agenda ashabira handu halebe. Abere amala ishaha, muguma w'oko biga* buwe mwamubwira athi: «Yoani Mubatisya mwakangiritsya abiga* buwe ng'oko banashaba Gongo. Aho Nyinya-kowethu, nawe kuthyo thukangiritsye nga ko banashaba Gongo.»

^e **10:32** *Mulawi*: aBalawi ni bandu b'omo kihanda ky'aBaisiraeli bagenda abangirira abaheri bakulu ko mulimo w'omo Nyumba ya Gongo. Soma Miganzo 3:5-13.

^f **10:35** *Tinari*: Eso tinari ibiri sabyaga luhembo lwa mibitsi ibiri.

² Yesu mwabwirabo athi: «Muli omushaba Gongo mugende omunegenamuthi:

“Thatha,
eritsina lyawe lisingibwe!
Obuthegeki bwawe buhike!

³ Ugende uthuha akalyo kethu k'ebiro byoshi.

⁴ Ugende uthuganyira ebitsibu by'ethu,
kushangwa nethwe othunaganyira abo banathukolera obubi.
Uthagenda uthushiga thwingire mw'ilengwako.”»

⁵ Yesu mwashaba bwira abiga bawe athi: «Thulolere ko mugani oyu: mundu muguma wa kw'imwe angayira mwira. Omwira oyo niamuhikira mo kathi k'ekiro n'imubwira athi: “Mwiraye, nyibweke mikati ishathu,
⁶ kushangwa muguma w'oko bira baye amanyihikira niathoka mo lugendo na ngye nyithawithe kalyo k'imuha.” ⁷ Oyo uli mo nyumba mwamushabitsya athi: “Uthanyikendetsaya, nyamalire ikinga oluyi, ingye n'abana baye thwamalire igonzera. Nyithangashaba hangana bushana n'ikuha mikati.”
⁸ Enyibabwira nyithi mwangathinda imana n'imuha emikati bushana n'obwira, he angimana n'imuha ebyoshi ashashire bushana n'obuhathikani bawe.

⁹ «Nangye enyibabwira nyithi: mugende omushaba nimo mwahabwa, mugende omushondya nimo mwabona, mugende omukongotha ko luyi nimo mwakingulirwa. ¹⁰ Kushangwa obuli mundu yo ushaba yo unagenda ahabwa, n'oyo ushondya yo unabona. N'oyo ukongotha ko luyi yo unakingulirwa. ¹¹ Ishe ndi wa mwana mo kathi kenyu yo mugala gawe angamushaba ihere niamuha nzoka? Hathali! ¹² Kutse kandi indi yo mugala gawe angamushaba iyi niamuha nge? Hathali! ¹³ Na mo munali babi, he mwetsi iha abana b'enyu bo bindu bikwirire. Aho Isho yo uli mo lubula athindagende aha oMuthima Mweru* bo banagenda bamushabawo!»

Yesu abinga mutsimu

(Mat 12:22-30; Mar 3:22-27)

¹⁴ Kiro kiguma Yesu agenda abinga mutsimu wayiraga mundu muguma mo kitsiru. Omutsimu oyo abere athoka ko mundu oyo, aho n'aho mwathanga inegenana. Mo muhindano abandubashweka kutsibu. ¹⁵ He baguma mo bandu abo mobagenda babwirana bathi: «Omundu oyu ni Belesebuli, mukulu w'emitsimu yo unagenda amuha amaka w'ibingaro.»
¹⁶ Abandi babyaga niabashondya imulengako. Mobamushaba akolerebo kithikothiko kiguma kyo kithoka elubula.

¹⁷ Hewethuwe Yesu abyaga niamamala iminya ebiri mo mithima yabo. Mwabwirabo athi: «Abandu b'omo bwami buguma bamalwa ibo kw'ibo,

obwami obo nibwamathera. N'abandũ b'omo luganda lugũma bamalwa ibo kw'ibo, oluganda olo ni lwamashambũkala. ¹⁸Aho, Sitani amabya angayilwisa yowene, obwami bũwe bwashubimana bũthi? Enyinegena ebyo kushangwa omũnegena mũthi: enyibinga emitsimũ ko maka wa Belesebuli. ¹⁹Nyamabya nienyibinga emitsimũ mo maka wa Belesebuli, aho abana b'enyu nabo abanagenda babingaro mo maka wa ndi? Bushana n'ekyo ni abana b'enyu abo bobandabasoha. ²⁰He ingye, ali mo maka wa Gongo wonyibingamo emitsimũ, n'inegena mbũ oBwami bwa Gongo* bwamalire ibahikira.

²¹«Omugũũ omũndũ w'akagala awithe kũ bimano bya malwa aliatheya omwe, obushoki bũwe obunabya nibutheyibwe kubũya. ²²He mũndũ mũndũ yo uwithe kagala kw'imulengya amahika imũwako n'imukinda, aho angashamũla omwenye enyũmba y'ebimano by'amalwa ebyo athayinihire, n'igaba ebindũ byoshi athamũnyaga.

²³«Oyo ũthali ko lũhande lwaye, ni nzigu aye. N'oyo ũthali anyiwathikya kw'ikũmakũma niapanza.»

Mũtsimũ ashũba ko mũndũ

(Mat 12:43-45)

²⁴Yesũ mwashũba negena athi: «Mo ndambi omũtsimũ mũbi anabya amathoka ko mũndũ anagenda athimbathimba mo mbwarara* niashondya aho angalũhũkũra. Amabũshaho nianegena athi: “Nyashũba mo nyũmba aye nyithathokamo.” ²⁵Amabya ashũbamo ameyaro niyamabitsibwa n'ikomibwa kubũya. ²⁶Bushana n'ekyo omũtsimũ oyo anayenda yindi mitsimũ irinda mibi kũsibũ kulengya iye. Eyoshi niyingira mo nyũmba eyo n'iyikaliramo. Aho omũndũ oyo emibere yiwe n'iyabya mibi kũsibũ kulenga emibere yiwe mimbere.»

Igashanirwa ly'ekwenene

²⁷Mo ndambi Yesũ abere anemũnegena ebinwa ebyo mũkatsi mũgũma mo muhindano mwahambala athi: «Omũkatsi yo wakũbũthaga n'ikwongya agashanirwe!» ²⁸He Yesũ mwashubya athi: «He abo bagashanirwe kundu kundu n'ibo banagenda abonvwa eKinwa kya Gongo* n'ikola nga ko kinegenire.»

Ishaba kithikothiko

(Mat 12:38-42)

²⁹Mo ndambi bandũ bangi babere bahindana ho Yesũ abyaga, mwabwirabo athi: «Abandũ b'omo mũgũũ ono ni babi! Abashaba kiminyikalo. Hewethuwe hathali kiminyikalo bandakangibwa kithali

eky'oMuminyeretsi Yona. ³⁰Yona abyaga kiminyikalo ko bandu b'eNinawi.^a Na ngye Muga w'oMundu*, kuthyo nyandabya kiminyikalo ko bandu ba munobwire.

³¹«Mo kiro ky'esohi oMugole wathokaga ko lunda lwa Kihya^b andalubukira haguma nemwe bandu ba munobwire bushana n'ibasitaka. Kushangwa iye athokaga hale kutsibu bushana n'iyonvwa ebinwa by'obuthegekania bw'oMwami Solomona. Mwonywe! Hano hali mukulu kulenga Solomona!

³²«Omugulu ekiro ky'esohi kyandabya kyahika, abandu b'eNinawi nabo bandalubukira haguma nemwe bandu ba munobwire n'ibasitaka. He abo ibo babere bonvwa ebinwa by'oMuminyeretsi Yona akangiritsayabo mobabinduka ithoka mo bitsibu byabo. Mwonywe! Hano hali mukulu kulenga muminyeretsi Yona.»

Amesho wo tara y'omubiri

(Mat 5:15; 6:22-23)

³³Yesu mwashuba negena athi: «Hathali mundu yo unagenda anokya etara n'ibisharo, kutse n'ishwikaro kithonga. Hewethuwe niahiraro kw'ihango, nimo abandu bo bingira mo nyumba balole ko kyakakala.

³⁴Amesho wo tara y'omubiri. Amesho awe amabya athalwere, omubiri woshi niali mo kyakakala. He amesho awe amabya nialwere, omubiri awe nawo niabya mo mwitsimya. ³⁵Bushana n'ekyo uyitheye kushangwa ekyakakala kiri mw'iwe kithahindikaga mwitsimya. ³⁶Omubiri awe woshi amabya ali mo kyakakala, hamabya hathali kithambo kiri mo mwitsimya, omubiri awe woshi oyo andabya mo kyakakala ky'ekwenene ng'etara yo yinagenda eyikukoletsa mo kyakakala kyar.»

Emibere mibi y'aBafarisayo n'abakangiritsya b'oMugomba

(Mat 23:1-36; Mar 12:38-40)

³⁷Yesu abere amamala inegenya ebinwa ebyo, Mufarisayo* muguma mwamubirikira ayalye kalyo k'omwe. Yesu mwingira mo nyumba na mwathanga irya. ³⁸oMufarisayo* oyo mwashweka abere ashunga Yesu ko mwalya buthanaba ko minwe.^c

³⁹Aho Nyinya-kowethu mwamubwira athi: «Imwe Bafarisayo* omunagenda mushuga enyuma y'olwatha na y'embale. Hewethuwe mo mithima enyu motswire ngumbu y'obwitsi n'ebindi bibi. ⁴⁰Imwe muli

^a 11:30 Soma Yona 3:3-5.

^b 11:31 Soma 1Bami 10:1-10.

^c 11:38 Ko aBafarisayo byabyaga nibithatholere omundu eriya buthanaba ko minwe.

thuhumo! Muthetsi kw'oyo wakomaya enyuma y'olwatha na y'embale n'iye yo wanakomaya n'emwishi watho? ⁴¹Ebyo biri mo bindu ebyo mugende omuwathikya mabyo mw'abatsene. Aho n'ebindi byoshi byetsibwa bushana nemwe.

⁴²«Muli baligo, imwe Bafarisayo*! Omunahana ekiguma ky'ikumi ky'akandambuka, n'esoshogo, n'esindi nyinyi, he omunagenda omusunzugura ikola ebithunganene, na buthatsigira Gongo. Naho ni ebyo byo mwangagendire omukola, buthalika ihana kiguma ky'ikumi ky'ebindi bindu byoshi ebyo.

⁴³«Muli baligo, imwe Bafarisayo*! Omunanza erikala ko bifumbi by'embere mo so sinakoki*. Na kandi omunanza abandu bagende ababaketsya n'olushikyo mo mihindano. ⁴⁴Muli baligo! Omunabya ng'amasinda wathaliko kiminyikalo, ow'abandu abanalyathanga kawo buthaminyanya.^d»

⁴⁵Mukangiritsya muguma w'oMugomba* mwabwira Yesu athi: «Mukangiritsya, uli ogunegenya uthyo ni oguthukamba.»

⁴⁶Na Yesu mwashubya athi: «Buligo kw'imwe bakangiritsya b'oMugomba*! Kushangwa omuhekeya abandu bw'emitsigo itsithohire, kandi nimuthangathakola na kuro ko mo minwe enyu.

⁴⁷«Buligo kw'imwe! Kushangwa omuhimba amasinda w'abaminyeretsi* bo bithawa n'abo sho. ⁴⁸Aho omwimirana n'abo sho bakolaga, kushangwa mobitha abaminyeretsi, nemwe omuhimba amasinda wabo! ⁴⁹Bushana n'ekyo, Gongo mw'ithegekanya liwe mwanegenya athi: “Nyandathumirabo abaminyeretsi* n'abathumwa*. He bandagenda abitha baguma ba mubo n'inubya bandi.” ⁵⁰Ni bushana n'ekyo omusasi w'abaminyeretsi* boshi bithawa ithoka kw'ibumbwa ly'ekihugo, andabya ko muthwe wa bandu ba munobwire. ⁵¹Obwithi obo bwathangaga ku Abeli ihika ku Sakariya^e yo bithiraga mo Nyumba ya Gongo* mo kathi kathi k'obutara* bw'eriharerako n'ahandu habuyirire. Ega, enyibabwira nyithi omusasi w'abandu boshi aba andabya ko muthwe enyu imwe bandu ba munobwire.

⁵²«Muli baligo bakangiritsya b'oMugomba*! Omunabisha abandi bandu b'olufunguro bushana bathingiraga aho bangiyira iminya Gongo. Imwe bene muthali omushondya ingiraho, n'abobashondya ingiramo omunakikirabo.»

^d 11:44 aBayuta babyaga na mibere y'ihira biminyikalo ko masinda wabo bushana mundu athalyathaga kawo buthaminyanya. Ikwanana n'oMugomba wa Musa obuli wakolaga ku kindi kutse ilyatha kw'isinda ni amahatsya. Athangashubire hindana n'abandi Bayuta mo buhere. Soma Balawi 5:3; Miganzo 19:11-22.

^e 11:51 Mo Ndagane ya Kera, aBayuta ibo babyaga nibetsi k'omundu mumbere withawa abyaga Abeli, n'omundu munyuma nyuma withawa abyaga maminyeretsi Sakariya. Soma Ndangiro 4:8; 2Myatsi y'eMigulu 24:20-22.

⁵³ Yesu abere athoka mo nyumba eyo, abakangiritsya* b'oMugomba n'aBafarisayo* mobakapikira bushana naye n'imubutsyabutsya bingi. ⁵⁴ Bagenda abashondya imulengako nimo babona kyo bangimanirako kw'imusitaka.

Yesu ahangira obuyimbya

(Mat 10:26-27)

12 ¹ Mo kathambi ako bihumbi na bihumbi bya bandu mobahindana aho, ihika ko kathambi mobathanga ilyathangana. Yesu mwathanga ibwira abiga* buwe athi: «Mugende omuyitheya ko tsatsu* y'aBafarisayo*, n'inegena mbu obuyimbya. ² Hathali kindu kibishire ekithinda bishulwe, kandi lufumi oluthinda kumbulwe. ³ Bushana n'ekyo ebyoshi mwanegenaga mo mwitsimya, byand'onwikanana mo mwishi. N'ebyo mwabuhereranaga mo bishenge by'emwishi, byandahambalirwa ko nyithwe s'amanyumba.»

Oyo wangubahwa

(Mat 10:28-31)

⁴ Kandi Yesu mwashuba negena athi: «Enyibabwira imwe bira baye: muthagenda omubaha abo bang'itha omubiri, he bamamala itha bathangashuba kola kindi kindu. ⁵ Nyabakangya oyo mwangagenda omubaha. Mugende omubaha Gongo yo wangashamula obuyingo bw'omundu, na amamala ishamulabo, ali na maka w'igusha mundu yo kw'irunga. Ega! Enyibabwira kw'oyo yo mugende omubaha.

⁶ «Ebishwi bithano bithali ebinagutsibwa sengi ibiri sa faranga kuroshi? Hewethuwe mabyo hathali n'ekiguma ekyo Gongo ibirirwe. ⁷ Na kuthyo esonzwiri soshi s'oko mithwe enyu, Gongo etsi emiganzo y'esoshi etho. Bushana n'ekyo muthagenda omubaha, kushangwa muwithe kitsiro kinene kutsibu kulenga bishwi bingi.»

Imira n'ithinda Kirisito

(Mat 10:19-20; 10:32-33; 12:32)

⁸ Yesu mwashuba anegenana athi: «Enyibabwira nyithi omundu amanyimira embere s'abandu, nangye kuthyo Mugala w'oMundu* nyandamwimira embere s'abamalaika* ba Gongo. ⁹ Hewethuwe mundu amanyithinda embere s'abandu, naye kuthyo andathindwa embere s'abamalaika* ba Gongo. ¹⁰ Obuli mundu yo wandanegenana kibi kw'inye Mugala w'oMundu*, andaganyirwa. Hewethuwe yo wandahatsya k'oMuthima Mweru* oyo athindaganyirwe na hake.

¹¹ «Mo ndambi mwandagenda omuthwalwa mo so sinakoki*, bushana niyaburana embere s'abasohi kutse embere s'abakulu b'ekihugo,

muthagenda omugangyagangya emithima enyu nga mwandaburana muthi, kutse nga mwandanegenena ki. ¹²Kushangwa konakathambi ako oMuthima Mweru* andabakangiritsya ebyo mwanganegenena.»

Mugani w'omushoki kahumo

¹³Mundu muguma mo muhindano mwabwira Yesu athi: «Mukangiritsya, nyibwirire mugala ethu anyigabire omuhango aye w'oko mwandu thatha athushigiraga.» ¹⁴Yesu mwamushubitsya athi: «Mwira aye! Ni ndi wanyigiragamo musohi enyu kutse nyibye w'ibagabira obushoki bwenyu?» ¹⁵Honyuma kw'aho Yesu mwabwira abandu boshi athi: «Ohe! Mugende omuyitheyi ko ngumbu s'obushoki. Kushangwa obuyingo bw'omundu buthali mo bungi bw'obushoki buwe n'omwangabya mushoki kutsibu.»

¹⁶Aho Yesu mwatsirabo mugani athi: «Kwabyaga mushoki muguma abya awithe mashwa guwe mweramo miaka mingi. ¹⁷Omushoki oyo mwathanga iganitsya n'iyibutsya athi: “Nyayira nyithi kwenzi? Emyaka aye yoshi eyi ndakiwithe honyahiraro!” ¹⁸Aho mwanegenena athi: “Nyithya ko nyayira: nyahimbula esombupu saye, n'ishuba himba sindi nene nene. N'omo mbupu etho monyandahira akalyo kaye koshi n'obundi bushoki bwaye. ¹⁹Enyuma kw'aho nyandayibwira nyithi: “Ingye nyamayibikira bushoki bungi bo bwandamala miaka mingi. Aho nyangaluhuka, kushangwa nyirye, nyishome na nyimoge!”»

²⁰«Hewethuwe Gongo mwamubwira athi: “Iwe kahumo! Mo kiro kya munobwire wafwa. Aho obushoki bwawe bwoshi bo wamalire iyibikira bwandabya bwa ndi?”»

²¹Yesu mwashuba negena athi: «Ekyo kyo kinahikira omundu yo unashondya iyithundira bushoki bungi, hewethuwe athali mushoki embere sa Gongo.»

Iyinihira Gongo

(Mat 6:25-34)

²²Aho Yesu mwabwira abiga* buwe athi: «Ekyo kyo kyamaleka ninyababwira nyithi: muthagenda omugangyagangya emithima enyu bushana n'obuyingo bwenyu, mw'inegena nga mwalya ki. Kutse igangagangya emithima enyu bushana n'emibiri enyu nga mwandambala ki. ²³Ega! Kushangwa obuyingo bwenyu bo buwithe kitsiro kulenga akalyo. N'emibiri enyu yo yiwithe kitsiro kulenga esongimba. ²⁴Mulolere ko bikororo, bithahera na kandi bithahulula, bithayira handu h'ibikamo kalyo kutse mbupu. Hewethuwe Gongo anagenda alisabyo. Aho n'imwe mo muwithe kitsiro kinene kulenga ebironge. ²⁵Indi mo kathi kenyu mw'igangyagangya omuthima uwe angayongerera n'akathambi kake

ko buyingo buwe? Hathali! ²⁶Muli muthangakotsya ikola kandu kake ng'ako, bushana na ki omugangyagangya emithima enyu bushana n'ebindi bindu?

²⁷«Mushunge omushanga kw'anagenda alasha. Athakola, na kandi athayilandira ngimba. Hewethuwe enyibabwira nyithi n'oMwami Solomona mo bushoki buwe boshi, mwathambala lukimba lukwirire nga muguma w'oko mushanga oyo. ²⁸Ebithi byo mw'ishwa ebimashungika munobwire na mumakera ni byagushwa mo mutsanwa. Namo binali bithyo Gongo anagenda ambikyabyo ngimba sikwirire. Nemwe athindabambikye kubuyahanga imwe bandu b'olwikiritsyo luke? ²⁹Muthagenda omuyigangyagangya bushana n'ishondya byo mwandalya n'ebyo mwandashoma. ³⁰Kushangwa ni abandu b'omo kihugo, bobathetsi Gongo bobanashondya ebindu byoshi ebyo buthalaha. H'imwe Isho etsi ko mulayire ko bindu ebyo. ³¹Aho imwe mwathagenda omushondya oBwami bwa Gongo, naye andabongerera ebindi bindu byoshi ebyo.

³²«Imwe kikembe kike muthagenda omubaha kushangwa Isho atsemesibwe n'ibaha oBwami.»

Iyibikira bushoki mo lubula

(Mat 6:19-21)

³³Yesu mwashuba negena athi: «Mugutsye ebindu byenyu, n'esofaranga sathoka kubyo muthetho abatsene. Muyikometsye mbiko sitindakule. Ni omo lubula mo mugende omubika obushoki buthindahwe. Ni aho iho omwitsi athangahika n'enundu ithangabihya. ³⁴Kushangwa ho hali obushoki bwenyu, n'emithima enyu aho ho yinabya.»

Bakoli babuya

³⁵Yesu mwashuba negena athi: «Mugende omuyithegekania kw'ikola. Sotara senyu sibye ni sinanokire. ³⁶Mugende omubya ng'abakoli bobalindirire nyinya-kowabo ashubule ithoka ko ndwa. Andabya ahika n'ikongotha ko luyi aho n'aho nibamakingulira. ³⁷Bamagashanirwa abakoli bo nyinya-kowabo andeya nibane mumulinda ashubule! Kwenene enyibabwira, nyinya-kowabo oyo andambala ngimba s'omulimo, kandi andakokyabo ko lugali balye n'ibya aho ali athekulirabo akalyo. ³⁸Bamagashanirwa abakoli bo nyinya-kowabo angahika mo kathi k'ekiro kutse mo mambya matsibu nibanamulindire.

³⁹«Muminye kubuya k'omwenye enyumba angaminyire akathambi omwitsi andahikirako, athangalikirire omwitsi athobole omwe. ⁴⁰Nemwe kuthyo mugende omubya nimunayithegekenie, kushangwa ingye Mugala w'oMundu* nyandashubula mo kathambi muthetsi.»

**Mukoli muthunganene
na mukoli mubi**

(Mat 24:45-51)

⁴¹Aho Petero mwabutsya Yesu athi: «Nyinya-kowethu, omugani wamatsa oyu athulebitsye ithwe bene kutse alebitsye abandu boshi?»

⁴²Nyinya-kowethu mwamushubitsya athi: «Indi yo mukoli muthunganene na mwenge? Omukoli oyo uhi ng'oyo niye yo nyinya-kowabo angamuyiramo mwimanitsi w'enyumba yiwe. Omukoli oyo andagenda aha abakoli balikyabo bo kalyo ko ndambi itholere. ⁴³Amagashanirwa omukoli oyo nyinya-kowabo andabya ashubula angamweya niakinali akola omulimo oyo. ⁴⁴Kwenene enyibabwira, nyinya-kowabo andamuyiramo mwimanitsi w'obushoki buwe boshi.

⁴⁵«He n'omukoli oyo amathanga iyibwira mo muthima athi: “Nyinya-kowethu amathindirayo,” honyuma kw'aho amagenda ahumba abakoli balikyabo, abayira n'abakatsi niathanga irya n'ishoma n'ikunda, ⁴⁶nyinya-kowabo andashubula mo kiro athalengekenie na ko ndambi athetsi. Aho nyinya-kowabo andamuthibithako n'imuganzamo nga mundu athathunganene.»

⁴⁷«Omukoli yo wetsi erishondya lya nyinya-kowabo, he athayithegekenie n'ikola nga ko nyinya-kowabo ashondire, omukoli oyo andahumbwa mihumbo mingi. ⁴⁸He omukoli yo uthetsi erishondya lya nyinya-kowabo amakola ekyangaleka niahumbwa andahumbwa mihumbo mike. Omundu yo wahabawa bingi, andashabwa bingi. N'oyo wabikibawa bingi andabutsibwa bingi kutsibu.»

Yesu mwaletsa igabana

(Mat 10:34-36)

⁴⁹Yesu mwashuba negena athi: «Mutsanwa wo nyaletsa mo kihugo! Nyanganzire n'omutsanwa oyo abye niamalire inoka! ⁵⁰Nyiwithe mutsigo wa maligo wo nyitholere iheka. Hano enyagalwa kutsibu mo muthima kw'ihika ko ndambi amaligo ayo andabererera. ⁵¹Omuganitsya muthi nyahikaga bushana n'iletha buholo mo kihugo he? Ihi! Enyibabwira, ko n'igabana lya nyaletsa! ⁵²Ithanga munobwire, bandu bathano b'omo nyumba nguma bandagabana, abashathu bandalwisa ababiri, n'ababiri bandalwisa abashathu. ⁵³Omwana n'ishe bathindahulikikirane, omuthasha na nyinya bathindahulikikirane, omwatsana na nyatsala nabo bathindahulikikirane. ^a»

^a 12:53 Soma Mika 7:6.

Ikumbula ebyo bitsuka ko migulu eno

(Mat 16:2-3)

54 Yesu mwashuba bwira omuhindano wa bandu athi: «Omunabya mwashunga ekifu kyahuluka ebulengera itsuba, aho n'aho omunagenda omunegenya muthi: "Envula eyishondya iwa." Kwenene, naro niyawa. 55 N'omugulu ekihunga ekinagenda ekihuluka emunda kihya, aho n'aho omunagenda omunegenya muthi: "Ekyuka kyabya kingi." Na kwenene, ekyuka n'ikyabya kingi. 56 Muli bayimbya! Omunaminya ikumbula emigulu ya hano ishi n'ebyelubula. Hewethuwe bushana na ki omulemwa ikumbula ebyo bitsuka mo biro bino?»

Ihulikirirana n'enzigu awe

(Mat 5:25-26)

57 Yesu mwashuba negena athi: «Bushana naki muthali omasonzomola kubuya emikolere enyu, imwe benebene muthangakotsya ilola kubuya kubuya ebyo mwangakolire? 58 Wamabya uli oya ko tiribinali iya burana n'enzigu awe, kola kyo wangakotsya uhulikirirane naye mukinani mo nzira. Bithali bityo niandakuhikya ahali omusohi, n'omusohi oyo andakuhetsya abapolisi, n'abapolisi bandakugusha mo muliki. 59 Enyikubwira nyithi uhangathoka mo muliki oyo uthetsi wafuha esengi nyitsindutsindu.»

Endundi y'ibinduka mw'ithoka mo bitsibu

13 1 Oko ndambi eyo, bandu baguma mobaya ahali Yesu niabayamubwira ng'oko Pilato mw'ithisa Banyangalilaya baguma mo ndambi bagenda abakera so nyama s'isherera Gongo. 2 Yesu mwabutsyabo athi: «Omuganitsya muthi aBanyangalilaya abo bithawa bathyo, n'inegena mbu babyaga bakoli b'ebitsibu kulenga abandi Banyangalilaya boshi? 3 Ihi! Enyibabwira nyithi nemwe muthabindukire, nemwe boshi kuthyo mwandafwa nga ko bafwaga. 4 N'omo muyi w'iSiloamu, omunara mwatherera ku bandu ikumi na munani mobafwa. Omuganitsya muthi babyaga bakoli b'ebibi kulenga abahimbani boshi b'iYerusalemu? 5 Ihi! He enyibabwira nemwe nyithi, muthabindukire ithoka mo bitsibu byenyu, nemwe boshi mwandafwa nga abandū abo ko bafwaga.»

Omugani w'omuthi w'omutini buthaheka biguma

6 Honyuma kw'aho Yesu mwatsirabo ogandi mugani ono athi: «Habyaga munda muguma abya aherire muthi wa mutini mw'ishwa liwe ly'emisabibu*. Kiro kiguma mwayashondya kuwo ko biguma he mwathabona byo ko. 7 Bushana n'ekyo, mwabwira omukoli yo wagenda amukolera mw'ishwa

liwe athi: “Shunga! Eno ni miaka ishathu yamatsuka ni enyinandya biguma ko muthi w'omutini oyu, he ndali enyinandya nethi. Bushana n'ekyo tsawo! Kushangwa abihya ekithaka kyo busha.” ⁸Hewethuwe omukoli oyo mwashubya athi: “Nyinya-kowethu, thashuba likawo kandi ko mwaka ono. Nyashuba shekererawo n'ihiramo buyinu. ⁹Omw'ikola ebyo kuthi anganaheka biguma mo mwaka owahika. Bithali bithyo aho nimo wandatsawo.”»

Yesu alamyā mukatsi ekiro ky'eSabato

¹⁰Kiro kiguma ky'eSabato* Yesu agenda akangiritsya bandu mo sinakoki*. ¹¹Mo sinakoki eyo mwabyaga mukatsi muguma mukoni. Omukatsi oyo abyaga niamamala miaka ikumi na munani nianemunubibwa n'omutsimu. Omutsimu oyo abyaga niafunyire omugongo guwe ihika ko kika k'iremwa iyisingika. ¹²Yesu abere amushungako mwamubirikira n'imubwira athi: «Koyo, wamalamibwa obulema bwawe.» ¹³Yesu mwamuhirako eminwe, aho n'aho omukatsi oyo mwashuba yisingika n'ithanga isingya Gongo.

¹⁴Hewethuwe omukulu w'esinakoki eyo mwatsibuka bushana na Yesu kw'alamaya omukoni ekiro ky'eSabato*. Bushana n'ekyo, mwabwira omuhindano w'abandu athi: «Kuli biro ndathu b'ikolamo mulimo. Nimo biro ebyo momutholere igenda omuhika bushana mulamibwe, he kithali ekiro ky'eSabato*.»

¹⁵He Nyinya-kowethu mwamushubitsya athi: «Muli bayimbya! Ndi munetsi kw'ekiro ky'eSabato* obuli munda mw'imwe anagenda ahangula ende kutse epunda yiwe aho inagenda ihangwa kushangwa athwalero ko maliba. ¹⁶Omukatsi ono ni w'omo luganda lwa Aburamu oyo Sitani aminaga miaka ikumi na munani. Aho, bithatholere aminulwe mo kiro ky'eSabato*?»

¹⁷Yesu abere amamala inegenā ebinwa ebyo, esonzigu siwe soshi mosafwa shoni. He omuhindano woshi wa bandu iwo mwagenda amogera ebithikothiko byoshi Yesu agenda akola.

Mugani w'akambulu k'eharatali

(Mat 13:31-33; Mar 4:30-32)

¹⁸Yesu mwashuba negena athi: «Obwami bwa Gongo* bwangashoshekanibwa na ki? Kandi iki kyo nyangalingania nabo? ¹⁹Obwami obo bushoshire nga kambulu kake ka haratali, k'omunda muguma ayaga hera mw'ishwa liwe. Akambulu kake ako mokalasha mokabya muthi munene, n'ebironge mobyayahimba so nyuthu sabyo ko mithahi yago.»

²⁰Yesu mwashuba negena athi: «Obwami bwa Gongo* nyangalinganiabo na ki? ²¹Obwami obo bushoshire nga tsatsu* yo mukatsi muguma atsimbaga

n'ithulunganiaro mu hithonga hishathu hya shyano, ihika ko kika eshyano yoshi moyabimba.»

Lukyo lufunda
(Mat 7:13-14,21-23)

²² Yesu abyaga mo lugendo lw'irukira iYerusalemu. Mwatsuka mo miyi n'omomirongo niakangiritsya bandu. ²³ Mundu muguma mwamubutsya athi: «Nyinya-kowethu, nina bandu bake bobandashabulwa?» Yesu mwabwirabo athi: ²⁴ «Muyitsinge ingira mo lukyo lufunda. Kushangwa enyibabwira kwenene, bandu bangi bandayirenga ingira mulo he bathindakotsye.

²⁵ «Omwenye enyumba andabya niamamala imana n'ikinga oluyi, nemwe mwandabya nimwimene embuga. Nemwe mwandathanga ikongotha ko luyi niomunegenamuthi: “Nyinya-kowethu, thakingulire!” Naye andashubitsyabo athi: “Ndetsi yo muthoka.” ²⁶ Aho mwandathanga inegenamuthi: “Thwalyaga n'ishoma haguma nawe. Kandi mowakangiritsya abandu b'omo mihengere y'omo muyi ethu.” ²⁷ Hewethuwe andababwira athi: “Ndetsi yo muthoka. Muthoke mo mesho aye imwe boshi bakoli b'ebibi!” ²⁸ Mwandashunga Aburhamu, na Isaka, na Yakobo n'abaminyeretsi* boshi mo Bwami bwa Gongo*. H'imwe mwandagushwa embuga. Eyo, mwandalira n'ishunga kyabwana. ²⁹ Abandu bandathoka ebubukira n'obulengera itsuba, ko munda w'elugulu na w'ekihya. Abandu abo bandikala niabalya kalyo mo Bwami bwa Gongo*. ³⁰ Muhulikiritsye! Bandu baguma bo bali banyumanyuma bandabya bamberembere. N'abo bali bamberembere bandabya banyumanyuma.»

Yesu alirira abahimbani b'iYerusalemu
(Mat 23:37-39)

³¹ Mo kathambi ako Bafarisayo* baguma mobahikira Yesu n'imubwira bathi: «Yihigule, kushangwa Herote ashondya ikwitha.» ³² Yesu mwashubitsyabo athi: «Muyabwire omutherere oyo muthi: “Enyibinga emitsimu, n'ilamya abakoni munobwire na mumakera. Na mwabwakya nyandabya ninyamamala omulimo aye.” ³³ Hewethuwe litholere munobwire na mumakera, na mwabwakya nyikwame olugendo. Kushangwa lithatholere omuminyeretsi* niathithirwa mu gundi muyi athali iYerusalemu.

³⁴ «Imwe bahimbani b'iYerusalemu! Imwe momunagenda omwitha abaminyeretsi*. N'abandu Gongo anabathumira omunagenda omw'ithabo mw'ihumabo mabwe. Ngendo singahi monyashondire ibahindania ng'engoko ko inagenda eyihindania ehipyeye mo bipupa byaro. He, imwe momwathindire. ³⁵ Monvwe! Enyumba enyu yandabya kihuma.

Enyibabwira kwenene ko muthindashube nyishungako ihika ko ndambi mwandanegenamuthi: “Amagashanirwa yo uhika kw'itsina lya Nyinya-kowethu!^a»

Yesu alamyamukoni muguma ekiro ky'eSabato

14 ¹Kiro kiguma ky'eSabato* Yesu mwayalya ko kalyo mo nyumba ya muguma w'oko bakulu b'aBafarisayo*. Abandu bo babyaga mo nyumba eyo niabayithegeretsya Yesu yo kutsibu bushana balole ebyo ashondya ikola. ²Shunga! Embere sa Yesu habyaga mundu muguma omubiri uwe abyaga nialwere bukoni bw'ibimbabimba. ³Yesu mwabutsya abakangiritsya b'oMugomba* n'aBafarisayo* athi: «oMugomba* ethu anahamulire kutse ahangire ilamyamundu mo kiro ky'eSabato*?» ⁴Hewethuwe mobayumya. Aho Yesu mwakola ko mukoni oyo, mwamulamya n'imubwira athi agende. ⁵Honyuma kw'aho Yesu mwashuba butsyabo athi: «Muguma mw'imwe ali awithe mugala uwe kutse ekimasa kiwe kyo kyamathogera mo kyuna kirimo metsi aho n'aho niathiyihuthe iyathokyakyomo na mokyangabya kiro ky'eSabato*?» ⁶Nabo mobathakotsya ishubyakw'ekyo.

Iyihamyakutse iyikehya

⁷Yesu mwayithegeretsya bobakokibawa ko abashombola emyanya y'embere. Aho mwahabo amahano ano: ⁸«Omugulu mundu amakubirikira ko linye lya buheruki uthagenda w'ikala ko bifumbi by'embere. Kushangwa mo bobathabirikirwa mwanganabya mundu w'olukengerwa kw'ikulenga. ⁹N'omundu w'olukengerwa oyo amahika, oyo uthababirikira imwe babiri amahika n'ikubwira athi: “Shigira oyu y'ekifumbi.” Aho niwafwa shoni bushana n'iyikala enyuma. ¹⁰Hewethuwe wamabirikirwa niwayikala enyuma. N'omo ndambi yo uthakubirikira abya ahika akubwira athi: “Mwiraye, hika wikale embere.” Aho abandu boshi bomulya nabo bangakushikya. ¹¹Kushangwa obuli mundu yo unayihamyandakehibwa, hewethuwe, yo unayikehya iye andahamibwa.»

¹²Honyuma kw'aho Yesu mwabwira oyo wamabirikiraga athi: «Omugulu ogukomya akalyo k'elinye kangabya k'omo mwishi kutse k'olulengero, uthagendaga ubirikira bira bawe kutse bagala benyu kutse babuthi bawe kutse abahimbani bawe bashoki basha, kushangwa wetsi ko nabo kuthyo bangakubirikira, aho wabya nga bamakufuha. ¹³Hewethuwe uli ogukomya akalyo k'elinye, ugende ubirikira abatsene, ebirema, bobashyonogera n'esombumi. ¹⁴Aho, wamakola uthyo wandagashanirwa, kushangwa

^a 13:35 Soma Saburi 118:26.

abandũ abo bathawithe b'ikushubũlitsya. Gongo yo wandakushubũlitsya ko ndambi abakolaga ebithunganene bandalubuka.»

Mugani w'abo bathabirikirwa ko linye

(Mat 22:1-10)

15 Mũndũ muguma w'oko bobagendaga abalya haguma na Yesũ abere amamala ionvwa ebinwa ebyo mwabwira Yesũ athi: «Agashanirwe omũndũ yo wandalya ko kalyo mo Bwami bwa Gongo*!» **16** Yesũ mwamushubitsya mo mugani ono athi: «Mũndũ muguma mwakola kalyo kangi k'elinye na mwabirikirwa bandũ bangi. **17** Endambi y'erirya yabere yahika, mwathũma omukoli ũwe ayabwire bobathabirikirwa athi: “Ewo muhike kushangwa ebyoshi byamalire ithegekanibwa.” **18** Hewethuwe obũli mũndũ, mwathanga iyihambũlitsya. Omũmbere mwabwira omukoli oyo athi: “Monyagulire ishwa, enyishondya iyalola kalyo. Enyikushaba ũnyiganyire.” **19** N'ogũndi mwanegeni athi: “Monyagulire bimasa ikumi b'irimamo, enyishondya iyalola nga byanganakotsya ikola. Enyikushaba ũnyiganyire.”

20 «N'ogũndi mwanegeni athi: “Nyaherukaya linolino, bushana n'ekyo nyithangahika.”

21 «Honyuma kw'aho omukoli oyo mwashũba eyo nyinya-kowabo abyaga n'imũfulira ebyoshi ebyo. Aho omwenye enyũmba abere onvwa ebyo, mwatsibũka n'ibwira omukoli ũwe athi: “Genda tsũba mo mbuga n'omo nzira s'omo muyi, bushana ũlethe abatsene na bobashyonogera, n'esombumi n'ebirema, wingitsyebo mũno.” **22** Honyuma kw'aho omukoli oyo mwashubũla n'inegeni athi: “Nyinya-kowethũ, ebyoshi ũthahamũla nyikole, nyamakolabyo. Hewethuwe hakinali mwanya.” **23** Aho nyinya-kowabo mwabwira omukoli ũwe oyo athi: “Genda mo nzira s'othũnzali, n'omo mikiki y'amashwa. Abandũ bo weyayo uhathikaniebo bingire omwaye nimo enyũmba aye y'otsula. **24** Ega! Enyibabwira hathali mũndũ n'omũguma w'oko bobabirikirawa yo wandagetsya ko kalyo kaye.”»

Imika ebyoshi bushana n'ikwama Yesũ

(Mat 10:37-38)

25 Kiro kiguma muhindano mũnene wa bandũ mwakwama Yesũ. Mwabũndũka n'ibwirabo athi: **26** «Omũndũ yo ushondya inyikwama anyitsigire kulenga ishe, na nyinya, na mukatsiwe, n'abana bũwe, n'abagala babo n'abali babo. Na kandi atholere nianyitsigira kulenga obũyingo bũwe. Bithali bithyo athangabya mwiga* aye. **27** Omũndũ yo uthahekire omusalaba*^a ũwe n'inyikwama athangabya mwiga* aye.

^a **14:27** Iheka omusalaba gũwe n'itsiga igalwa kutse ifwa bushana na Yesũ Kirisito.

28 «Mo ndambi muguma wa kw'imwe yo ushondya ihimba nyumba nyire, litholere niathanga ikala n'ikola emiganzo ng'anganabona esofaranga sosandamala omulimo oyo. 29 He amahimba omusingi, honyuma kw'aho amalemwa iotsutsya enyumba eyo, abandu boshi bo bandagenda abashunga kuro nibandagenda abamusheka, 30 niabanegena bathi: "Omundu oyu mwathangira ihimba enyumba, hewethuwe mwalemwa iotsutsyaro."

31 «Mo ndambi mwami mulebe ashondya iyalwa n'ogundi mwami, litholere niathanga ikala, n'ilola nga abashirikani buwe bihumbi ikumi nga angana kinda mulikyabo yo uwithe abashirikani bihumbi makumi abiri? 32 Amaminywa kw'athangakotsya, niathumira mulikyabo oyo yo bagendi niakinali hale bushana n'imubutsya ng'ibo babiri bangabona obuholo bo bathi. 33 Nemwe kuthyo, hathali mundu mo kathi kenyu yo wangabya mwigwa* aye ali athangamika ebyoshi awitheko.»

Omuniyu owathatholere

(Mat 5:13; Mar 9:50)

34 Yesu mwashuba negena athi: «Omuniyu anabya kindu kikwirire. He omuniyu amahetsya obushi bwawo ni ki kyo kyangahirwa mwo nimo ashuba loka? 35 Omuniyu oyo athakitholere ibye ko kithaka ibye ko buyinu. Anagushwa embuga. Yo uliko mathwi w'ionvwa onvwe!»

Omugani w'embuli yaheraga n'iboneka

(Mat 18:12-14)

15 1 Kiro kiguma abakarani b'ekoli n'abandi bakoli b'ebitsibu boshi mobayifunda hofi na Yesu bushana n'imuhulikiritsya. 2 Omugulu aBafarisayo* n'abakangiritsya* b'oMugomba babere bashunga kw'ebyo, mobathanga ifweba Yesu niabanegena bathi: «Omundu oyu anagenda akokya abakoli b'ebitsibu n'irya nabo!»

3 Bushana n'ebyo, Yesu mwatsirabo omugani ono athi: 4 «Muguma mw'imwe amayira ku mbuli siwe igana, n'enguma mo mbuli siwe etho niyahera. Angakola ki? Athangamika amakumi mwenda na mwenda mo kikuyu bushana n'iyashondya yo yithahera ihika kw'ibonaro! 5 Anabya abonaro athali anahekaru ko bithigo niagenda niamogire! 6 Anabya ahika ewe, athali anabirikira abira buwe n'abahimbani buwe n'ibwirabo athi: "Mumoge haguma nangye. Kushangwa embuli aye yo yithabya n'iyaherire nyamabonaro." 7 Enyibabwira, kuthyo ko mo lubala omunabya lumogo lunene kutsibu omugulu mukoli muguma w'ebitsibu yo uthabinduka ithoka mo bitsibu biwe. Olumogo olo olunabya lunene kulenga ko lwangabere abandu makumi mwenda n'omwenda abathunganene embere sa Gongo, bobathakilayire kw'ibinduka ithoka mo bitsibu byabo.»

Kitsere kya faranga kyaheraga n'iboneka

⁸ Yesu mwashuba negena athi: «Mukatsi muguma amayira ku bitsere ikumi bya faranga,^a kiguma kya kubyo nikyahera, angakola ki? Athanganokya etara n'ibitsya enyumba yoshi, n'ishondya kubuya ihika ko kika abonekyo! ⁹ Amabonakyo athali anabirikira abirakatsi buwe n'abahimbani buwe n'ibwirabo athi: “Mumoge haguma nangye kushangwa ekitsere kyaye nyahetsaya nyamabonakyo.” ¹⁰ Enyibabwira, kuthyo ko abamalaika* ba Gongo abanamoga omugulu omukoli w'ebitsibu muguma masha yo unabinduka ithoka mo bitsibu biwe.»

Mugani w'omusole waheraga n'iboneka

¹¹ Yesu mwashuba negena athi: «Habyaga muyira muguma niawithe bagala buwe babiri. ¹² Omulere mwabwira ishe athi: “Thatha, nyihe omuhango aye w'oko bushoki bwawe.” Aho ishe wabo mwagabira obushoki buwe bw'abagala buwe.

¹³ «Habere hahwa biro bike omulere mwagutsya omuhango uwe, mwabungira mu kihugo kya hale. Abere ahika eyo mwamalirayo obushoki buwe mo kiritsatsa. ¹⁴ Abere amamala esofaranga siwe soshi, mo kihugo ekyo momwabya nzala nzibu. Mwathanga ibusha akalyo. ¹⁵ Bushana n'ekyo mwayakolera munda muguma w'omo kihugo ekyo. Omunda oyo mwamuthama mo mashwa uwe ayalishye so ngulube siwe. ¹⁶ Omusole oyo agenda ashondya alye ko kalyo k'esongulube sagendaga esirya, hewethuwe mohathabya munda w'imuha kuko.

¹⁷ «Bushana n'ekyo, mwathanga iyinegenia athi: “Abakoli ba thatha bali mo mukene, h'ingye hano, enyifwa n'enzala! ¹⁸ Nyashuba eyiri thatha na nyamubwira nyithi: “Thatha, monyakola ekitsibu embere sa Gongo n'embere sawe. ¹⁹ Nyithakitholere unyahulemo mugala awe. Hano, unyitsimbe nga muguma w'oko bakoli bawe!”

²⁰ «Aho omusole oyo mwabathuka mwashuba ew'ishe. Abere akinali hale n'enyumba, ishe mwamushunga, amamufwira shashi kutsibu. Mwachuthuka iyamukokya n'imuwako. ²¹ Mugala mwamubwira athi: “Thatha, monyakola ekitsibu embere sa Gongo n'embere sawe. Hano, nyithakitholere unyiganzemo mugala awe.” ²² H'ishe mwabwira abagombe buwe athi: “Mulethe tsuba olukimba lubuya kutsibu mumwambikyelo. Mumwambikye n'olupete ko munwe, mumwambikye n'ebirato. ²³ Mulethe ekyana ky'ende ekinunire mukerekyo, thulye elinye na thumoge. ²⁴ Kushangwa mugala

^a 15:8 Ko biro ebyo ekitsere kiguma kya faranga kyabyaga nikiringene n'oluhembo lwa mubitsi muguma.

aye ono abyaga niafwire he amalubuka. Abyaga niaherire hewethuwe amaboneka.” Mobathanga irya elinye.

25 «Mo ndambi eyo omwana mukulu w'omuyira oyo niakimire. Omw'ifuluka liwe, abere ahika hofi n'eka mwonvwa esongoma silumire n'abandu niabatsina. **26** Mwabirikira muguma w'oko bakoli n'imubutsya nga yamabya ki. **27** Omukoli mwamushubitsya athi: “Mulumuna awe yo wahikire. Na sho amakera ekyana ky'ende ekinunire, kushangwa mugala uwe amashubula nina matsiba.”

28 «Omwana mukulu oyo abere onvwa ebyo mwakapikira, n'ithinda ingira mo nyumba. Ishe uwe mwahuluka, amaya mugongagonga ingire mo nyumba. **29** He omwana mukulu oyo mwamushubitsya athi: “Shunga, birimo bingi bino ninyine mukukolera, nyithahera nyatha kuthenguha n'ekiro n'ekiguma. Hewethuwe ithahera wathamba n'ekyana ky'embene nangye nyikole linye n'abira baye. **30** He omwana awe oyu yo wabihaya ebindu byawe mo rusingi amabya ashubula, wamamukerera kyana kya nde kinunire!”

31 «Ishe mwamubwira athi: “Mbe mwana aye! Iwe othunabya nawe hano ebiro byoshi. N'ebyoshi nyiwitheko ni biwawe. **32** Hewethuwe bithatholere kw'ithwe irya elinye n'imoga, kushangwa mulumuna awe oyu abyaga niafwire he amalubuka. Abya niaherire he amaboneka.”»

Omugani w'omwimanitsi mwenge

16 ¹Yesu mwatsira abiga* buwe bw'omugani athi: «Kwabyaga muyira muguma mushoki. Omushoki oyo niawithe mwimanitsi w'obushoki buwe. Abandu mobasitaka omwimanitsi oyo yo ku nyinya-kowabo nga kw'anashatha mo bushoki buwe. ²Aho omushoki oyo mwabirikira omwimanitsi oyo n'imubwira athi: “Myatsi ehe yo enyikonvwako? Ithoka munobwire uthishubabye mwimanitsi w'obushoki bwaye. Ewo nyiganzire obushoki bwaye bo wimanire.”

³«Omwimanitsi oyo, mwayibwira athi: “Nyinya-kowethu ashondya inyithokya ko mulimo. Nyayira nyithi? Ithinga nyithangakotsya, n'ihema lyanyitha shoni. ⁴Ega! Nyamaminya ko nyayira, nimo nyandabya nyathokibwa ko mulimo, abandu bagende abanyikokya mo manyumba wabo!” ⁵Aho mwabirikira obuli muntu yo wabyagako mwinda wa nyinya-kowabo. Mwabutsya omumbere athi: “Uliko mwinda wa singahi wa Nyinya-kowethu?” ⁶Mwashubya athi: “Nyiriko mwinda wa ngunguru igana sa mafutha.” Omwimanitsi oyo mwamubwira athi: “Ikala hano tsuba, tsimba kababi ushake ngunguru makumi athano.”

⁷«Honyuma kw'aho mwabutsya undi athi: “Nawe uliko mwinda wa Nyinya-kowethu wa singahi?” Mwashubya athi: “Nyiriko mwinda wa mifuko igana ya ngano.” Omwimanitsi oyo mwamubwira athi: “Tsimba

kababi shaka mifuko makumi mwanani.”⁸ Nyinya-kowabo mwahalamba omwimanitsi shuma oyo bushana n'obwenge bawe. Kushangwa abandu b'omo kihugo kino abanakola emyatsi yabo y'obushuma haguma na balikyabo kulenga abandu bo bali mo kyakakala.»

⁹Aho Yesu mwanegena athi: «Nangye enyibawira, mugende omukolesa obushoki bw'ithima bwa muno kihugo, mwiyira mira. Aho obushoki bwenyu bwandabya bwahwa bandabakokya mo manyumba wa kera na kera.

¹⁰«Omundu w'iyinihirwa mo bindu bike bike, yo wanganabya w'iyinihirwa n'omo bindu bingi. He oyo uthangayinihirwa mo bindu bike bike yo uthanganayinihirwa n'omo bindu bingi. ¹¹Aho mwamabya bandu muthangayinihirwa mw'imanira obushoki bw'ithima bwa hano ishi, ni ndi yo wangabayiramo bimanitsi bw'obushoki bw'ekwenene? ¹²Kandi muli momuthabya bandu b'iyinihira mw'imanira bushoki bwa undi munda, ni ndi yo wandabaha bindu bibye biwenyu?»

¹³«Hathali mukoli wangakolera bo nyinya-kowabo babiri. Kushangwa kwenene andabaga omuguma n'itsigira ogundi, kutse kwenene andabya ku lunda lwa muguma n'isanzugura ogundi. Muthangakotsya ikolera Gongo n'ikolera na mulumungana Faranga.»

Yesu ashubitsya aBafarisayo

(Mat 11:12-13; 5:31-32; Mar 10:11-12)

¹⁴Mo ndambi aBafarisayo* bagenda abonvwa ebinwa byoshi ebyo, mobathanga ishekeretsya Yesu kushangwa babyaga nibatsigire esofaranga. ¹⁵Yesu mwabwirabo athi: «Imwe, omunagenda omuyikangya embere s'abandu ng'imwe bene momunabya bathunganene embere sabo, hewethuwe Gongo anaminye ebyoshi biri mo mithima enyu. Kushangwa ebyo abandu abanaganitsya ko ni bya kitsiro kinene, Gongo anabagabyo kutsibu.

¹⁶«Omugomba* wa Musa n'aMashako w'abaminyeretsi* byo bandu bagenda abakwama ihika ko mugulu wa Yoani Mubatisya. Aho ithoka ko mugulu oyo ni eNgulu Mbuya ey'obwami bwa Gongo* yo yifulwa, na buli munda n'iyikasha kw'ingira mo Bwami obo. ¹⁷Ni kyolo olubula n'ekihugo bibulirane, hewethuwe hathali n'akathondi k'oko Mugomba* akandathokibwa kwo.

¹⁸«Buli muyira yo ukamba mukatsiwe n'ihikya gundi aminye kw'amasingira. N'omuyira amahikya omukatsi yo uthakambwa naye aminye kw'amasingira.»

Omugani w'omushoki n'omutsene Lasaro

¹⁹Yesu mwatsa undi mugani athi: «Kwabyaga munda muguma mushoki. Omushoki oyo agenda ambala ngimba sikwirire kandi sa kitsiro kinene

kutsibũ. Abyaga mu mukene ebiro byoshi. ²⁰Kwabyaga na mutsene muguma eritsina liwe ni yo Lasaro. Lasaro oyo abyagako bihũũ ko mubiri ũwe woshi. Bagenda abamugonzesa ho lukyo lw'enyũmba y'omushoki oyo. ²¹Agenda ashondya alye ko byobithogonga ko lũwali lw'omushoki oyo. Kandi esombwa sagenda esihika ilyatsira ebihũũ biwe.

²²«Kiro kigũma Lasaro oyo mwafwa, n'abamalaika* mobamũthwala hofi na Abũrahamu. Omushoki oyo naye mwafwa mobamũtha. ²³Agenda agalwa kutsibũ okw'irũnga. Mwashũmba amesho na mwashũnga Abũrahamu yo hale na mwashũnga Lasaro niali hofi naye. ²⁴Mwahambala athi: "Thatha Abũrahamu, nyishashire! Enyagalirwa kutsibũ mo mutsanwa ono. Bushana n'ekyo, thũma Lasaro atsukye omuthwemutwe w'omunwe ũwe mo metsi, aholokye olũlimi lwaye."

²⁵«He Abũrahamu mwamũbwira athi: "Mwana aye, wibũke ko wabyaga mo mukene mo bũyingo bwawe, na Lasaro mwabona maligo mangi h'ye amathulera nawe ũli mo bwagali. ²⁶Kandi mo kathi k'ithwe nemwe hali kyuna kire kutsibũ. Bushana n'ekyo abali eno bamashondya iya eyo mũli, bithangathokekana. N'abo bali eyo bathangakotsya iya eyo thũli eno." ²⁷Aho omushoki oyo mwanegena athi: "Mbe thatha enyikushaba thũma Lasaro y'omwethũ, ²⁸kushangwa nyiwithe bagala bethũ bathano, agende ayahanebo nimo bathahikaga iagalirwa hano handũ h'amaligo." ²⁹He Abũrahamu mwashubya athi: "Bagala benyu bawithe amashako wa Mũsa na ow'abaminyeretsi*. Bagende abonvwa byo amashako ayo anegenire!" ³⁰Omushoki mwanegena athi: "Thi mbe thatha Abũrahamu, ebyo bisha bithagonere, hewethuwe muholi amalubuka n'iya yo bali, bangabindũka n'ithoka mo bitsibũ byabo." ³¹Hewethuwe Abũrahamu mwamushubitsya athi: "Bagala benyu bali bathanga onvwa amashako wa Mũsa na ow'abaminyeretsi* ng'oko anegenire, bathangakotsya ionvwa n'omuholi yo uthalubuka."»

Ekitsibũ n'obuganyiri

(Mat 18:6-7,21-22; Mar 9:42)

17 ¹Yesũ mwabwira abiga* bũwe athi: «Kuthangabũsha ibya ebyangaleka abandũ nibakola ebitsibũ. He bũligo kw'oyo wandaleka ni byabya. ²Omũndũ oyo litholere kw'ye niaminirwako lushyo lũnene mw'igosi, n'igũshwa mo ngetsi, kulenga kw'ileka mũndũ mugũma w'oko bake aba akole kitsibũ.

³«Mũgende omuyitheya! Mũgala enyu amakola kitsibũ mukanganie ko mwakakola kitsibũ. Amabindũka mw'ithoka mo bitsibũ biwe niwamuganyira. ⁴Amakukolera bitsibũ ngendo sirinda ko kiro kigũma, na kandi amakuhikira ikushaba buganyiri ngendo sirinda, niwanamuganyira.»

Yesu akangiritsya bushana n'ibya n'olwikiritsyo

⁵Kiro kiguma abathumwa* mobabwira Nyinya-kowethu bathi: «Ongerera olwikiritsyo lwethu.» ⁶Nyinya-kowethu mwashubitsyabo athi: «Mwangabere na lwikiritsyo na molwangabere luke nga kambulu k'eharatali, mwangabwire omuthi oyu muthi: “Yikule uyayihere mo ngetsi, nawo niakola ebyo muthanegeni.”»

Omugombe atholere ikolera nyinya-kuwabo

⁷Yesu mwashuba negena athi: «Mundu muguma wa kw'imwe amabya awithe mukoli uwe yo unamuhingira kutse yo unalishya obuhange buwe, omugulu omukoli amafuluka ithoka engero, nyinya-kowabo anganamubwira athi: “Hika ulye?” ⁸Ihi! Hewethuwe niamubwira athi: “Thanga wanyithekera kalyo, honyuma kw'aho uhingye esongimba sawe nimo wanyithekulira ihika ko kika nyirye n'ishoma, aho nawe walya n'ishoma.” ⁹Omuganitsya muthi omukoli oyo, nyinya-kowabo anganamusima kushangwa mwakola ebyo athamubwira? Ihi! ¹⁰Aho ko biri bithyo kw'imwe. Mo ndambi mwamakola ebyo Gongo abashabire ikola, mugende omunegeni muthi: “Ithwe thuli bakoli busha. Mothukola ebyo thuhumulirwe ikola.”»

Yesu alamyababenzi ikumi

¹¹Yesu abere anemuya iYerusalemu, mwatsuka mo muhathi w'ekihugo ky'iSamariya na eky'iNgalilaya. ¹²Abere anemwingira mu muyi muguma, babenzi ikumi mobayahindana naye. Mobimana hale.^a ¹³Mobathanga ihambala bathi: «Nyinya-kowethu Yesu, uthushashire!»

¹⁴Yesu abere ashungabo mwabwirabo athi: «Muyayikangye ko baheri*.^b» Babere bakinali mo nzira bali abayayo mobalama.

¹⁵⁻¹⁶Omuguma wa kubo abyaga Musamariya*. oMusamariya* oyo abere ashunga ko amalama, mwashuba enyuma mwagenda niasima Gongo mu mulenge munene. Mwinamyababenzi buwe ihika ko kithaka embere s'ebishando bya Yesu n'iamubwira athi wamashingya. ¹⁷Aho Yesu mwanegeni athi: «Bathali babenzi ikumi bo ndalamya? Abandi mwenda bali hayi? ¹⁸Hathali kiro n'omuguma wa kubo yo wamashubula bushana n'isingya Gongo, he yo uthali Muyuta oyu musha!» ¹⁹Aho Yesu mwashubamubwira athi: «Wimana uyigendere, olwikiritsyo lwawe lwamakulamya.»

^a 17:12 Mo Mugomba wa Musa omubenzi athabyaga atholere ibya hofi n'abandu abathali babenzi. Soma Balawi 13:45-46.

^b 17:14 Soma Balawi 14:2-3.

Erihika ly'oBwami bwa Gongo

(Mat 24:23-28,37-41)

20 aBafarisayo* mobabutsya Yesu bathi: «Mugulu ohi w'oBwami bwa Gongo* bwandahikako?» Yesu mwashubitsyabo athi: «oBwami bwa Gongo* buthindahike nga bindu bilolirweko. **21** Abandu bathindanegene mbu: “Lola, oBwami bwa Gongo* buli hano,” kutse inegeni bathi: “Buli halira.” Muminye kubuya ko oBwami obo bwamalire ibya mo kathi kenyu.»

22 Mwashuba bwira abiga* buwe athi: «Ebiro byandahika mwandashondya inyilolako ingye Mugala w'oMundu*, he muthindanyiloleko n'ekiro n'ekiguma. **23** Abandu bandababwirwa bathi: “Shunga! Ali hala!” kutse bandababwira bathi: “Shunga! Ali hano!” Muthanalinda mwayayo na muthakwamagabo. **24** Kushangwa ingye Mugala w'oMundu* nyandabya nyashubula, nyandashungika ng'omulabyo kwanagenda ashungika mo lubula n'ikoletsya mo kihugo kyoshi. **25** Hewethuwe litholere ninyathanga iagalwa kutsibu, n'abandu ba munobwire banyithinde. **26** Nga ko byabyaga ko biro bya Noa, bithyo ko byandabya mo mugulu ingye Mugala w'oMundu* nyandabya nyashubula. **27** Kushangya mo biro ebyo, abandu bagenda abalya n'ishoma, bagenda abahikya n'ihikibwa, ihika ko kiro Noa ingiraga mo bwatho. Aho ametsi mwotsula n'itsikya abandu boshi.^c

28 «Kuthyo ko byandabya nga ko byabyaga mo biro bya Loti: Abandu bagenda abalya n'ishoma, bagenda abagula n'igutsya, bagenda abahera n'ihimba. **29** He ekiro Loti athokaga mo muyi w'eSotomo, Gongo mwakimitsyamo mutsanwa owabyaga nga nvula ya mathwa niathoka mo lubula. Omutsanwa oyo mwatsikya abandu boshi.^d **30** Bithyo ko byandabya ekiro ingye Mugala w'oMundu* nyandabya nyashubula.

31 «Ko kiro ekyo omundu yo wandabya ko luthwe lw'enyumba yiwe, athakimaga kumo athi ingiremo bushana iyenda ebindu biwe. Na yo wandabya engero niathashubaya eka. **32** Mwibuke ebyahikiraga muka Loti.^e **33** Omundu yo wandashondya ibika obuyingo buwe bo kubuya andahetsyabo; hewethuwe yo wandahetsyabo andabikabo kubuya. **34** Enyibabwira, mo kiro ekyo, abandu babiri bandabya nibagonzere ku ngingo nguma, muguma andahekwa n'ogundi andamikwa. **35** Bakatsi babiri bandabya niabashyera haguma, muguma andahekwa n'ogundi

^c 17:27 Soma Ndangiro 6:5-22; 7:1-23.

^d 17:29 Soma Ndangiro 18:20-33; 19:1-25.

^e 17:32 Gongo mwabwira Loti na mukatsiwe athi bashage ithoka mo muyi w'eSotoma, na kandi bathalolaga enyuma. Hewethuwe babere bali abashaga muka Loti mwakebuka, kushangwa abyaga niahekerenie mo muthima guwe ebyo amikagayo. Gongo mwamusoha n'imubindulamo ithundu lya munyu. Soma Ndangiro 19:26.

andamikwa. [36Bandu babiri bandabya niabakola omwisha, muguma andahekwa n'ogundi andamikwa.]]

37Abiga mobabitsya Yesu bathi: «Nyinya-kowethu, ebyo byandakolekera hayi?» Mwashubitsyabo mo mugani ono athi: «Ahali ekinda ho amahungu anagenda ahindana.»

Omugani w'omusohi n'omushumbakatsi

18 1Yesu mwashuba tsira abiga buwe omugani oyu, bushana n'ikangyabo bagende abashaba Gongo ko biro byoshi buthalaha. 2Mwanegeni athi: «Mu muyi muguma mwabyaga musohi. Omusohi oyo abyaga niathubahire Gongo, na kandi niathashikitsye na buli muntu woshi. 3Na mo muyi oyo mwabyaga mushumbakatsi muguma. Omushumbakatsi oyo agenda amuhikira n'imubwira athi: “Nyitsire kubuya olubanza lwaye n'enzigu aye.”

4«Hewethuwe mo biro bingi, omusohi oyo mwathinda imutsiralo. Honyuma kw'aho mwayinegeni emwishi siwe athi: “Ingye nyithubahire Gongo na kandi nyithashikitsye buli muntu. 5Hewethuwe omushumbakatsi oyu kw'amanyiluhya, nyamutsira olubanza lwe lo kubuya. Nimo athigende anyihikira ko ndambi soshi inyikendetsya.”»

6Aho Nyinya-kowethu mwanegeni athi: «Mwonvwe ebyo anegeni omusohi oyu yo ithathunganene. 7Na Gongo, abantu bw'ashombolaga, bo banagenda abamulirira kiro na mwishi andasohabo kubuya na kandi athindathindire iwathikyabo. 8Enyibabwira kw'andatsirabo olubanza tsuba. Hewethuwe ingye Mugala w'oMuntu* nyandabya nyashubula nyandeya mo kihugo mo bantu abanyikiritsye?»

Mugani w'oMufarisayo n'omukarani w'ekoli

9Habyaga bantu bo bagenda abayiheka bathi ibo bobathunganene embere sa Gongo bo bagenda abasunzugura abandi. Aho Yesu mwatsirabo omugani ono athi: 10«Kiro kiguma bantu babiri mobayashaba mo Nyumba ya Gongo*. Muguma abyaga Mufarisayo* n'ogundi mukarani wa koli. 11oMufarisayo* oyo mwimana, n'ishaba buthimathima athi: “Oh Gongo, enyikusima kushangwa ingye nyithali ng'abandi bantu. Ibo ni bitsi, bathathunganene na ni bashingitsi. Kandi enyikusima kushangwa ingye nyithali ng'omukarani w'esokoli oyu. 12Kabiri ko yenga, enyiningira mo mushabe wa buthalya. Kandi enyinahana ekiguma ky'ikumi ky'ebyoshi byo nyinabona.”

13«Omukarani w'ekoli iye, mw'imana hale, kandi mwathanalinda ashumbira amesho uwe mo lubula. Mwabandanga ko kifuba kiwe bushana n'ihononokala niashaba buganyiri athi: “Oh Gongo, nyishashire ingye omukoli w'ebitsibu!”»

14 Aho Yesu mwanegeni athi: «Enyibabwira, omukarani w'ekoli oyo mwashuba ewe, Gongo niamamuganzamo muthunganene. He oMufarisayo* oyo iye ihi. Kushangwa obuli muntu yo wandagenda ayiheka andakimibwa, he yo wandagenda ayihohya andahamibwa.»

Yesu agashanira abana balere

(Mat 19:13-15; Mar 10:13-16)

15 Bantu baguma kuthyo bagenda abalethera Yesu yo abana balere bushana ahire kutho kw'eminwe. Abiga* babere balola kw'ebyo, mobakemera abantu abo. **16** Hewethuwe Yesu mwahamula bamulethere abana etho. Mwanegeni athi: «Mulike abana balere bahike yo nyiri! Muthahangiragabo, kushangwa abantu abali ng'abo bo benye oBwami bwa Gongo*. **17** Kwenene enyibabwira nyithi, obuli muntu yo uthindiangirire oBwami bwa Gongo* ng'omwana mulere, athindingire mubo na hake.»



Yesu agashanira abana balere (18:16)

Yesu asimola n'omushoki

(Mat 19:16-30; Mar 10:17-31)

18 Mukulu muguma mwabutsya Yesu athi: «Mukangiritsya mubuya, nyiyire nyithi nimo nyabona obuyingo bw'ekera na kera?» **19** Yesu

mwamubutsya athi: «Bushana na ki unyahulamo mubuya? Hathali mundu mubuya athali Gongo musha. ²⁰Unetsi kw'oMugomba wa Gongo anegenire athi: "Uthagenda usingira, uthagenda owitha, uthagenda owiba, uthagenda uhambika mundu, ugende ushikya sho na nyoko."» ²¹Omundu oyo mwashubya athi: «Enyinakola emigomba yoshi eyo ng'oko inegenire ithoka ko bwana bwaye.»

²²Yesu abere onvwa ebyo mwamubwira athi: «Ukinabushire kindu kiguma: utsya ebyoshi uwitheko, n'esofaranga sathoka kubyo, gabiratho abatsene. Wamakola uthyo niwayira bushoki mo lubula. Honyuma kw'aho hika unyikwame.»

²³Hewethuwe omundu oyo abere onvwa ebinwa ebi, mwafwa buliye bunene, kushangwa abyaga mushoki kutsibu.

²⁴Yesu abere ashunga ko mundu oyo ko amalire ibya n'obuliye, mwanegeni athi: «Ega litsibuhire kutsibu ko bashoki ingira mo Bwami bwa Gongo*! ²⁵Lyolohire engamia itsuke mo kyuna ky'enandi kulenga ko mushoki ingira mo Bwami bwa Gongo*.»

²⁶Abandu bo bonvwaga ebinwa ebyo mobanegeni bathi: «Aho, ni ndi yo wangashabulwa?» ²⁷Yesu mwashubya athi: «Ebithangakotsibwa n'abandu ebinakotsibwa na Gongo.»

²⁸Aho Petero mwanegeni athi: «Shunga! Ithwe mothwamikire ebyoshi thwabyaga thawitheko n'ikukwama.» ²⁹Yesu mwabwirabo athi: «Kwenene enyibabwira, omundu amamika enyumba yiwe kutse mukatsiwe, kutse bagala babo, kutse babuthi buwe kutse bana buwe bushana n'oBwami bwa Gongo*, ³⁰andabona bindu bingi kutsibu ko mugulu ono. Na mo biro byandahika andabona buyingo bwa kera na kera.»

Yesu ashuba fula emyatsi y'oluholo lwe n'erilubuka liwe

(Mat 20:17-19; Mar 10:32-34)

³¹Honyuma kw'aho Yesu mwathwala abathamwa buwe ikumi na babiri ho musike nibwirabo athi: «Shunga! Othwirukira mo muyi w'iYerusalemu. Ni omo muyi oyo mo ebyoshi byo abaminyeretsi* bashakaga kw'ingye Mugala wa Gongo* byandabererera. ³²Nyandahotherwa nihirwa mo minwe y'abandu bathali Bayuta. Bandanyishekeretsya n'inyihangya n'inyitsirako mathandi. ³³Bandanyihumba mu mbasha na ko nduli bandanyitha. Na mo kiro kya kashathu nyandalubuka.» ³⁴Hewethuwe abathamwa mobathaminya enzamwa y'ebinwa ebyo. Kushangwa byabyaga nibibishirwe kubo. Aho mobathaminya Yesu ng'anegeni ki.

^a 18:20 Soma ithoka 20:12-16; Ibuta 5:16-20.

Yesu alamyamba mbumi

(Mat 20:29-34; Mar 10:46-52)

³⁵Yesu abere ahika hofi n'omuyi w'iYeriko habyaga mbumi nguma n'iyikere emusike w'enzira nieyihema. ³⁶Mo ndambi embumi eyo yabere y'onvwa esongindo s'abandũ bagenda abatsuka, mwabutsya athi: «Mbe yabere ki?» ³⁷Abandũ mobamushubitsya bathi: «Ni Yesu w'iNasareti yo utsuka.» ³⁸Aho mwahambala athi: «Yesu, Mũgala wa Tawiti, unyifwire shashi!»

³⁹Abo babyaga embere mobamukemera bathi atsire. He mwalengya ihambala kutsibu athi: «Mũgala wa Tawiti, nyifwire shashi!»

⁴⁰Yesu mwimana n'ihamula athi bamulethere embumi eyo. Babere bamuhikya hofi naye, Yesu mwamubutsya athi: ⁴¹«Ushondya nyikukolere ki?» Mwashubya athi: «Nyinya-kowethũ, enyishondya nyishuba lole.» ⁴²Aho Yesu mwamubwira athi: «Shuba lola! Olwikiritsyo lwawe lwamakulamya.» ⁴³Aho n'aho, mwashubalola. Mwakwama Yesu nianemusingya Gongo. Abandũ boshi babere bashunga kw'ebyo, nabo kuthyo mobasingya Gongo.

Yesu ayagonzera omwa Sakayo

19 ¹Yesu abere ingira mo muyi w'iYeriko mwakirukania mwo. ²Kwenzi ko muyi oyo kwabyaga muyira muguma ni yo Sakayo. Sakayo oyo abyaga mukulu w'abakarani b'ekoli. Kandi abyaga mushoki.



Sakayo ashamba ko mũthi bushana ashunge ku Yesu (19:5)

³Agenda ashondya alole Yesu nga ni ndi. He ng'oko abyaga mofi, mwathakotsya imulolako bushana n'obungi bw'abandu. ⁴Bushana n'ekyo mwathibitha embere, n'ishamba ku muthi bushana ashunge ku Yesu, kushangwa aho ho Yesu abyaga niangatsukire. ⁵Mo ndambi Yesu abere ahikaho, mwashumba amesho n'ibwira Sakayo athi: «Sakayo, kima tsuba kushangwa nyitholere ni nyagonzera omwawe munobwire.»

⁶Sakayo mwakima tsuba, na mwakokya Yesu n'olumogo lunene.

⁷Mo ndambi abandu boshi babere bashunga kw'ebyo, mobarukuma bathi: «Iyaa! Amayagonzera omw'omukoli w'ebitsibu!»

⁸He Sakayo mw'imana embere sa Yesu n'inegenana athi: «Nyinya-kowethu, onvwa! Nyaha kitse ky'ebindu byaye ky'abatsene. Nyamabya ni monyanyagula kindu kya munda mu mabesi nyamushubulitsyakyo ngendo ine.» ⁹Aho Yesu mwamubwira athi: «Munobwire, Gongo amashabula abandu b'omo nyumba eno, kushangwa nawe kuthyo uli w'omo luganda lwa Aburhamu. ¹⁰Kushangwa ingye Mugala w'omundu* nyahikaga bushana n'ishondya bo babyaga baherire n'ishabulabo.»

Mugani w'abakoli ikumi

(Mat 25:14-30)

¹¹Abandu babyaga nibane mw'onvwa ebinwa byo Yesu agenda anegenana, kushangwa abyaga niali hofi n'iYerusalemu. Aho abandu bagenda abaganitsya ng'oBwami bwa Gongo* buli hofi n'ihika. Bushana n'ekyo Yesu mwatsirabo undi mugani athi: ¹²«Kwabyaga munda muguma w'omo kihanda ky'elyami abyaga niashondya igenda mo kihugo kya hale bushana n'iyasingibwayo. Enyuma y'erisingibwa liwe angashubwire ayathegeke ekihugo kiwe. ¹³Embere agende iyasinga, mwabirikira bandu ikumi mo bakoli buwe. Mwaha obuli munda kitsere kiguma kya faranga,^a mwabwirabo athi: “Mukole buhingania mo bitsere ebyo ihika ko kiro nyandashubula.” ¹⁴Hewethuwe abandu b'omo kihugo kiwe nibamubayire. Bushana n'ekyo, mobamuthumira bagendi enyuma kw'eye bamubwire ko bathashashire abye mwami wabo. ¹⁵Hewethuwe omukulu oyo mwanasinga. Mwashaba mo kihugo kiwe. Abere ahika mwanegenana athi bamubirikirire abakoli ikumi abo amikiraga ebitsere, kushangwa abyaga niashondya iminya endundi yo bathabona mo buhingania bakolaga.

¹⁶«Omukoli mumbere mwahika mwanegenana athi: “Nyinya-kowethu, ekitsere wambaga kyamathunda bindi bitsere ikumi.” ¹⁷Nyinya-kowabo mwamubwira athi: “Wamakola! Uli mukoli mubuya. Kushangwa

^a 19:13 *Kitsere kiguma kya faranga:* Ekitsere ekyo kyabyaga n'ikiringene n'oluhembo lwa mibitsi igana.

mowabya w'iyinihirwa oko bindu bike nyamakuha maka w'ithegeka miyi ikumi.”

¹⁸ «Omukoli wa kabiri naye mwahika n'inegena athi: “Nyinya-kowethu, ekitsere wambaga mokyathundire bindi bithano.” ¹⁹ Nyinya-kowabo mwamubwira athi: “Nawe kuthyo nyamakuha maka w'ithegeka miyi ithano.” ²⁰ Honyuma kw'aho ogundi mukoli naye mwahika n'inegena athi: “Nyinya-kowethu, shunga! Nyamakulethera ekitsere kyo wanyihaga. Ekitsere kino monyabikakyo kubuya mu kakimba. ²¹ Monyakubaha kushangwa unabya muyira mutsibu. Iwe unagenda uthola ekyo uthabikaga, na kandi unagenda uhulula ebyo uthaheraga.” ²² Nyinya-kowabo mwamubwira athi: “Iwe uri mukoli mubi! Nyakusoha ikwamana n'eminegenere awe. Wabyaga niwetsi ko nyiri mutsibu, enyinagenda enyithola ebyo nyithathabika na kandi enyinahulula ebyo ndaheraga. ²³ Aho bushana na ki moguthabika ekitsere kyaye ky'omo nyumba yo banagenda ababikamo esofaranga? Na omw'ishubula iyaye, nyangathokitsye ky'omo n'endundi yakyo!” ²⁴ Aho nyinya-kowabo mwabwira abandu bobabyagaho athi: “Omukoli oyo mumunyage ekitsere ekyo na muhekya oyo uwithe kw'ikumi.” ²⁵ Mobamubwira bathi: “Nyinya-kowethu, oyo ahera awithe ku bitsere ikumi!” ²⁶ Nyinya-kowabo oyo mwashubya athi: “Ni kwenene enyibabwira nyithi, ni yo uwithe kindu yo andahabwa kindi. He oyo uthawithe kindu andanyagulwa na kake awitheko. ²⁷ Hewethuwe esonzigu saye sosithashashaga nyibye mwami wabo mulethebo hano na mukererebo mo mesho aye.”»

Yesu ingira mo muyi w'iYerusalemu n'olukengerwa

(Mat 21:11; Mar 11:1-11; Yoa 12:12-19)

²⁸ Mo ndambi Yesu abere amamala inegenya ebinwa ebyo, mwalola ebushondotsi mo lugendo lwe lw'erirukira iYerusalemu niali embere s'omuhindano. ²⁹ Mwahika hofi n'omuyi w'iBetefake na w'iBetaniya, ko munda w'eKithwa ky'eMiseituni. Mwachuma babiri b'oko biga* bawe n'ibwirabo athi: ³⁰ «Mugende mo muyi owali embere senyu. Mwabya mwahika mwo, mweyamo kyana ky'epunda kihangire ekyo kithahera kyathikalwako na munda. Muhangulekyo na mulethekekyo. ³¹ N'omundu amababutsya athi bushana na ki omuhangulakyo, nimwamushubitsya muthi Nyinya-kowenyu alayire kukyo.»

³² Abiga bobathumawa mobagenda. Mobeya emyatsi niyinali ng'oko Yesu athabwirabo. ³³ Babere banemuhangula ekyana ky'epunda ekyo, abenyekyo mobabutsyabo bathi: «Imwe! Bushana na ki omuhangula ekyana ky'epunda ekyo?» ³⁴ Mobashubitsyabo bathi: «Nyinya-kowethu alayire kukyo.»

³⁵ Honyuma kw'aho mobalecthera Yesu y'ekyana ky'epunda ekyo. Mobashesha kukyo kw'esongimba sabo, aho mobashambya Yesu yo

kũkyo. ³⁶Babere banemũgenda, abandũ mobagenda niabashesha esongimba sabo mo nzira.^b ³⁷Yesũ abere ahika hofi niYerusalemu, mo bwandagala bw'eKithwa ky'eMiseituni, omuhindano woshi wa abiga* bawe mwamoga kũtsibũ. Mobahalamba Gongo niabahambala kũtsibũ bushana n'ebithikothiko byoshi bathashungako. ³⁸Mobagenda niabanegeni bathi:

«Agashanirwe oMwami yo uhika okw'itsina lya Nyinya-kowethu!
Obũholo bubyemo lũbũla,
na Gongo asingibwe!^c»

³⁹Bafarisayo* bagũma bo babyaga mo muhindano w'abandũ mobabwira Yesũ bathi: «Mũkangiritsya, kemera abiga* bawe batsire.» ⁴⁰Yesũ mwabwirabo athi: «Enyibabwira aba bamahũlikirira, ni amabwe ni iwo ahambala!»

Yesũ alirira omuyi w'iYerusalemu

⁴¹Yesũ abere ahika hofi n'omuyi w'iYerusalemu, abere ashunga kũwo, mwalirirawo. ⁴²Mwanegeni athi: «Munobwire wangaminyire ekyangakũlethere obũholo! He ekyo kibishirwe kw'iwe mo mugũlu ono ũthangakotsya ishungakyo. ⁴³Kushangwa ebiro byandahika, aho esonzigu sawe sandakuthimbako bushana n'ikũlwisa. Sandabya sahimba oluhimbo lw'iyikakira hofi nawe sandakuyindiritsya ko mbande soshi. ⁴⁴Sandakushambũla iwe hagũma n'abandũ bawe. Sithindakumikire n'ibwe kũ lindi mw'iwe, kushangwa mogũthamĩnya endambi Gongo ahikaga ikushabũla.»

Yesũ aligitha abandũ mo mbuga y'eNyũmba ya Gongo

(Mat 21:12-17; Mar 11:15-19; Yoa 2:13-22)

⁴⁵Yesũ mwingira mo mbuga y'eNyũmba ya Gongo*, abere ahikamo mwathanga irigitha bo bagenda abahingania. ⁴⁶Mwabwirabo athi: «Bishakirwe mo Mashako Abuyirire bithi: “Nyũmba aye yandabya nyũmba y'inyishabiramo.” He imwe mwayiriremo kabishamo k'abashamuli!^d»

⁴⁷Ko buli kiro Yesũ agenda akangiritsya* abandũ mo Nyũmba ya Gongo*. Abakũlu b'abaheri* n'abakangiritsya* b'oMũgomba n'abakũlu b'abandũ, bagenda abashondya imwitha. ⁴⁸Hewethuwe mobabũsha omwanya w'erimwitha, kushangwa abandũ boshi bagendaga abamahũlikiritsya kũtsibũ.

^b 19:36 aBayuta bagenda abakokya abakũlu mw'ishesha esongimba sabo mo nzira. Bagendaga abakola bathyo bushana n'imukangania ko bamamukokya n'olushikyo.

^c 19:38 Soma Saburi 118:26.

^d 19:46 Soma Isaya 56:7; Yereimia 7:11.

Amaka wa Yesu athoka hayi?

(Mat 21:23-27; Mar 11:27-33)

20 ¹Kiro kiguma Yesu abyaga mo Nyumba ya Gongo*, agenda akangiritsya* abandu, n'ifulirabo eNgulu Mbuya. Abakulu b'abaheri* n'abakangiritsya* b'oMugomba haguma n'abakulu b'aBayuta, mobafumba. ²Mobamubutsya bathi: «Thubwire nga unagenda ukola ebindu byoshi ebi byo ku hamuli ki, na ndi yo wakuhaga amaka w'ikola ebyo?» ³Yesu mwashubitsyabo athi: «Nangye kuthyo nyababutsya kinwa kiguma. Muniywire: ⁴Hayi ho Yoani athokaya amaka w'igenda abatisya abandu? Ni ewa Gongo kutse ewa abandu?»

⁵Mobathanga ibutsania bathi: «Thwamamushubitsya thuthi amaka uwe athokaga ewa Gongo, andathubutsya athi: “Bushana na ki momuthikiritsya Yoani oyo?” ⁶Kandi thwamamushubitsya thuthi ni wa bandu, abandu boshi bali hano bandathugushangako mabwe, kushangwa betsi kubuya ko Yoani abyaga muminyeretsi*.» ⁷Aho, mobamushubitsya bathi: «Thuthetsi aho amaka wa Yoani athokaga.» ⁸Yesu naye mwashubitsyabo athi: «Nangye kuthyo nyithibabwire nga enyikola ebindu ebi byo ku maka wa ndi.»

Mugani w'abahingi babi

(Mat 21:33-46; Mar 12:1-12)

⁹Honyuma kw'aho, Yesu mwatsira abandu omugani ono athi: «Kwabyaga mundu muguma mwahera ishwa liwe lya misabibu*. Omundu oyo mwakondesalyo bahingi baguma. Honyuma kw'aho mwagenda lugendo lwa biro bingi. ¹⁰Ebiro by'erihulula byabere byahika, mwaruma mukoli uwe muguma ko bahingi kushangwa bamuhe engemo yiwe. Hewethuwe abahingi abo mobahumba omukoli oyo n'imushubutsya minwe misha. ¹¹Omwenye erishwa ly'emisabibu* mwashuba thumirabo undi mukoli, oyo naye mobamuhumba, mobamuhangya n'imushubutsya minwe misha. ¹²Mwashuba thuma omukoli wa kashathu. Oyo naye, mobamubabatsya n'imugusha emusike w'erishwa. ¹³Aho omwenye erishwa mwayibutsya athi: “Nyigire nyithi? Nyathuma mugala aye mutsigirwa, oyo iye kuthi bamushikya.” ¹⁴He omugulu abahingi babere bashunga mugala uwe, mobabwirana ibo kw'ibo bathi: “Oyu yo muli w'omwandu. Thumwithe nimo thwandashiba nalyo.” ¹⁵Aho mobamukurira emusike w'erishwa n'imwitha.»

Yesu mwabutsya abandu athi: «Aho abahingi abo omwenye erishwa andayira bo athi? ¹⁶Andahika n'ithisabo, na andaha erishwa eryo lyo bandi bahingi.» Abandu babere bonvwa ebinwa ebyo, mobanegenya bathi: «Ebindu ebiri ng'ebi bithanalinda byathuhikira!»

17 He Yesu mwahanda kubo kw'amesho n'inegena athi: «aMashako Abuyirire ano anegenire athi ki?

“Eribwe lya thindawa n'abahimbi,
ni lya lyabere ibwe ly'ekoni.”

18 Obuli muntu wandayihinda kw'ibwe eryo andakonongoka, n'oyo lyandathogerako eribwe eryo lyanda muthundula.»

19 Omugulu abakangiritsya* b'oMugomba n'abakulu b'abaheri* babere bonvwa ebyo, mobaminya ko Yesu mwatsa omugani oyu bushana nabo. Bushana n'ekyo mo kathambi ako mobashondya imumina, he mobubaha abandũ.

Iriha ekoli ya Kaisari

(Mat 22:15-22; Mar 12:13-17)

20 Abakangiritsya b'oMugomba n'abakulu b'abaheri abo mobathanga igenda abalinga Yesu. Aho, mobamuthumira bandũ bobayiyiragamo bandũ bathunganene. Mobakola ebyo bushana n'imutsimba mo binwa biwe n'imuhira mo minwe y'abakulu bekihugo. 21 Abandũ abo mobamubutsya bathi: «Mukangiritsya, thwetsi ko unagenda unegenena n'ikangiritsya ebithunganene. Kandi uthali unatsomana bukulu bwa muntu, hewethuwe unagenda ukangiritsya abandũ bw'enzira y'ekwenene yo Gongo anamogera. 22 Ewono thathubwira! oMugomba ethu anahamulire iriha ekoli ya Kaisari* kutse iyi?»

23 Hewethuwe Yesu mwaminya ko abashondya imuthega kinwa. Aho mwabwirabo athi: 24 «Munyikangye kitsere kiguma kya faranga.» Aho mwabutsyabo athi: «Eshoshani n'eritsina byo biri ko kitsere kino ni bya ndi?» Mobashubya bathi: «Ni bya Kaisari*.» 25 Aho Yesu mwabwirabo athi: «Mugende omuha Kaisari* y'ebiwe na Gongo y'ebiwe.» 26 Abandũ abo mobathabona kinwa kyo bangamuthega embere s'abandũ. He mobashweka kutsibu kw'ishubya liwe, mo bayihulikiritsya.

Omwatsi w'erilubuka ly'abaholi

(Mat 22:23-33; Mar 12:18-27)

27 Kiro kiguma Basandukayo* baguma mobahikira Yesu. Ni aBasandukayo bo banagenda abanegenena bathi abaholi bathindalubuke. aBasandukayo bobahikiraga Yesu, mobamubutsya bathi: 28 «Mukangiritsya, Musa mwathuthegeka athi omuyira amafwa buthabutha, mugala wabo n'ingirira omushumbakatsi yo uthashiba bushana abuthire wali mugala wabo yo bana.^b 29 Aho, kwabyaga basole balinda ba munda nguma.

^a 20:17 Soma Saburi 118:22.

^b 20:28 Soma Ndangiro 38:8; Ibuka 25:5-6.

Kambere mwahikya he mwafwa buthabutha. ³⁰Owakabiri mw'ingirira omushumbakatsi, he naye mwafwa butha mubuthako. ³¹Honyuma kw'aho mobyabya bityo ko wa kashathu, na kuthyo ko balinda boshi. Mobafwa buthabutha kiro na mwana. ³²Ko nduli, omushumbakatsi naye mwafwa. ³³Ewono, omugulu abaholi bandalubuka, omushumbakatsi oyo andabya muka ndi? Kushangwa abalinda boshi mobamuhikya.»

³⁴Yesu mwashubitsyabo athi: «Abandu b'omo kihugo kino abanahikya n'ihikibwa. ³⁵Hewethuwe abandu bo Gongo andashunga ko batholere ilubuka bushana bingire mo Bwami bo buhika, bathindahikye kutse ihikibwa. ³⁶Bathindahubafwe, bandalingana n'abamalaika. Ni abo bo bana ba Gongo, kushangwa mwalubukyabo. ³⁷Musa mwakangania kubuya kubuya ko abaholi bandalubuka. Ebinwa ebyo anegenya kubyo aho ashakire bushana n'ekikala kyo kyagenda ekigulumira. Aho ahula Nyinya-kowethu athi: "Gongo wa Abrahamu, yo Gongo wa Isaka na yo Gongo wa Yakobo."^c» ³⁸Yesu mwashuba negena athi: «Gongo ni Gongo w'abaliho he athali w'aboholi, kushangwa aboshi baliho kw'ie.»

³⁹Aho baguma b'omo bakangiritsya* b'oMugomba mobanegenya bathi: «Mukangiritsya*, mogunegenya kubuya.» ⁴⁰Mobathalinda ishubabutsya Yesu yo kindi kindu.

Kirisito n'oMwami Tawiti

(Mat 22:41-46; Mar 12:35-37)

⁴¹Yesu mwabutsya abandu athi: «Bushana na ki abandu banganegenya bathi Kirisito* ni mugala w'omwami Tawiti? ⁴²Ndi mwami Tawiti yowenewene yo unegenya mo kitabo ky'eSaburi athi:

“Nyinya-kowethu Gongo mwabwira Nyinya-kowethu athi:

‘Ikala ko malyo aye,

⁴³ ihika ko kiro nyandayira so nzigu sawe,

mo kindu kyawe k'iryathirako.^d”

⁴⁴Aho omwami Tawiti amahula Kirisito mo Nyinya-kowabo, Kirisito oyo angashubabya athi mugala w'omwami Tawiti?»

Iyitheya ko bakangiritsya b'oMugomba

(Mat 23:1-36; Mar 12:38-40)

⁴⁵Mo mugulu abandu boshi babyaga nibakinali abahulikiritsya Yesu, mwabwira abiga* bawe athi: ⁴⁶«Muthagenda omuyitsimba ng'abakangiritsya* b'oMugomba. Bo banagenda abalendera nibambithe so

^c 20:37 Soma Ithoka 3:2-6.

^d 20:43 Soma Saburi 110:1.

ropo nyirenyire. Kandi abanatsigira abandũ baketsyebo mw'ishikibwa mo mihindano. Na kandi abanagenda abatsigira ikala ko bifumbi by'embere mo so sinakoki* na mo so linye. ⁴⁷Abananyaga abashumbakatsi byo bawitheko, kandi abanashaba mishabe mire bushana bayikanganie embere s'abandũ. Abandũ abo Gongo andasohabo kutsibu kulenga abandi.»

Bihembo by'omushumbakatsi mutsene


(Mar 12:41-44)

21 ¹Kiro kiguma Yesu abyaga mo Nyumba ya Gongo*. Abere athimbya amesho ko bandũ mwashunga ng'oko abashoki ko bagenda abahira ebihembo* by'omo kibo. ²Mwashunga kuthyo mushumbakatsi muguma mutsene naye mwahira hitsere hibiri hya faranga mo kibo ekyo. ³Aho Yesu mwanegeni athi: «Kwenene enyibabwira, omushumbakatsi mutsene oyu, yo wamahana bihembo bingi kulenga abandi bandũ boshi. ⁴Kushangwa abandi boshi, ebihembo* bya faranga bathahana ni so sithashaka ko bushoki bwabo. He omushumbakatsi oyu iye mo butsene buwe amahana ebyoshi athawitheko ebyangalekire niabyaho.»

Mwatsi w'ihimbulwa ly'eNyumba ya Gongo

(Mat 24:1-2; Mar 13:1-2)

⁵Bandũ baguma bagenda abasimola ko emyatsi y'eNyumba ya Gongo*. Bagenda abanegeni bathi eNyumba ya Gongo* eyi yihimbire kubuya mu



eNyumba ya Gongo y'iYerusalemu (21:5)

mabwe akwirire, n'omo bindi bindu bikwirire ebyo abandu bahaga Gongo. He Yesu mwanegeni athi: ⁶«Ebyo mushungireko ebi, ebiro byandahika aho eribwe lithindashibe elugulu w'erindi. Ebyoshi byandashambulwa.»

Ebyo byandahika embere s'ebiro by'enduli

(Mat 24:3-14; Mar 13:3-13)

⁷Aho abandu mobamubutsya bathi: «Mukangiritsya, emyatsi eyi yandahika mugulu ohi? Na kihe kyo kiminyikalo kyandathukangania ko yahera hofi n'ibererera?»

⁸Yesu mwashubitsyabo athi: «Muyitheye muthathimawa. Kushangwa bandu bangi bandahika mw'itsina lyaye. Bandagenda abanegeni bathi n'ibo bo Kirisito. Kandi bandanegeni bathi endambi eyo yamalire ihika! He abandu abo muthakwamagabo. ⁹Omugulu mwand'onvwa abandu bali abanegeni ko myatsi y'ebita n'oko myatsi y'oburunga, muthagenda omubaha. Kushangya litholere ebyo nibyathanga ihika, hewethuwe omugulu oyo ekihugo kyandabya nikithetsi kyahwa.»

¹⁰Honyuma kw'aho Yesu mwashuba bwirabo athi: «Ekihanda kyandalwa n'ekindi, n'obwami bwandalwa n'obundi. ¹¹Kwandatsuka thulingiti thutsibu. Kwandabya nzala nzibu na makoni handu hangi hangi. N'omo lubula mwandabya biminyikalo b'ishwekya, byo byand'ubahya abandu bo kutsibu.»

¹²«Hewethuwe embere ebyoshi ebi bihike, bandabatsimba n'ibanubya. Bandabathwala mo so sinakoki* bushana n'iyaburana n'ibagusha mo muliki. Kandi bandagenda ababaletha embere s'abami n'abakulu b'ekihugo bushana nangye. ¹³Ekyo kyandaleka ni mwaletsa obutimo bwenyu. ¹⁴He bino byo mutholere nimwaminyi: Muthagenda omuthanga igangagangya emithima enyu nga mwandayilwako muthi. ¹⁵Kushangwa ni ingyowene ngyo nyandabaha ebinwa by'obuthegekani byo mwandanegeni, ihika ko kika so nzigu senyu soshi sithindakotsye ikubisania nemwe kutse ithinda ebyo muthanegeni. ¹⁶Na kuthyo bo sho na bo nyoko, n'abagala benyu, n'ababuthi benyu, n'abira benyu, nabo kuthyo bandabahothera ko bakulukulu. Baguma mw'imwe bandasohwa kw'ithwa. ¹⁷Abandu boshi bandababaga bushana na ngye. ¹⁸Hewethuwe hathali lutswiri n'oluguma lw'oko mithwe enyu lolwandahera. ¹⁹Bushana n'ebyo muhathikanie mw'itsitsinia, kushangwa omw'itsitsinia eryo, mo mwandashabula obuyingo bwenyu.»

Mwatsi w'ishambulwa ly'iYerusalemu

(Mat 24:15-21; Mar 13:14-19)

²⁰Yesu mwashuba negeni athi: «Mwandabya mwashunga omuyi w'iYerusalemu athimbwako n'abashirikani, aho muminye kw'erishambulwa

lyawo liri hofi. ²¹Aho abandũ bo bandabya iYuteya, bagende bashayire ko bithwa. N'abo bandabya mo muyi w'iYerusalemũ bagende bathoke mugo. N'abo bandabya mo mashwa bathandashũba mo muyi.

²²«Kushangwa ebiro ebyo byandabya biro byo Gongo andasoha abandũ, nimo ebyoshi byo bishakirwe mo Mashako Abuyirire bibererere.» ²³Mo biro ebyo, kwandabya bũhanya ko bakatsi bo bandabya ni bakũle, n'abo bandabya niabongya! Kushangwa kwandabya maligo manene mo kihũgo ekyo na Gongo andakangania obũhithane bũwe ko bandũ abo. ²⁴Bandũ bagũma bandithwa mo muyali, n'abandi bandalerekwa mũ bindi bihũgo. N'abandũ bathali Bayuta bandalyathanga mo muyi w'iYerusalemũ ihika ko mugũlũ endambi yabo yandahwa.»

Ishubũla ly'oMũgala w'oMũndũ

(Mat 24:29-31; Mar 13:24-27)

²⁵«Ebiminyikalo byandashũngika mw'itsuba, n'omo mugenda, n'omo ngununu. Na mo kihũgo abandũ bandabya mũ maligo n'omwihononokala bũshana n'erihũha n'emibimbi by'engetsi. ²⁶Abandũ bandagenda balekũla bũshana n'omushiki omw'irindirira ebyo byandabya mo kihũgo. Kushangwa ebiwithe amaka mo lũbũla byandathenganibwa. ²⁷Aho bandanyishũnga ingye Mũgala w'oMũndũ* ni enyithoka mo kifũ, na maka, na lũkengerwa lũnene. ²⁸Emyatsi eyo yandabya yathanga ihũlũka, mwimane na muyisingirike kushangwa endambi y'erishabũlwa lyenyu yiri hofi.»

oBwami bwa Gongo bũli hofi

(Mat 24:32-35; Mar 13:28-31)

²⁹Honyuma kw'aho Yesũ mwashũba tsira abandũ bo omugani ono athi: «Mũlolere ko mũthi w'omutini n'eyindi mũthi yoshi. ³⁰Omugũlũ omũnashũnga ebibabi byathanga ilasha mũminye ko kigenyero kikwirire kiri hofi. ³¹Na kuthyo, mwandabya mwalola emyatsi eyi yabya, mũminye k'oBwami bwa Gongo* bũhera hofi. ³²Ni kwenene, enyibabwira ko emyatsi yoshi eyo yandabererera mo mugũlũ abandũ b'omo lugero luno bandabya nibathetsi bafwa aboshi. ³³Olũbũla n'ekihũgo byandatsũka, he ebinwa byaye ibyo bithindatsũke na hake.»

Irindirira erishubũla lya Yesũ

³⁴Yesũ mwashũba negena athi: «Muyitheye nimo emithima enyu ithitsithoherwe mw'ishondya irya bingi kũtsibũ n'omo bukundiya na omw'iganganganya emithima enyu bũshana n'obuyingo bwenyu.

^a 21:22 Soma Oseyá 9:7.

Muthayitheyitsye, ekiro ekyo ky'erihika lya Kirisito kyandabalibukanitsya, ³⁵ng'omuthego kwanagenda atsimba. Kushangwa ekiro ekyo kyandalibukanitsya abandũ boshi b'omo kihũgo kyoshi. ³⁶Aho muthayagatho! Mũgende omushaba Gongo ko ndambi soshi. Nimo mwandabona kagala k'ilama ko bindũ byoshi ebyo byandahika, n'imana embere saye ingye Mũgala w'oMũndũ*.)

³⁷Yesu agenda ashiba mo Nyumba ya Gongo* n'iakangiritsya abandũ. N'omo kiro agenda ayagonzera ko Kithwa ky'eMiseituni. ³⁸Abandũ boshi bagenda abamuhikira mo mambya mo Nyumba ya Gongo* bushana n'imuhulikiritsya.

Enama y'itha Yesu

(Mat 26:1-5; Mar 14:1-2; Yoa 11:45-53)

22 ¹Ekiro ky'elinye ly'emikati ithemo tsatsu* kyo bagenda abahũlamo Pasaka* kyabyaga hofi n'ihika.^a ²Abakũũ b'abaheri* n'abakangiritsya* b'oMũgomba bagenda abashondya ko bangithisa Yesu. Hewethuwe babyaga nibubahire abandũ.

Yuta atsigira ithohera Yesu

(Mat 26:14-16; Mar 14:10-11)

³Aho Sitani mwingira mu Yuta oyo wagenda ahũlwamo Isikariote. Yuta oyo abyaga mũgũma w'oko bathũmwa ikumi na babiri ba Yesu. ⁴Mwaya simola n'abakũũ b'abaheri* n'abakũũ b'abatheya b'eNyumba ya Gongo, bushana ahulikirirane nabo nga kw'ahabo Yesu. ⁵Mobamoga, n'imũlaga ko bamũha faranga. ⁶Yuta mwatsiga na mwathanga ishondya mwanya angahabo Yesu butsira abandũ eriminya.

Yesu akalihya akalyo k'ePasaka

(Mat 26:17-25; Mar 14:12-21; Yoa 13:21-30)

⁷Ekiro ky'emikati ithemo tsatsu* mokyahika. Ni ekiro ekyo kyo bangakeriremo ebyana by'esombuli bushana n'elinye ly'ePasaka. ⁸Yesu mwathũma Petero na Yoani n'inegena athi: «Mũgende mũyathũthekere akalyo k'ePasaka* bushana thulyeko.» ⁹Mobamũbutsyamba bathi: «Ogushondya thũyathekereko hayi?» ¹⁰Mwashũbitsyamba athi: «Mw'onvwe! Mwabya mwingira mo muyi, mwahindana na mũndũ ahẽkire kirega kya metsi. Omũndũ oyo mũmũkwame mo nyũmba y'ingiramo. ¹¹Na mwabwira omwenye enyũmba mũthi: "oMũkangiritsya akũbutsyamba nga hayi hohali ekishenge kyaliramo akalyo k'ePasaka* hagũma n'abĩga* bũwe." ¹²Aho

^a 22:1 Soma Ithoka 12:1-17.

omundu oyo abakangya ekishenge kinene ky'elugulu kyamalire ikomibwa kirimo n'ebindu byoshi. Omo momwathuthekera akalyo k'ePasaka.»
 13 Abiga abo mobagenda mobeya ebindu iko binali ng'oko Yesu abwiragabo. Mobatheka akalyo k'ePasaka*.

Kalyo k'ibuka Nyinya-kowethu

(Mat 26:26-30; Mar 14:22-26; 1Kor 11:23-25)

14 Endambi y'erirya yabere yahika Yesu mwikala alye haguma n'abathumwa* buwe. 15 Mwabwirabo athi: «Monyashonditsye kutsibu irya akalyo k'ePasaka* kano haguma nemwe embere banyagatsye. 16 Ega! Enyibabwira nyithi ndindashubalye akalyo k'ePasaka ihika ko kiro nyandalya akalyo akalumirire mo Bwami bwa Gongo*.»

17 Aho Yesu mwatsimba olwatha, mwasima Gongo n'inegena athi: «Mutsimbe olwatha luno na mweboshi mushangirelo. 18 Ega! Enyibabwira ithanga ko ndambi eno ndindashubashome etifayi* na hake ihika ko mugulu oBwami bwa Gongo* bwandahika.»

19 Enyuma kw'ebyo Yesu mwatsimba omukati mwasima Gongo, mwatsawo n'ihawo abathumwa buwe. Mwanegenya athi: «Ono ni mubiri aye wamahanwa bushana nemwe, mugende omuyira muthyo kw'inyibuka.»

20 Babere bamala irya, Yesu mwathola olwatha, mwahalobo n'inegena athi: «Olwatha luno ni ndagane nyihya* mo musasi aye w'amashesheka bushana nemwe.

21 «He mulole! Omundu yo wanyihothera alya haguma nangye. 22 Ingye oMugala w'oMundu* nyafwa ikwamana n'ishondya lya Gongo. Hewethuwe buhanya k'omundu yo wanyihana.» 23 Abathumwa mobathanga ibutsania nga ni ndi mubo yo wakola ekyo.



Yesu alya ePasaka haguma n'abathumwa buwe (22:14)

Yo ushondya ibya mukulu ayikehye

24 Mo biga momwabya bushaka bungi bushana n'iminya nga ni ndi yo mukulu mo kathi kabo. 25 Yesu mwabwirabo athi: «Mo bandu bobathetsi Gongo, abami babo abanagenda abathegekabo mo kahatho. Na bo bawithe amaka kubo abanagenda abayahulamo “bakoli ba bibuya.” 26 He kw'imwe bithagenda ebibya bithyo. Omundu mukulu mw'imwe litholere niabya nga yo mulere. Na yo uthegeka abandi abye nga yo mukoli. 27 Aho ni ndi yo mukulu kulenga mulikyabo? Yo wikere ali alya kutse yo umuthekulira? Ndi ni yo wikere ali alya! H'ingye nyiri mo kathi kenyu nga mukoli.

28 «Nemwe momwatsitsiniaga ibya haguma nangye mw'ilengwako lyaye. 29 Bushana n'ekyo, nga ko Thatha anyihaga oBwami, nangye kuthyo enyibahabo. 30 Aho, mwandalya n'ishoma haguma nangye mo Bwami bwaye. Kandi nemwe mo mwandikala ko ndebe bushana n'isoha esonganda ikumi n'ibiri s'aBaisiraeli.»

Yesu afula mwatsi ko Petero ayigana iye

(Mat 26:31-35; Mar 14:27-31; Yoa 13:36-38)

31 Yesu mwabwira Simoni athi: «Simoni, Simoni, hukiritsya! Sitani mwashaba ehamuli bushana n'ibalongya ng'oko abanagenda abalongya engano bushana n'ibalengako. 32 He, ingye monyikushabira, bushana olwikiritsyo lwawe kw'ingye uthamikagalo. Wandabya wanyishubira, uhe bagala benyu bo muhwa.»

33 Petero mwamushubitsya athi: «Nyinya-kowethu, ingye nyiyisingire iya mo muliki haguma nawe, n'ifwa haguma nawe.»

34 Yesu mwamushubitsya athi: «Mbe Petero! Enyikubwira nyithi munobwire embagatsi yabika niwamanyithinda ngendo kashathu ko uthanyetsi.»

Faranga, shaho na muyali

35 Aho Yesu mwabwira abiga athi: «Lyo nyabathumaga buthaheka lufaranga kutse shaho kutse birato, momwabusha kindu?» Nabo bathi: «Kiro!»

36 Yesu mwabwirabo athi: «He lino, yo uwithe ku lufaranga ahekelo, na kuthyo yo uwithe ku shaho ashahero na yo uthawithe ku muyali agutse ekoti yiwe bushana agulewo. 37 Enyibabwira ko litholere bino ni byanyihikira, byo bishakirwe mo Mashako Abuyirire athi: “Mobamuganza mo miganzo y'abakoli b'ebitsibu.^b” Kushangwa ebinwa ebinyilebitsye

^b 22:37 Soma Isaya 53:12.

biri hofi n'ihika ko nduli yabyo.» ³⁸ Abiga mobamubwira bathi: «Nyinya-kowethu, hano thuwithe ku miyali ibiri.» Mwashubitsyabo athi: «Bihwere aho.»

**Yesu ashaba Gongo
ko Kithwa ky'eMiseituni**
(*Mat 26:36-46; Mar 14:32-42*)

³⁹ Yesu mwathoka mo muyi oyo, mwirukira ko Kithwa ky'eMiseituni nga ko abyaga abegere. Abiga* bawe mobamukwama. ⁴⁰ Abere ahika ahandu aho, mwabwira abiga bawe athi: «Mushabe Gongo, nimo mwabona kagala k'ikinda mwabya mwalengwako.»

⁴¹ Honyuma kw'aho mwayifunda hale kubo haleha n'aho muntu angahikya eribwe athagusha. Mwafukama nithanga ishaba Gongo athi: ⁴² «Thatha, wamashasha olwatha lw'obwagali olu funda lo hale nangye. Hewethuwe bithabyaga nga ko nyishashire, he erishasha lyawe lyo likoleke.»

[⁴³ Aho mumalaika muguma mwathoka mo lubula, mwamuhulukira bushana amuhe kagala. ⁴⁴ Yesu abyaga niagalwa kutsibu, mwongera ishaba Gongo na muhwa mungi. N'esondubano sagenda esithoka kw'eye mosabya nga mathondi wa musasi wagenda athogongerera ahishi.]

⁴⁵ Abere amamala ishaba, mwimana n'ishaba eyiri abiga*, mweyabo nibalitho bushana n'enduhi y'obuliye. ⁴⁶ Mwabwirabo athi: «Omuyatho bushana na ki? Mwimane na mushabe Gongo nimo mwabona kagala k'ikinda mwabya mwalengwako.»

Yesu atsimbwa
(*Mat 26:47-56; Mar 14:43-50; Yoa 18:3-11*)

⁴⁷ Yesu abere akinali anegenana, aho n'aho mokwahuluka muhindano munene wa bandu. Ni Yuta, muguma w'oko abathumwa ikumi na babiri ba Yesu, niashondolerewo, mwaya ahali Yesu bushana n'imufumbatha. ⁴⁸ Yesu mwamubutsya athi: «Mbe Yuta! Ni mw'inyifumbatha mo unyithothera ingye Mugala w'omundu*?»

⁴⁹ Abiga ba Yesu babere bashunga ko byo byabya, mobamubutsya bathi: «Nyinya-kowethu, thubandangebo mo miyali?»

⁵⁰ Aho n'aho muguma wa kubo mwabanda omukoli w'omuheri mukulu*, n'imutsako okuthwi kw'amalyo. ⁵¹ He Yesu mwanegenana athi: «Mulikire aho!» Mwakola ko kuthwi kw'omundu oyo n'imulamya.

⁵² Aho, Yesu mwabwira abakulu b'abaheri*, n'abakulu b'abatheya b'eNyumba ya Gongo*, n'abakulu b'aband'u, bo bahikaga imutsimba athi: «Bushana na ki mwamanyihikira n'emiyali na mihumbo nga nyiri

mushamuli? ⁵³Ebiro byoshi nyabyaga haguma nemwe mo Nyumba ya Gongo*, momuthanyitsimba. He eno ni ndambi enyu, yona ndambi y'amaka w'ekibi akolera momwitsimya.»

Petero ayigana Yesu

(Mat 26:57-58,69-75; Mar 14:53-54,66-72;

Yoa 18:12-18,25-27)

⁵⁴Aho, abandũ abo mobatsimba Yesu. Mobamũheka n'imũthwala mo nyumba y'omuheri mukũlũ*. Petero niakwamirebo nianali hale.

⁵⁵Mobatsana kiriko mo kathi k'embũga y'omuheri mukũlũ n'ithimba kũkyo. Petero naye mwahika iotha ko mũtsanwa haguma nabo. ⁵⁶Mukoli muguma mukatsi abere ashunga ko Petero ikere hofi n'omũtsanwa, mwamũhandako amesho kutsibũ n'inegena athi: «Omũndũ oyu naye athali haguma na Yesu.» ⁵⁷He Petero mwayigana n'inegena athi: «ƙwe mukatsi! Ndetsi omũndũ oyu!»

⁵⁸Kwabere kwahwa kathambi, ũndi mũndũ mwashunga Petero n'imũbwira athi: «ƙwe nawe kundu kundu ũli muguma wa kũbo!» He Petero mwashũbitsya omũndũ oyo athi: «Ingye nyithali muguma wa kũbo.»

⁵⁹Kwabere kwatsũka nga saha ngũma, ũndi mũndũ mwahathikiritsya ekinwa kyo kũ Petero athi: «Kwenene, omũndũ oyu athali haguma na Yesu, kũshangwa naye ni Munyangalilaya.»

⁶⁰He Petero mwashũbitsya omũndũ oyo athi: «Ndetsi byogũnegena!» Petero abere akinali anegen aho n'aho embagatsi moyabika. ⁶¹Nyinya-kowethũ mwabindũka, amahanda amesho wo kũ Petero. Aho, Petero abere aminya ko Yesu amamũlola mw'ibũka ebinwa Nyinya-kowethũ athamũbwira athi: «Munobwire, embagatsi yabika niwamayigana ingye ngendo kashathũ ũthi uthanyetsi.» ⁶²Aho, Petero mwahũlukira embũga nialira n'obuliye kutsibũ.

Abandũ abashekeretsya Yesu

(Mat 26:67-68; Mar 14:65)

⁶³Abandũ bo bagenda abatheya Yesu bagenda abamushekeretsya n'imuhumba. ⁶⁴Mobashwika obũsũ bũwe n'imũbũtsya bathi: «Minyerera nga ni ndi yo wamakuhumba!» ⁶⁵Mobamũgũshira bindi binwa bingi b'imuhangya.

Yesu athonda mo Bũshenge Bũkulũ bw'aBayuta

(Mat 26:59-66; Mar 14:55-64; Yoa 18:19-24)

⁶⁶Bwabere bwakya, abakũlũ b'aBayuta n'abakũlũ b'abaheri* n'abakangiritsya* b'oMũgomba mobahindana. Mobahamũla bathi baletherebo

Yesu mo Bushenge Bukulu* bwabo. ⁶⁷Mobamubutsya bathi: «Thubwire! Iwe Kirisito*?» Mwashubitsyabo athi: «Monyangababwira nyithi ni ingye, muthanganyikiritsya. ⁶⁸Na monyangababutsya kinwa, muthanganyishubitsya. ⁶⁹Hewethuwe ithanga lino, ingye Mugala w'oMundu* nyayikala ko malyo wa Gongo w'amaka.»

⁷⁰Aho aboshi mobamubutsya bathi: «N'inegena mbu ni iwe Mugala wa Gongo* he?» Yesu mwashubitsyabo athi: «Ndi mwamamala inegenala!»

⁷¹Ko nduli mobanegenala bathi: «Thuthakilayire ku batimo, kushangwa thwebenebene thwamayonwira ebyo amanegenala yowene!»

Yesu athonda embere sa Pilato

(Mat 27:1-2,11-14; Mar 15:1-5; Yoa 18:28-38)

23 ¹Aho abandu boshi bo babyaga mo Bushenge Bukulu* bw'aBayuta mobimana, n'ithwala Yesu embere sa Pilato. ²Mobathanga imusitaka bathi: «Mothweya omuyira oyu niakaramya abandu b'omo kihugo kyethu. Niahangirabo bathalihaga ekoli ya Kaisari*, na yowene ayahulamo Kirisito*, kandi mwami.»

³Pilato mwabutsya Yesu athi: «Ni iwe mwami w'aBayuta?» Yesu mwamushubitsya athi: «Ndi ni iwe wamanegenala!» ⁴Aho Pilato mwabwira abakulu b'abaheri* n'omuhindano athi: «Ingye ndashungire kindu n'ekiguma ekyangaleka omundu oyu niasoherwa luholo.»

⁵Hewethuwe abandu abo mobahathikiritsya bathi: «Ebinwa omundu oyu akangiritsya ebikaramya abandu b'omo kihugo kyoshi ky'iYuteya. Mwathanga iNgalilaya, na lino yono amahikyabyo hano.»

Yesu athonda embere sa Herote

⁶Pilato abere onvwa ebinwa ebi mwabutsya Yesu nga ni Munyangalilaya. ⁷Mobamubwira ko Yesu ni Munyangalilaya. Na ni Herote yo wagenda athegeka ekihugo ky'iNgalilaya. Na ko biro ebyo abyaga niali iYerusalemu. Bushana n'ekyo Pilato mwathama Yesu ewa Herote.

⁸Herote abere ashunga Yesu mwamoga kutsibu, kushangwa biro bingi, agendaga ashondya imushungako. Agendaga onvwa abandu kw'abanegenala bushana naye. Kandi abyaga na maha w'ilola Yesu kw'akola ebithikothiko. ⁹Mwabutsya Yesu yo binwa bingi, hewethuwe Yesu mwathamushubitsya kindu. ¹⁰Abakulu b'abaheri* n'abakangiritsya* b'oMugomba, bobabyagaho bagenda abanegenala n'ihathikiritsya mw'isitaka Yesu. ¹¹Herote n'abashirikani buwe, mobashekeretsya Yesu n'imusunzugura. Mwahamula athi bamwambikye lukimba lukwirire. Aho mwamushubya ewa Pilato. ¹²Ho mbere kw'aho, Herote na Pilato babyaga nibabagene. Hewethuwe ithanga ko kiro ekyo mo babya bira.

Pilato ahamula Yesu ithwe

(Mat 27:15-26; Mar 15:6-15; Yoa 18:39-19:16)

13 Aho Pilato mwahindania abakulu b'abaheri*, abakulu b'aBayuta n'abandi bandu. **14** Mwabwirabo athi: «Momunyirethera omundu oyu muthi akaramya abandu. Aho monyamubulitsye bushana n'ebinwa ebi embere s'enyu. He mondabonire bubi mo binwa byoshi byo mwamusitakiraga. **15** Na Herote naye mwathamushungireko kiro na bubi, bushana n'ekyo kyamaleka niathushubulitsya iye. Omundu oyu hathali bubi athakola obwangaleka n'ithwa. **16** Bushana n'ekyo, nyahamula ahumbwe mbasha, honyuma kw'aho nyamuminula.» [17 Mo buli kiro ky'elinye ly'ePasaka, Pilato agenda aminulira abandu bo mundu muguma wa muliki.]

18 Hewethuwe abandu boshi mobanegera kuguma n'ihambala bathi: «W'itisa omuyira oyu! Thuminulire Baraba!» **19** Baraba oyo aminawa bushana n'ikarama ly'abandu lyabyaga mo muyi, na bushana n'ithwa lya mundu. **20** Bushana Pilato agenda ashondya iminula Yesu, mwashuba negena n'abandu. **21** Hewethuwe mobashuba hambala bathi: «Mubambe ko musalaba! Mubambe ko musalaba!»

22 Pilato mwashuba butsyabanda elya kashathu athi: «Omundu oyu akolire kibi kihe? Ndamushungireko bubi bwakolire bwangaleka niatholera ifwa. Bushana n'ekyo nyahamula ahumbwe mbasha, honyuma kw'aho nyamuminula.»

23 Hewethuwe abandu mobahathikiritsya n'ihambala kutsibu bathi Yesu abambwe ko musalaba. Honyuma kw'aho abandu mobasinda Pilato bushana n'erihambala lyabo. **24** Aho Pilato mwakolerabo nga ko bagenda abamushaba. **25** Mwaminulirabo Baraba yo bagendaga abamushaba. Namo anaminawa bushana n'ikarama ly'abandu lyabyaga mo muyi, na bushana n'ithwa lya mundu. Aho mwahabo Yesu bamukolere nga ko bashashire.

Yesu abambwa ko musalaba

(Mat 27:32-44; Mar 15:21-32; Yoa 19:17-27)

26 Abashirikani babere banemuthwala Yesu ahandu bayamubambira ko musalaba*, mobahindana na mundu muguma niathoka engero eritsina liwe ni yo Simoni. Simoni oyo abyaga muhimbani w'omo muyi w'eKurene. Mobamutsimba n'imuhekya omusalaba* wa Yesu mu kahatho. Mwakwama Yesu y'enyuma.

27 Muhindano munene wa bandu mwakwama Yesu. Mo bandu abo mwabyaga bakatsi bo bagendaga abaminulira n'iyihania bushana naye.

28 Yesu mwabinduka n'ibwira abakatsi abo athi: «Imwe bakatsi biYerusalemu muthanyiririraga! Hewethuwe muyiririre mwebene

n'abana benyu! ²⁹Ewo mwonvwe! Ebiro byandahika mo ndambi abandũ bandanegenā bathi: “Bagashanirwe abagũmba na bo bathahera bathabũtha, na bo bathahera bathaongya!” ³⁰Mo biro ebyo,


abandũ bandathanga ibwira ebithwa bathi: “Mũthũtherereko!”

Na bandabwira ehithwa bathi: “Mũthũshwike!”^a”

³¹Kũshangwa bamanyikolera bathya ingye nyĩri ng'omũthi mũbishĩ, bandabakolera bathi imwe mũli nga mũthi yumire?”

³²Mobaletsa bandi bandũ babiri bakoli ba bibi nabo bayithirwe hagũma na Yesũ. ³³Babere bahika ahandũ ho hagenda ahahũlwamo «Kahangali», abashirikani mobabamba Yesũ y'oko mũsalaba. Mobabamba kuthyo abakoli b'ebibi babiri abo,^b mũgũma ko lũhande lwa Yesũ lw'amalyo n'ogũndi ko lwa malembe. [³⁴Aho Yesũ mwanagena athi: «Thatha, ũganyirebo, kũshangwa bathetsi kyo bakola!»]

Abashirikani mobagaba esongimba sa Yesũ mo bwiki.



Yesũ ko mũsalaba mo kathikathi k'abakoli b'ebibi babiri (23:33)

^a 23:30 Soma Oseyā 10:8.

^b 23:33 Soma Isaya 53:12.

³⁵ Abandũ babyaga n'ibimeneho, niabayithegeretsya. Abakulũ b'aBayuta bagenda abashekeretsya Yesũ bathi: «Mwashabũla abandi bandũ. Ingo, ayishabũle yowene, amabya ni Kirisito* yo ashombolawa na Gongo!»

³⁶ Abashirikani nabo mobathanga ishekeretsya Yesũ. Mobayifũnda hofi naye bushana n'imuha tifayi itsukirene. ³⁷ Mobamubwira bathi: «Wamabya ni iwe mwami w'aBayuta uyishabũle wowene!»

³⁸ Ho lũgulũ w'omuthwe wa Yesũ mobahiraho kishayi kyabyaga kishakireko kithi: «Oyu ni mwami w'aBayuta.»

³⁹ Mũgũma w'oko bakoli b'ebibi babiri abo bobabambawa ko mũsalaba, mwathanga ihangya Yesũ athi: «Ndi n'iwe Kirisito*! Yishabũle wowene, nethwe kuthyo mũthushabũle!»

⁴⁰ Hewethuwe mulikyabo mwamũkemera athi: «Iwe uthubahire Gongo, na mo wanamasoherwa olũholo ng'omũndũ oyu? ⁴¹ Kw'ithwe amalipisi aya athũtholere, kũshangwa othũsohwa ikwamana n'ebibi thwakolaga. Hewethuwe omũndũ oyu iye hathali kiro n'ekibi athakola.»

⁴² Honyuma kw'aho mwanegeni athi: «Yesũ, ingye mũnyibũke mo ndambi wandahika mo buthegeki bwawe.» ⁴³ Yesũ mwamũshũbitsya athi: «Kwenene, enyikubwira munobwire wabya hagũma na ngye mo Paratiso*.»

Lũholo lwa Yesũ

(Mat 27:45-56; Mar 15:33-41;

Yoa 19:28-30)

⁴⁴⁻⁴⁵ Bwabere bwashonda ihika kathi ka mwishi, eritsuba molithashũba koletsya. Omwitsimya mwashwika ekihũgo kyoshi ihika ko saha mwenda. Epasiya yabyaga ihanikire mo Nyũmba ya Gongo* moyabereka mo kathi kathi.^c

⁴⁶ Yesũ mwahambala athi: «Thatha, nyamahira omũthima aye mo minwe awe.» Abere amala inegeni ebyo mwatsa omũthima.^d

⁴⁷ Omũkulũ w'abashirikani w'abaroma abere alola ko byo bithatsũka, mwasingya Gongo athi: «Kwenene, omũndũ oyu athali mũthunganene!»

⁴⁸ Omuhindano w'abandũ bo bahikaga ilola ko mwatsi oyu, babere bashũnga ko byo bithatsũka, mobashũbũla niabayibandanga ko bifuba bushana n'obuliye. ⁴⁹ Abandũ boshi bo babyaga betsi Yesũ, n'abakatsi bo bamũkwamaga ithoka iNgalilaya, mobimana hale niabayithegeretsya byo byagenda ebitsũka.

^c 23:44-45 Ni epasiya eyo yo yabyaga igabire ahandũ habuyirire na ahabuyirire kũtsibũ mo Nyũmba ya Gongo. Ni abaheri bakulũ basha bo bagenda abatsũka mo pasiya eyo bushana n'iyahindana na Gongo. Aho Gongo mwaberenga epasiya eyo bushana n'ikangania ko buli mũndũ ahera angayifũnda hofi naye. Soma ithoka 26:31-33; Baeburania 10:19-22.

^d 23:46 Soma Saburi 31:5-6.

Yesu athabwa

(Mat 27:57-61; Mar 15:42-47; Yoa 19:38-42)

50-51 Aho kwabyaga muyira muguma nianahulwamo Yosefu w'omo muyi we Arimateya mo kihugo ky'iYuteya. Yosefu oyo abya mundu akwirire kandi niathunganene. Abyaga ni alindirire oBwami bwa Gongo* buhike. Kandi abyaga muguma w'oko Bushenge Bukulu* bw'aBayuta. He iye athabyaga ahulikirene na balikiyabo mo nama y'eritha Yesu. 52 Yosefu oyo mwagendera Pilato bushana n'imushaba ekinda kya Yesu. 53 Mwahamula bakimyekyo ko musalaba. Honyuma kw'aho mwabungabungira kukyo ko lukimba n'iyahirakyo mw'isinda lyathimawa mo lukuka. Mw'isinda eryo mwabyaga ni Muthahera mwathathabwa mundu. 54 Ekiro ekyo kyabyaga kya kathano n'eSabato* yabyaga ni eyishondya ithangira.

55 Abakatsi abo bahikaga na Yesu ithoka iNgalilaya, mobakwama Yosefu. Mobashunga kw'isinda na mobashunga nga ko bahiraga ekinda kya Yesu ky'omo. 56 Ko nduli mobashubula bushana ni yakomya mafutha na marasi w'ihaka ko kindi kya Yesu. Ekiro ky'eSabato* mobaluhuka nga ko Mugomba anegenire.

Ilubuka Iya Yesu

(Mat 28:1-10; Mar 16:1-8; Yoa 20:1-10)

24 1 Moyenga mo mambya abakatsi abo mobaya kw'isinda ni bahekire amafutha wo bengaga. 2 Babere bahika, mobeya eribwe lyo lyabyaga ko lukyo lw'erisinda n'iryamalire ikumbagalitsibwa emusike. 3 Mobingira omw'isinda, hewethuwe mobatheyamo ekinda kya Nyinya-kowethu Yesu. 4 Ebinwa ebyo mobyaleka nibathabagana. Mw'ithabagana eryo, aho n'aho emusike kubo moyafumba bandu babiri bambithe ngimba singengire kutsibu. 5 Aho bushana n'obuba, abakatsi abo mobahuma amesho w'ahishi. He abandu abo mobabwirabo bathi: «Bushana na ki omushondetsya oyo uliho mo baholi? 6 Athakiri hano, alubukire! Mwibuke ekyo ababwiraga abere akinali iNgalilaya. 7 Ndi mwababwira athi: “Ingye Mugala w'omundu* litholere ni nyahirwa mo minwe y'abakoli b'ebitsibu. Bandanyibamba ko musalaba, he mo kiro ky'akashathu enyuma y'erifwa lyaye nyandalubuka.”»

8 Aho abakatsi abo mobubuka ebinwa byo Yesu anegenaga. 9 Mobathoka kw'isinda, bamayafulira ebyoshi ebyo bya abathumwa ikumi n'omuguma n'abandi abiga boshi. 10 Bano bo abakatsi bobayaga fulira abathumwa* b'omwatsi: Mariya w'iMangandala, na Yane na Mariya nyinya wa Yakobo, n'abandi bakatsi bo babyaga nabo. 11 Hewethuwe abathumwa mobashunga ebinwa by'abakatsi abo nga ni bya bushabusha, mobathikiritsyabyo.

¹²He Petero iye mwabathuka n'ihuthukira tsuba eyiri erisinda. Abere ahikayo mwunama, mwashunga ko mipapara misha. Honyuma kw'aho, mwashuba ewe niashwekera byo bithatsuka.

Yesu ahulukira abiga babiri mo nzira y'iEmau

(Mar 16:12-13)

¹³Hene ko mona kiro ky'eyenga ekyo babiri mo biga ba Yesu, bagenda abaya mu murongo muguma w'agenda ahulwamo Emau. Omurongo oyo abyaga ku lugendo lwa hofi bilometere ikumi na kiguma n'omuyi w'iYerusalemu. ¹⁴Bagenda abagenda niabaganulira ko byoshi bithatsuka. ¹⁵Babere banemusimola n'ikubisania, Yesu yowenewene mwayifunda hofi nabo n'igendania nabo. ¹⁶Mobamushunga he kindu kirebe mokyaleka bathamuminya.

¹⁷Yesu mwabutsyabo athi: «Ni myatsi ki y'omukubisania muli omugenda?»

Abiga babiri abo mobimana nibathashagalukire. ¹⁸Muguma wa kubo ni yo Kiliopa, mwamushubitsya athi: «Abahimbani boshi b'iYerusalemu betsi emyatsi yo yitsukamo ko biro bino! Wowene wo uthanetsi emyatsi eyo?» ¹⁹Yesu mwabutsyabo athi: «Bihi ebyo?»

Mobamushubitsya bathi: «Emyatsi yo yahikiraga Yesu w'iNasareti. Abyaga muminyeretsi* wa maka, mw'inegenana nomw'ikola embere sa Gongo n'embere s'abandu boshi.

²⁰«Abakulu b'abaheri* bethu n'abakulu bethu mobamuhanire asoherwe luholo. Honyuma kw'aho mobamubambire ko musalaba. ²¹Ithwe thwabyaga nithuyinihire ko niye yo wandashabula aBaisiraeli. Hewethuwe munobwire ni kiro kya kashathu ithoka ebinwa ebyo bikolekire. ²²Na kandi bakatsi baguma b'omo kikembe kyethu mobathushwekya. Mobatsinduka kw'isinda, ²³hewethuwe mobathali abeyayo ekinda kiwe. Mobashubula n'ithufulira omwatsi ko abamalaika* mobahulukirabo n'ibwirabo ko aliho. ²⁴Honyuma kw'aho baguma ba kw'ithwe nabo mobaya kw'isinda, mobeya ebyoshi ng'oko abakatsi bathanegenana. Nabo kuthyo mobathali abashunga ko kindu kiwe.»

²⁵Aho Yesu mwabwirabo athi: «Imwe thuhamo! N'emithima enyu ithali eyinikiritsya tsuba emyatsi yoshi yo abaminyeretsi* banegenaga! ²⁶Bithayabyaga bitholere Kirisito* athange iagalwa athyo n'ingira mo lukengerwa lwe?» ²⁷Honyuma kw'aho Yesu mwakumbulirabo ebinwa byoshi bishakirwe kw'eye mo Mashako Abuyirire* woshi. Mwathangira ko bitabo bya Musa n'ebitabo byoshi by'abaminyeretsi*.

²⁸Babere bahika hofi n'omurongo wo bagenda abayako, Yesu mwashungika nga mandu ashondya ilotsya ebushondotsi. ²⁹Hewethuwe abiga mobamushaba kutsibu bathi: «Bya hagama nethwe, kushangwa bwahera igolo n'obuthuku bo buno bwamakura.»

Aho mwingira mo nyumba bushana abye haguma nabo. ³⁰Mwikala alye kalyo haguma nabo, mwatsimba omukati, n'isima Gongo, honyuma kw'aho mwatsawo, n'ihawobo. ³¹Aho amesho wabo mwakingukala mobamuminya. He Yesu mwaliribana embere sabo. ³²Aho mobabwirana bathi: «Athabere ali anegenana nethwe mo nzira n'ithukumbulira aMashako Abuyirire*, emithima ethu mo yithali yotsulamo lumogo?»

³³Mobabathuka konakathambi ako n'ishuba iYerusalemu. Mobeyayo abathumwa ikumi n'omuguma ba Yesu nibali mu muhindo haguma n'abo mo kikembe kyabo. ³⁴Abo babyaga mo muhindano mobabwira abiga babiri abo bathi: «Kundu kundu Nyinya-kowethu alubukire! Mwahulukira Simoni!»

³⁵Abiga babiri abo mobaganulira balikyabo byo bithatsuka mo nzira, na ko bathaminye Yesu athabere atsa omukati.

Yesu ahulukira abiga buwe

(Mat 28:16-20; Mar 16:14-18; Yoa 20:19-23; Miko 1:6-8)

³⁶Abiga babiri abo babere bakinali abasimola kw'ebyo, Yesu yowenewene mwahulukira mo kathi kabo. Mwabwirabo athi: «Obuholo bubye nemwe!»

³⁷Mobashalima n'ububaha kutsibu, kushangwa mobaganitsya bathi bamalola ku kihindi. ³⁸Hewethuwe Yesu mwabutsyabo athi: «Bushana na ki omushalima? Kandi bushana na ki omuthikathika mo mithima enyu? ³⁹Mushunge ko minwe n'oko bishando byaye, N'ingye ngyo wenewene! Munyikoleko na mulole, ekihindi kithayira mubiri kandi kithayira na mafuha. H'ingye omushunga ng'oko nyiwiwebyo.»

⁴⁰Yesu abere anemunegenana ebinwa ebyo mwakangyabo eminwe yiwe n'ebishando biwe. ⁴¹Abiga abo babyaga nibathetsi b'ikiritsya bushana n'olumogo n'ishweka. Aho Yesu mwabutsyabo athi: «Munawithe hano ho ku kalyo?»

⁴²Mobamuha kitse k'ihere kyokitsye. ⁴³Mwatsimbakyo n'iryakyo mo mesho wabo. ⁴⁴Aho mwabwirabo athi: «Nyabyaga nyikinali haguma nemwe monyababwira nyithi ebishakirwe bushana nangye mo Mugomba* wa Musa, n'omo bitabo by'abaminyeretsi* na mo kitabo kya Saburi ebyoshi byangabererere.» ⁴⁵Aho Yesu mwakingula obwenge bwabo, bushana baminye kubuya kw'aMashako Abuyirire* anegenire. ⁴⁶Mwabwirabo athi: «Bishakirwe ko Kirisito* atholere igalwa n'ilubuka ko kiro kya kashathu enyuma y'oluholo lwe.^a ⁴⁷Na omw'itsina liwe mo mwandafulirwa abandu boshi ithangira iYerusalemu bathi babinduke n'ithoka mo bitsibu byabo baganyirwe. ⁴⁸Nemwe muli batimo b'ebinwa ebi. ⁴⁹Mwonvwel!

^a 24:46 Soma Isaya 53; Oseye 6:2.

Nyandabathumira ebyo Thatha abalagaga. He mwathabya mo muyi w'iYerusalemu ihika ko ndambi mwandabona amaka w'athoka elugulu.^b»

Yesu irukibwa mo lubula

(Mar 16:19-20; Miko 1:9-11)

⁵⁰Honyuma kw'aho Yesu mwathwala abiga buwe hofi n'omurongo w'iBetaniya. Mwashumba eminwe n'igashanirabo. ⁵¹Abere akinali agashanirabo, mwayihigula kubo n'irukibwa mo lubula. ⁵²Na mobamuramya. Honyuma kw'aho mobashuba iYerusalemu nibamogire kutsibu. ⁵³Ebiri byoshi babyaga mo Nyumba ya Gongo* niabamusingya.



Yesu irukibwa mo lubula (24:51)

^b 24:49 Soma Mikolano 1:4-5.

Binwa bihya mo kikobo

A

Abiga: Ni bandu bo bakangiritsibwa na mundu mulebe kutse bo bakwamire emiganitsye yiwe. Mo Ndagane ya Kera, Gongo ahulwamo «Mukangiritsya» (soma Isaya 54:13). Mo Ndagane Nyihya, Yesu ahulwamo «Mukangiritsya» (soma Luka 20:21). N'aboshi bamwikiritsye abanahulwamo «biga» (soma Luka 14:26-27,33; Matayo 10:42). Ni abiga ba Yesu bo babyaga bangi kulenga abathumwa buwe.

B

Bafarisayo: Ni kikembe ky'aBayuta bo babyaga bashikitsye oMugomba wa Musa kutsibu, hewethuwe babyaga ni bayihathikiritsye ko mathegeko w'emibere yabo wo bongereraga ko mugomba oyo. Babyaga nibikiritsye ko kuli abatsimu n'abamalaika. Kandi babyaga nibikiritsye ko abaholi bandalubuka. Bagendaga abayima akalyo n'ihana ekiguma ky'ikumi ky'obushoki bwabo. Hewethuwe olwikiritsyo lwabo lwabyaga lwa buyimbya. Yesu naye abyaga niabayire obuyimbya bwabo (soma Luka 11:37-44; Matayo 23:1-36).

Bakangiritsya b'oMugomba: Ni bandu bo bagenda abiga oMugomba wa Musa n'ikangiritsyawo bandi bandu. Bangi ba mubo mobathinda ebyo Yesu agenda akangiritsya abandu, na mobanubya abakirisito bambere.

Balawi: Balawi ni bandu b'omo luganda lwa Lawi. Oluganda olo lwabyaga luguma lw'oko nganda ikumi n'ibiri s'iIsiraeli. Ni bandu b'omo kithunga ky'oluganda olo Gongo ashombolaga bushana n'ihaka eSanduku y'eNdagane n'ikola omulimo w'obuheri (soma Ibuka 10:8).

Basamariya: Ni bandu bo babyaga mo kihugo ky'iSamariya. Ekihugo ekyo kyabyaga mo kathi k'ekihugo ky'iYuteya n'eky'iNgalilaya. aBayuta babyaga nibabayire aBasamariya, kushangwa ibo mobathashikya mibere miguma miguma y'aBayuta mo binwa bya Gongo (soma Luka 10:25-37; Yoani 4:3-42).

Basandukayo: Kikembe kike ky'aBayuta bo bagenda abakwama eKinwa kya Gongo, hewethuwe bathabyaga bikiritsye kw'abaholi bandalubuka (soma Luka 20:27-39). Kandi bagenda abanegenya bathi kuthali bamalaika kutse batsimu. Bangi mo baheri babyaga Basandukayo. Mo Mashako Abuyirire ni aBasandukayo abo n'aBafarisayo bo bagenda abashungika nga nzigu sa Yesu.

Bathumwa: Ni abandu ikumi na babiri bobathumawa na Yesu bushana n'ikola omulimo guwe (soma Luka 6:12-16; Matayo 10:2-5). Bandu nga Polo na Barinaba nabo kuthyo mobahulwamo bathumwa. Bagendaga abafula eNgulu Mbuya n'ithangira amakanisa.

Bubani: Abya matsitsi wa mithi wa kitsiro kinene wo aBaisiraeli bagenda abathokya mo kihugo ky'iSeba, mo Baharabu. Amatsitsi ayo bagenda abokyawo niabathulunganiawo na marasi wo bagenda abokya buli kiro bushana n'ishikya Gongo (soma Ithoka 30:7-8; 30:34-38). Omuki w'obubani abyaga kiminyikalo kya mishabe (soma Saburi 141:2; Ibishulirwa 8:3). Ebihembo by'obubani omwana Yesu ahabawa mobyatsimbwa nga kiminyikalo ky'omulimo guwe w'obuheri (soma Matayo 2:11).

Bwami bwa Gongo: Ekinwa ekyo ekikangania ko Gongo ni Mwami na kandi ekikangya ko obwami obo bwamalire ihika ikwamana n'erihika limbere lya Yesu muno kihugo, na kandi ikwamana n'ebyo akolaga (soma Matayo 12:28; Luka 7:21). Hewethuwe kandi obwami obo obushungika nga kindu kyandahika ko nduli y'ekihugo (Mariko 9:1; Luka 22:30; IBakorinto 6:9-10; 15:50).

Bihembo: Ni bindu byo bandu abanaha Gongo bushana babye mu buguma naye, kutse bushana aganyire ebitsibu byabo kandi kutse bushana n'imusima bushana n'ebibuya akoleragabo. Ko Bayuta ebihembo byabyaga myaka kutse kyana kimbere kya kimano. Lwamabya luhembo lwa kimano, omusasi w'ekimano ekyo agenda asheshengwa emusike w'olutari hewethuwe ekimano kyoshi nikyatsikibwa ko lutari olo (soma Ndangiro 4:4). eNdagane Nyihya ikangania ko ebihembo bya kera bithakiwithe kitsiro kinene. Ni omusasi wa Yesu owasheshekaga ko musalaba owashabulaga abandu ithoka mo bitsibu byabo.

Bushenge Bukulu: Bwabyaga muhindano wa bangumwa makumi alinda na muguma b'ekisomo ky'aBayuta. Omuhindano oyo abyaga n'imanirwe n'oMuheri Mukulu. (Soma Luka 22:66-71; Matayo 26:59-66).

Butara bw'ishererako: Ko Bayuta obutara bw'erishererako bwagenda obuhimbwa bushana nioketsyako mafutha kutse bihembo byo bandu bagenda abaha Gongo.

I

Iyima kalyo: Ni itinda irya ku ndambi nyirebe. Omundu agenda ayima akalyo bushana n'iyihohya embere sa Gongo bushana n'ekitsibu, bushana n'ishaba kutse igongagonga Gongo bushana amuwathikye mu mwatsi mutsibu (soma 2Myatsi y'eMigulu 20:1-4; Esira 8:21-23; Mikolano 14:23).

I

Itsibwako: Gongo mwahamula Aburhamu n'oluganda lawe. Mwabwirabo athi bagende abatsa ko bana babo boshi b'obutsana biro birinda enyuma w'eributhwa lyabo. Eritsibwako kyabyaga kiminyikalo ky'ikangania k'omundu ni Muyuta. Kyo kinaleka nibahula aBayuta mo batsirweko. Bathagendaga abatsa ko bathasha hewethuwe ko batsana basha. Mo biro bathangaga ifula eNgulu Mbuya ya Yesu Kirisito, Bayuta bangi mobikiritsya Kirisito. Hewethuwe mo kathi kabo baguma mubo bagenda abanegeni bathi omundu oyo uthali Muyuta athangabya mukirisito athetsi atsibwako. Bagenda abanegeni bathi obuli mundu yo uthali Muyuta yo utsirweko akangania ko mwatsiga ishikya omugomba wa Musa. Ni honyuma kw'aho mwangabere mukirisito. Omuthumwa Polo agendaga athinda amakangiritsya ayo. Iye mwakangiritsya ko bithatsomene eritsa ko yo uthali Muyuta. Kandi mwanegeni athi kindu kiguma ekitholere bushana Gongo atsigye omuyuta kutse yo uthali Muyuta n'ikiritsya Yesu Kirisito (soma Mariko 15:1-29; Baroma 2:25-29; Bangalatiya 5:2-12; 6:12-15).

K

Kaisari: Lyabya itsina lya lyagenda erihabwa obuli mwami yo wagenda athegeka mo bwami bw'aBaroma.

Kirisito, Masiya: Mo kieburaniya ekinwa eki ekikangania «oyo wahakawa mafutha bushana n'ikola mulimo mulebe» (angabya muMinyeretsii, muheri kutse mwami). Mo kikiriki Masiya ni «Christos». Ni aho ho eritsina lya Kirisito lyathokaga. AbaMinyeretsii mobanegeni bathi Masiya oyo andabya w'omo kithunga ky'omwami Tawiti. Andabya mwami na n'ye yo wandashabula aBaisraeli n'ishubulitsyabo obwami bwabo (soma Luka 4:16-21; Isaya 11:1-5; Yerima 33:15-16).

Kinwa kya Gongo: Mo Ndagane ya Kera, ekinwa «eKinwa kya Gongo» ekikangania esimoli ya Gongo n'abandũ mo mihanda mingi. eKinwa kya Gongo ekimukangania na kitholere ishikibwa n'abandũ boshi (soma Saburi 103:20). Ekinwa ekyo kyandabyaho kera na kera na kyamanegenwa kithangabusha ibererera (soma Isaya 40:8; 51:11). Na kandi eKinwa kya Gongo kyo na mugomba mo kitabo kya Saburi 119. Mo Ndagane Nyihya, eKinwa kya Gongo kinegenire ko mwatsi wo abakirisito abakangiritsya abandũ (soma Mariko 2:2; Bangalatiya 6:6). Mo Ngũlu Mbũya nga ko yashakawa na Yoani, na mo marũba gũwe na mo kitabo ky'eribishulirwa, eKinwa kya Gongo ekinakolesibwa mw'ikangania Kirisito (soma Yoani 1:1).

L

Lubatiso: Ni iribika mũndũ mũlebe embere s'abandũ, na ikangania kw'amalire ikiritsya Yesũ nga Mushabuli gũwe. Kandi ni ikangania kw'omũndũ yo uthalibikwa kw'ali nga muholi, n'ilubuka mo baholi. Ni amafwa ko bitsibũ, na lino obũyingo bũwe ni buhyabuhyu.

Yoani Mubatisya mwabatisya bandũ bangi mo lwitsi lw'eYorotani. Agenda abwirabo athi babĩndũke ithoka mo bitsibũ byabo, na babatisibwe nimo bũli mũndũ yo walola kũbo aminye ko bamalire ibĩndũka. Ni kuthyo ko bathegekanaya emithima y'abandũ bushana n'erihika lya Yesũ.

M

Malaika: eNdagane ya Kera ikangania ko abamalaika ni bagendi bo Gongo anathũma bushana n'ikola erishondya liwe (soma Ndangiro 3:24; Saburi 103:20). N'eNdagane Nyihya naro ko yinanegenire (soma Matayo 4:6). Hewethuwe eNdagane Nyihya ikangania ko kũli na bamalaika ba Sitani (soma Matayo 25:41).

Mashako Abuyirire: Ni itsina ly'eBibiriya, Kinwa kya Gongo ekishakirwe (soma Ithoka 17:14; Yeremia 36:2). Ekinwa «Mashako Abuyirire» kyagendaga ekikangania eNdagane ya Kera (soma Yoani 5:39; 7:17; Mikolano 17:11). Honyuma kw'aho mokyongerera eNdagane Nyihya (soma 1Timoteo 5:18; 2Petero 3:15-16). Abakirisito abanatsimba aMashako Abuyirire nga ikumbulirwa lya Gongo ko bandũ (soma 2Timoteo 3:16).

Masiya: Masiya yo na Kirisito. Soma ebishakirwe ku Kirisito.

Mathegeko: Ni kinwa kyo kithoka ku buthegeki bulebe kutse ku mũndũ mũlebe na kyo bandũ batholere ikwama mo mũlimo kutse mo bũyingo bwabo (soma Ithoka 20:1-17; 34:28; Iũka 5:7-21).

Mbwarara: Ni handu hathahimbirwe na hathikere bandu (soma Luka 4:1).

Mikati ithemo tsatsu: aBayuta bagendaga abalya mikati ithemo tsatsu bali abibuka ekiro bw'ishe-kulu babo bathokaga mo bukobe bw'imisiri (Ithoka 12:34-39). Elinye eryo lyagendaga eribya honyuma w'ekiro ky'ePasaka (Luka 22:1-7).

Mubuyirire: Ekinwa kino ekikyahula abandu kutse bindu bushana n'ikangania ko bahirirwe emusike bushana n'ikolera Gongo. Ni mundu ahirirwe emusike bushana akolere Gongo (soma Ithoka 19:6; Balawi 19:2; Mikolano 3:21; 1Bakorinto 7:34; Baefeso 1:4; 5:26). Mo Ndagane Nyihya ekinwa «mubuyirire» ekikangania abakirisito (soma 1Bakorinto 1:2; 6:1-2).

Muheri: Abyaga mundu yo wagentaga imanira emirimo y'omo Nyumba ya Gongo. Kandi niye yo wagentaga aherera Gongo n'inegenera abandu kw'eye (soma Luka 1:8-9; Ithoka 28:29-30).

Muheri mukulu: Ni mukulu w'abaheri ba Gongo. Agenda ingira ahandu habuyirire kutsibu h'omo Nyumba ya Gongo kagama ko mwaka, bushana n'imuhherera, nimo aganyira ebitsibu biwe na eby'aBayuta boshi. Kandi niye yo wagenda imanira oBushenge Bukulu bw'aBayuta (soma Luka 22:5).

Musabibu: Ni mwaka w'anaheka ebiguma byo binahulwamo misabibu. Ni ebiguma ebyo byo binathokamo etifayi. Mo kitabo ky'eNgulu Mbuya nga ko yashakawa na (Yoani 15:1-5), Yesu anegeni athi yo musabibu w'ekwenene.

Mugala wa Gongo: Ni itsina lya Yesu lyo likangania kw'eye yo na Gongo (Luka 1:32-33).

Mugala w'oMundu: Ni itsina lyo muMinyeretsii Ndaniere ahaga oMushabuli (soma Ndaniere 7:13-14). Yesu yowenewene mwayahulamo Mugala w'oMundu bushana akanganie ko yo Gongo w'ekwenene (Luka 5:24).

Mugomba: Lyabyaga itsina lyo aBaisiraeli bahaga ebtabo bithano bimberebere by'eNdagane ya Kera. Kandi abahabyo itsina «Mugomba wa Musa», «Mugomba wa Gongo», «Mugomba wa Nyinya-kowethu» (soma Ithoka 20; Ibuta 6:1-9; Luka 18:20; Luka 2:27).

Muminyeretsi: Ni mundu yo Gongo anaha ebinwa biwe bushana afulirebyo abandu. Hewethuwe mo Bibiriya muli na bandi bandu bo banayahulamo baMinyeretsii h'ibo nibathathumirwe na Gongo (soma Mikolano 13:6-12).

Musalaba: aBaroma bagenda abamba munda yo w'amitha gundi kutse yo wamakola kibi, ng'eriba munda n'imuhumba, bagenda abamubamba ko musalaba. Omusalaba oyo agenda akomibwa mu bisingiti bibiri, mw'ithambikaniabyo na bagenda abakongomerera kwo kw'eminwe n'ebishando by'omunda oyo kutse imaminira kwo. Honyuma kw'aho bagenda abahandawo mo kithaka n'imika omunda oyo yo kwo ihika ko luholo. Omunda oyo agenda agalwa kutsibu, na lyabayaga ihemuka kutsibu.

Muthima Mweru: Muthima Mweru ni muthima wa Gongo, kandi ni Gongo yowenewene. Muga wa mo bushathu bubuyirire. Kandi ahulwamo murongani (soma Yoani 14:16-18). Anabwira abantu bushana n'ebitsibu byabo, na bushana n'ebithunganene, n'esohi ya Gongo (soma Yoani 16:7-11).

N

Ndagane: Ni kihango kya bandu babiri kutse kya bandu bangi. Gongo naye anakola ndagane na munda mulebe kutse kikembe kya bandu.

Ndagane Nyihya: Ni Ndagane yo Gongo akolaga hagama n'abantu boshi bo bamwikiritsye itsukira ku Yesu Kirisito (soma Yerima 31:31-32; Luka 22:20).

Nyumba ya Gongo: Ni Nyumba nene ya Gongo yo yahimbawa mo mui w'iYerusalemu. Mo Nyumba eyo mwabyaga Handu Habuyirire ho abaheri bagenda abingira buki kiro bushana bakole omulimo wabo. Kandi mwabyaga na Handu Habuyirire kutsibu h'oMuheri Mukulu yowene agendaga ingira kagama ko mwaka niahekire omusasi w'ebimano byo bandu bathaherera Gongo bushana aganyirebo ebitsibu byabo. N'eNyumba eyo yabyaga na kibuga ho abandi bandu bagendaga abikala. aBaisiraeli bagendaga abaganitsya bathi mo kihugo kino, nimo Nyumba eyo mo Gongo anabya (soma Luka 2:22; 19:45-48).

P

Paratiso: Ni handu ha buholo ho abathunganene abanaya bamamala ifwa (soma Luka 23:43; 2Bakorinto 12:4; Ibishulirwa 2:7).

Pasaka: Ni nguma ko so linye s'aBayuta. aBaisiraeli bagendaga abashiba mo kiro eky'ePasaka bushana nibuka erithoka lyabo mo bukobe mo kihugo ky'iMisiri. Mo mugulu w'ePasaka, aBayuta bagendaga abakera ekyana ky'embuli ky'erikolamo buhere mo Nyumba ya Gongo. Bagendaga abashangira akalyo. ePasaka yagendaga ithangwa n'eyenga yerirya

emikati eyithemo tsatsu. Ko biro bino ePasaka y'abakirisito n'ibuka amaligo wo Yesu ashungaga mo kihugo kino bushana n'ishabula abikiritsye (soma Luka 22:1-23).

S

Sabato: Ni kiro kya kalinda moyenga y'aBayuta. Kyabyaga kiro ky'iluhuka bushana n'iramyaga Gongo. Ekiro ekyo kyabyaga kiro ky'ibuka ko Gongo aluhukaga abere amala ibumba ebyoshi (soma Ndangiro 2:2-3; Ithoka 20:8-11).


Sinakoki: Ni manyamba w'ahimbawa mo bali muyi w'aBayuta. Ni omo mw'aBayuta bagendaga abashabira n'isomera eKinwa kya Gongo. Kandi ni omo mo aBayuta bagendaga abafula eKinwa kya Gongo n'ikangiritsyakyo abandi bandu (soma Luka 4:16-21; 6:6).

T

Tifayi: Ni mafu w'agenda akamwa mo biguma by'emisabibu.

Tsatsu: Ni mulyange wa bundu bwa mukati wanathulunganibwa mo bundu buhya bw'omukati bushana n'ibimbyabo. Aho ni bwahirwa ko liko ni mo bwabya mukati. aBayuta bagenda abalya linye ly'emikati yithemo tsatsu bali abibuka ekiro bathokaga mo bukobe bw'iMisiri (soma Ithoka 13:3-10).

**PALESITINA
mo mugulu
wa Yesu**



Munda w'elugulu



0 20 40 60
Bilometere